



# PROGRAMA IX GOVERNU KONSTITUSIONAL



JULLU 2023





# PROGRAMA IX GOVERNU KONSTITUSIONAL



JULLU 2023



## **ÍNDISE**

<b>1. REAFIRMASAUN BA ESTADU DIREITU DEMOKRÁTIKU .....</b>	<b>4</b>
1.1. VIZAUN JERÁL .....	7
1.2. SENÁRIU ATUÁL .....	8
<b>2. KONTINUA HO DEZENVOLVIMENTU HUSI KAPITÁL SOSIÁL.....</b>	<b>13</b>
2.1. EDUKASAUN NO FORMASAUN .....	13
2.1.1. <i>Ensinu Pré-Eskolár</i> .....	16
2.1.2. <i>Ensinu Báziku</i> .....	17
2.1.3. <i>Ensinu Sekundáriu Jerál no Tékniku Vokasionál</i> .....	19
2.1.4. <i>Ensinu Rekorrente</i> .....	20
2.1.5. <i>Reforsu ba Koezaun Sosiál liuhusi Edukasaun</i> .....	21
2.1.6. <i>Jestaun no Kualidade Ensinu</i> .....	22
2.1.7. <i>Ensinu Superiór</i> .....	23
2.1.8. <i>Fundu Dezenvolvimentu Kapital Umanu</i> .....	26
2.2. SAÚDE .....	26
2.2.1. <i>Objetivu jerál sira</i> .....	27
2.2.2. <i>Prestasaun Servisu sira Saúde Primária nian</i> .....	28
2.2.3. <i>Prestasaun de Servisu sira iha Saúde Ospitalár</i> .....	29
2.2.4. <i>Infraestruturas iha Setór de Saúde</i> .....	30
2.2.5. <i>Jestaun no Distribuisaun hosi Medikamentu no Ekipamentu Médiku sira</i> .....	31
2.2.6. <i>Emerjénsia Médika sira</i> .....	32
2.2.7. <i>Jestaun ho Administrasaun iha Setór de Saúde</i> .....	32
2.2.8. <i>Rekursus Umanus Saúde nian</i> .....	33
2.3. INKLUSAUN SOSIÁL, PROTESAUN SOSIÁL NO SOLIDARIEDADE SOSIÁL .....	34
2.3.1. <i>Feto</i> .....	35
2.3.2. <i>Labarik</i> .....	36
2.3.3. <i>Idozus</i> .....	37
2.3.4. <i>Grupus Vulneráveis seluk</i> .....	38
2.4. KOMBATENTES DE LIBERTASAUN NASIONAL.....	40
2.5. KULTURA NO PATRIMÓNIO .....	42
2.6. JUVENTUDE.....	45
2.7. DESPORTU.....	46
2.8. TEKNOLOJIAS INFORMASAUN NO KOMUNIKASAUN (TIC) .....	48
2.9. KOMUNIKASAUN SOSIÁL .....	49
2.10. SOSIEDADE SIVÍL .....	51
2.10.1. <i>Relijiaun</i> .....	52
2.11. ABITASAUN.....	53
<b>3. KONTINUA HO DEZENVOLVIMENTU INFRAESTRUTURAS .....</b>	<b>54</b>
3.1. GOVERNASAUN IHA SETÓR INFRAESTRUTURAS .....	55
3.2. REDE RODOVIÁRIA .....	57





## IX GOVERNUN KONSTITUSIONAL

## PROGRAMA GOVERNUN NIAN

3.3. BEE MOOS NO SANEAMENTU BÁZIKU .....	58
3.4. ENERJIA .....	61
3.4.1. Fornesimentu Eletrisidade .....	62
3.4.2. Gás Naturál .....	63
3.4.3. Enerjias Renováveis .....	63
3.5. TRANSPORTES .....	64
3.5.1. Transporte Terrestre .....	65
3.5.2. Transportes Marítimus .....	66
3.5.3. Transportes Aéreos .....	67
3.6. METEOROLOJIA NO JEOFÍZIKA .....	68
3.7. TELEKOMUNIKASOENS .....	68
3.8. SERVISU POSTÁL .....	70
<b>4. KONTINUA HO DEZENVOLVIMENTU EKONÓMIKU .....</b>	<b>71</b>
4.1. EKONOMIA AZUL .....	72
4.2. AGRIKULTURA, PEKUÁRIA, PESKAS NO FLORESTAS .....	77
4.2.1. Agrikultura .....	77
4.2.1.1. Kuda Kafé .....	81
4.2.2. Pekuária .....	82
4.2.3. Peskas .....	83
4.2.4. Produsaun Florestal .....	86
4.3. PETRÓLEU HO REKURSUS MINEIRAIS .....	88
4.3.1. Dezenvolvimentu Baze Lojística ida iha Suai .....	90
4.3.2. Dezenvolvimentu Refinaria Petrolífera ho Kompleksu Petrokímiku ida .....	91
4.3.3. Dezenvolvimentu Fábrica Gás Naturál Likefeitu .....	92
4.3.4. Dezenvolvimentu Zona Kosteira Sul .....	92
4.3.5. Dezenvolvimentu Estudus Jeolójikus no husi Setór Minaerais .....	94
4.4. TURIZMU .....	94
4.5. KOMÉRSIU .....	98
4.6. INDÚSTRIA .....	100
4.7. SETÓR PRIVADU .....	102
4.8. EMPREGU .....	105
4.9. KOOPERATIVAS .....	106
4.10. AMBIENTE .....	108
<b>5. KONTINUA HO KONSOLIDASAUN GOVERNATIVA .....</b>	<b>112</b>
5.2. POLÍTICA MAKROEKONÓMIKA .....	113
5.2. SETÓR FINANSEIRU .....	113
5.2.1. Banku de Dezenvolvimentu de Timor-Leste (BDTL) .....	114
5.2.2. Banco Nacional de Comércio de Timor-Leste (BNCTL) .....	115
5.2.3. Mikro no Uniaun de Kréditu .....	115
5.3. FINANSAS PÚBLIKAS .....	116
5.3.1. Reforma de Jestaun de Finansas Públikas .....	116
5.3.2. Reforma kona-ba Impostu no Taxa sira .....	117





5.3.3. Efisiénsia no Efikásia iha Despeza Públika .....	117
5.3.4. Orsamentu Bazeia ba Programa .....	118
5.3.5. Aprovizionamento no Transparénsia iha Finanzas Públikas .....	118
5.3.6. Dívida Públika.....	119
5.3.7. Parcerias Públiku-Privadas (PPP) .....	120
5.3.8. Participasaun Setór Públiku iha Investimento Privado (Partisipasaun ekuitativa - Equity Participation) 120	
5.3.9. Investimentu sira Timor-Leste nian (Timor-Leste Investment Corporation (TLIC)) .....	121
5.3.10. Jestaun ba Fundo Mina-rai .....	121
5.3.11. Jestaun Fundo Seguransa Sosiál.....	121
5.3.12. Jestaun ba Património do Estado.....	122
<b>6. BOA GOVERNASAUN NO KOMBATE HASORU KORRUPSAUN.....</b>	<b>123</b>
6.1. ADMINISTRASAUN PÚBLIKA .....	125
6.2. DESENTRALIZASAUN .....	127
6.3. ADMINISTRASAUN ELEITORÁL.....	129
6.4. ORDENAMENTU TERRITÓRIU NIAN .....	130
6.5. DEZENVOLVIMENTU RURAL .....	132
6.6. REJIAUN ADMINISTRATIVA ESPESIAL OEKUSI AMBENO NO ZONA ESPESIAL BA EKONOMIA SOSIAL MERKADU....	133
6.7. GOVERNUN ELETRONIKU.....	135
6.8. JUSTISA .....	136
6.8.1. Reforma ba Polísia Sientífika Investigasaun Kriminál.....	143
6.9. DEFEZA NO SEGURANSA .....	143
6.9.1. Defeza.....	144
6.9.2. Seguransa .....	149
6.9.3. Servisu Migrasaun .....	153
6.9.4. Servisu Nasionál de Intelijénsia.....	153
6.9.5. Autoridade Nasionál de Protesaun Sivil.....	154
6.10. RELASAOES INTERNASIONAIS NO POLÍTIKA ESTERNA .....	155
6.11. DELIMITASAUN BA FRONTEIRAS TERRESTRES NO MARÍTIMAS .....	158
6.12. DEZENVOLVIMENTU INSTITUSIONAL BA POLÍTIKA ESTERNA .....	158
6.13. KOMUNIDADE TIMOROAN IHA ESTRANJEIRU .....	160





## 1. REAFIRMASAUN BA ESTADU DIREITU DEMOKRÁTIKU

Hafoin tinan 6 ikus ne'e, husi 2017 to'o 2023, ne'ebé revela momoos inefisiénsia total husi VII no VIII Governu, ne'ebé presiza tebes esforsu barak hodi hadi'a irregularidade ne'ebé komete ona iha período naruk estagnasaun (paradu hela), iha ne'ebé prevalese violasaun sistemátika ba regra boagovernasaun no transparénsia nian sira, ne'ebé importante tebes ba desenvolvimentu no konsolidasaun Estadu Direitu Demokrátiku ida-ne'e.

Programa hosi IX Governu Konstitusionál sai hanesan instrumentu polítiku ida, ne'ebé liuhusi nia no durante tinan lima mai ne'e, Ezekutivu ne'e hakarak kaer filafali roteiru (matadalan) ne'ebé Timor-Leste define tiha ona atu bele kumpre 'Ajenda 2030 ba Desenvolvimentu Sustentável, husi Organizasaun NasoensUnidas', roteiru ne'e mós fó-sai bazeia ba Plano Estratéjiku Desenvolvimentu, iha ne'ebé ko'alia kona-ba ninia meta no prioridade tuir ODS (Objetivu Desenvolvimentu Sustentável), ho objetivu atu hetan progresu konkretu ba desenvolvimentu sustentável.

Timor-Leste mós assume ona kompromisu polítiku ba implementasaun Ajenda Globál ODS 17 ida-ne'e, no Timor-Leste partikularmente envolve ona iha inkluziun **“Objetivu 16 - País, Justisa no Instituisaun efikás, responsavel no inkluziva, iha nivel hotu-hotu”**.

Iha konjuntura ne'ebé difisil ba País ne'e, ne'ebé hatudu ona ba mundu kona-ba Estadu Timor-Leste ninia frajilidade, IX Governu Konstitusionál hasan devér no responsabilidade atu korrije ho loloos kona-ba irregularidade sira ne'ebé governu liubá halo:

1. Implementa política pública hodi halo reforma ba sistema ne'ebé governu anteriór implementa, ne'ebé la iha transparénsia no la iha responsabilidade finanseira no administrasaun;
2. Promove reformas estruturantes, atu aselera transformasaun nesesária, iha área sira ne'ebé hatán ba espetativa husi sociedade no husi populasaun;
3. Halo korresaun, hodi aperfeisoa prosesu, sistema no metodolojia ho forma transversál, ne'ebé trava hela desenvolvimentu sustentável, atu Instituisaun tomak bele sai efikás, responsavel no inkluziva liután.

Ba Estadu joven ida-ne'e, ho ona tinan 21, maibé sei frajil, pas sosiál, justisa no instituisaun ne'ebé sólida (metin) mak sai nu'udar pilár ne'ebé sei permite atu transmite konfiansa no seguransa ba





populasaun no permite mós atu atrait investimentu sira, hodi nune'e bele desenvolve setór ekonómiku no sosiál husi dalan ne'ebé sustentável.

Nune'e, tenke haree filafali, kapasita no hadi'a instituisoens ne'ebé garante kondisoens-ne'e, nu'udar prioridade nasional ida, tanba laho justisa ne'ebé sólida, transparente no efikás, sei labelé hakat liu barreira sira ne'ebé permite ita atu hadi'a tiha situasaun frajil daudaun ne'e hanesan Estadu ida.

Diversifikasaun ekonómika no kriaun empregu mak sai prioridade ba Governu ida-ne'e, atu fó resposta ba dezafiu ne'ebé mai husi modernidade no atu apoia populasaun ne'ebé joven no iha kreximentu lalais. Ita iha benefísiu tamba iha rikusoin enerjétiku sira, maibé ita tenke esforsa-an maka'as atu hasees-an husi 'maldição dos recursos', ( 'malisan husi rikusoin'), hodi harii ponte ne'ebé halo ligasaun ida ne'ebé forte entre rekursus natural sira ne'e ho progresu.

Atu hasoru dezafiu ida-ne'e, ita sei kontinua investe iha área fundamentál tolu: kapital sosiál, desenvolvimentu infrastrutura no desenvolvimentu ekonómiku, bazeia ba kuadru institusional ida ne'ebé efikás duni no bele kontribui atu elimina korrupsaun no burokrazia ne'ebé todan liu, no iha sorin seluk promove kompeténsia, profesionalizmu, onestidade no transparénsia.

Investimentu iha **kapital sosiál**, ho objetivu atu harii sosiedade ida ne'ebé saudavel no instruida, bele hatán ba nesesidade sosiál povu-nian no prodús forsa-de-traballu ida ne'ebé bele akompaña desenvolvimentu País nian. Investimentu ne'ebé aloka iha **infrastrutura** ho hanoin atu kontribui ba ekonomia ida ne'ebé buras, interligada no sustentável. Iha ona planu kompletu ida iha infrastrutura, ba konstrusaun portu, aeroportu, estrada sira, bee moos no saneamentu báziku iha rai-laran tomak, ne'ebé sei implementa ho dinámika foun ida, iha tinan 5 mai ne'e.

Investimentu iha desenvolvimentu ekonómiku sei ajuda Timor-Leste atu kria ekonomia moderna, diversifikada no próspera ida, liuhusi konstrusaun iha setór industriál estratéjiku no transformadór sira. Agrikultura, peska, pekuária no rekursus florestál sira nu'udar fonte rendimentu no alimentasaun ne'ebé krusiál ba desenvolvimentu ne'ebé, ho tan hadi'a no haboot empreendedorizmu, kria oportunidade barak ba desenvolvimentu iha indústria. Turizmu preziza investimentu prioritáriu ida nu'udar maneira atu kapitaliza (fó valór) ba ninia beleza, ninia diversidade no atu aproveita lokalizasaun jeográfika País nian.

Nune'e mós, investimentu atu transforma Kosta Súl sai sentru petrolíferu rejional ida – **projetu Tasi Mane** – ne'e sai hanesan investimentu ida ne'ebé brani, ne'ebé sei lori impaktu ekonómiku multiplikadór (barak) ba munisípiu hotu-hotu to'o suku no aldeia tomak.







Parte importante iha prosesu konstrusaun Estadu no Nasaun ida-ne'e, atu garante mós soberania totál ba Rai, inklui ba Tasi ne'ebé, tuir direitu internasionál, iha Timor-Leste ninia jurisdisaun (kontrola no uzu). Tan ne'e mak IX Governu sei kontinua fó **prioridade máxima** ba negosioens atu **hetan delimitasaun fronteira terrestre no marítima ho Indonézia**, nune'e mós oinsá implementa Tratadu kona-ba Fronteira Marítima entre Timor-Leste ho Austrália, iha Tasi Timor, ne'ebé ezekusaun ba projetu Tasi Mane iha relasaun ne'ebé boot tebes.

Hodi haree katak Tratadu entre Timor-Leste ho Austrália, kona-ba aleinde delimitasaun fronteira marítima, estatutu jurídiku ba kampu gás Greater Sunrise nian no estabelesimentu rejime espesial ida ba dezvoltimentu rekursu hirak-ne'e no fahe reseita ne'ebé sei mai, ami sei kontinua defende opsaun kadoras mai ita-nia Rain, hodi implementa vizaun husi ita-nia povu, ne'ebé hakerek ona iha Planu Estratéjiku Dezenvolvimentu 2011-2030.

Ami iha konviksaun katak susesu Timor-Leste nian, nu'udar Estadu no nu'udar Nasaun, depende ba konjuntura demokrátika no polítika iha tinan hirak mai ne'e, iha ne'ebé Estadu timorensa sei iha estrutura ne'ebé di'ak liután no sei konsolida-an nu'udar Estadu modernu ida, iha ne'ebé ema hotu-hotu rekoñese *primado do Direito* (katak, lei mak aas liu) no iha ne'ebé iha responsabilizasaun (husu responsabilidade) no iha responsabilidade (ema ida-idak simu ninian) husi forsas vivas (komponente, sosiál, polítika, ekonómika) tomak iha sosiedade laran.

Lihosi de'it konsolidasaun ba konsiénsia atu defende interese nasional sira, kompromisu ba pás no demokrasia, mak sei bele atua ho hamutuk atu redús moris-ki'ak ne'ebé makaas tebes iha País ne'e, hamenus dezigualdade no asimetria (diferensa) rejional sira no atu reforsa soberania nasional. Nune'e, Governu sei husu instituisaun pública sira seluk no atór sosiál nasional sira atu partisipa iha prosesu ida ne'e, hodi bele konsilia (tau hamutuk) vizaun kona-ba dezvoltimentu ne'ebé hotu-hotu iha laran, tuir rekizitu (norma) konstitusionál.

Nune'e, IX Governu Konstitusionál kompromete mós atu halo Revizaun ida ne'ebé di'ak no loos ba Planu Estratéjiku Dezenvolvimentu, ho konsulta permanente ho Sosiedade Sivil, hodi atualiza planu anteriór no hodi reflète situaasaun atual Nasaun nian no mudansa ne'ebé mosu hela iha ita-nia rain laran no iha mundu, nune'e mós atu hatudu vantajen kompetitiva sira Nasaun nian, iha dezvoltimentu setór estratéjiku sira ne'ebé temi ona, tamba setór sira ne'e mak sei lori ba progresu ne'ebé efetu.

Programa Governu nian, ba Lejislatura 2023-2028, ne'ebé apresenta daudauk ba Distintu Deputadu sira iha Parlamento Nasionál, rezume polítika públicas prinsipál sira ne'ebé atu haktuir hodi reforsa no halo di'ak liután setór governasaun nian sira no rekursus ne'ebé sei uza, hodi habadak dalan ne'ebé trasa ona hodi nune'e bele transforma Vizaun ba 2030 iha realidade.





Ikus liu, dokumentu ida ne'e reprezenta kompromisu sira lubun ida ho sosiedade timorense, ne'ebé hotu-hotu bele haree tuir ka fiskaliza, kompromisu ba dezvoltimentu nasionál no ba progresu no moris-di'ak timoroan hotu-hotu, liuhusi mós partisipasaun husi timoroan hotu-hotu.

### 1.1. Vizaun Jerál

Programa IX Governu nian atu haktuir polítika ne'ebé implementa ona ho susesu (iha mandatu IV, V no VI Governu), tamba objetivu no prioridade sentrá Governu ida ne'e nian, maka atu kontinua progresu ne'ebé iha daudauk kona-ba dezvoltimentu ekonómiku, sosiál no polítiku.

Tamba ne'e, Governu halo análize séria ida kona-ba situaun interna País nian – situaun Nasaun nian – atu bele buka no hetan estratéjia ne'ebé di'ak liu atu implementa iha tinan liman oin mai.

Nune'e, importante atu lembra fali pasadu ne'ebé resente no sintetiza *ponto de situação* (avalia evolusaun hosi situaun) interna iha País:

1. Ajenda 2030 Nasoens Unidas nian, aprova ona iha 2015, rekoñese katak, se laiha pás, laiha justisa no laiha instituisaun forte no efikás, difisil tebetebes ba País ida atu implementa Objetivu sira seluk ba Dezvoltimentu Sustentável.
2. Kompromisu ida-ne'e hetan apoiu boot husi Timor-Leste, tamba VI Governu, iha fulan-maiu tinan 2017, organiza Konferénsia Globál ida kona-ba 'Roteiru ba Implementasaun Ajenda 2030 no Objetivu Dezvoltimentu Sustentável'. Timor-Leste define klaru ona nia dalan atu la'ó ba Objetivu Dezvoltimentu Sustentável no, haree mós ba kontektu nasionál, aliña objetivu sira ne'e ho Planu Estratéjiku Dezvoltimentu 2011-2030.
3. Kaer mós ba prinsípiu transparénsia, Timor-Leste adota medida ida, iha ne'ebé Parseiru Dezvoltimentu sira la'ós de'it tenke respeita sistema ne'ebé ita estabelese ona, maibé mós tenke, tinan-tinan, apresenta relatóriu kona-ba oinsá sira uza osan ne'ebé sira-nia Governu fó liuhusi sira. Ho nune'e, aprova tiha Polítika Jestaun kona-ba Efikásia husi Ajuda Esterna, ne'ebé define oinsá apoiu internasionál ba dezvoltimentu bele fó mai Timor-Leste, hodi garante katak, atu hala'ó apoiu ne'e, tenke aliña ho programa sira Governu nian no atu garante promove responsabilidade husi parte rua (doadór no benefisiáriu), sempre ho hanoin kona-ba hetan rezultadu ne'ebé bele hadi'a povu nia moris.
4. La'ós de'it husi susesu ne'ebé ita alkansa iha pás, estabilidade no kreximentu ekonómiku, iha tempu ne'ebé badak, maibé liu mós husi asaun ne'ebé hala'ó iha grupu g7+ no





partisipasaun iha forun internasionál oioin – hodi fahe esperiênsia husi konfliktu ba reziliênsia no promove agenda pás iha mundu no rekonsiliaun – Timor-Leste, iha nivel mundiál, konsideradu kazu susesu ida, no ho nune'e kapitaliza ninia prezensa iha palku internasionál. **Infelizmente estagnasaun ne'ebé ita sofre durante tinan 6, husi 2017 to'o 2023, no liuliu violasaun sistemátika ba sistema n ba lei sira, lori Timor-Leste ba situaun ne'ebé presiza halo rekuperasaun ba ninia imajen internasionál.**

5. Ita buka no esforsa-an atu konsolida hela ita-nia demokrasia, tinan ba tinan. Timor-Leste, konsideradu País ne'ebé demokrátiku liu iha Sudeste Aziátiku, tuir avaliasaun independente husi 'The Economist', kona-ba 'índise Demokrasia'. Estudu ida-ne'e publika iha tinan 2017, hodi haree ba prosesu eleitorál, pluralizmu, liberdade no garantia sira, partisipasaun polítika, kultura polítika no funksionamentu instituisoens Timor-Leste nian. **Eleisaun Parlamentár ne'ebé ita foin daudaun realiza, mai konfirma susesu polítiku ida-ne'e, iha nivel rejionál no internasionál.**

## 1.2. Senáriu Atual

1. Iha tinan 2022, populasaun total Timor-Leste nian to'o ona abitantes 1.341.737, ho kreximentu anuál ida besik 1,8%. Husi abitantes ne'e, 48,7% % ninia idade menus de 20 anos. 48,7% husi abitantes ne'e maka fetu sira no 75,8% husi abitantes ne'e mak hela iha Munisípiu sira seluk no la hela iha Dili.
2. Ekonomia Timor-Leste nian, husi 2017 to'o 2021, hetan kontrasun ekonómika média ho valór -1,4%. Iha 2021, PIB naun-petrolíferu hetan valor 1.528 milloens dólares (ne'ebé korresponde ba kreximentu ho valór 2,9%), no PIB *Per Capita* hetan valór 1.136,00 dólares, (valór ne'ebé tun, iha tinan 5 nia laran, husi 1.285,30 dólares ne'ebé ita hetan iha tinan 2017).
3. Iha tinan 2022, PIB devia sa'e 3,9% no, iha tinan 2023, devia hetan aumentu ho valór 2,9%. Infelizmente, kreximentu ne'e la halo ho sustentabilidade tanba barak depende de'it ba subsidiasaun ba ekonomia. Governu IX sei kontinua servisu atu aumenta PIB ho sustentabilidade, liuhusi despeza públika iha investimentu estratéjiku.
4. Relasiona ho índise sira kona-ba pobreza iha Timor-Leste, hetan aumentu makaas, hosi tinan 2001 to'o 2007, hosi 36,3% to'o 50,4%. Hafoin períodu ida ne'e, nivel moris-kiak diminui ona ho forma konsistente, hosi 50,4% iha tinan 2007 to'o 41,8% iha tinan 2014. Valór ida ne'ebé tun ho forma signifikante liu karik ita uza Indikadór Internasionál kona-





ba Pobreza (1,9 dólares amerikanus loron ida), husi ne'ebé bele hetan ka haree katak pobreza extrema (ka mukit) tun, husi 47,2% iha 2007, to'o 30,3% iha 2014 (redusaun ida ne'e ita mai hamutuk ho melloria sira seluk iha padroens moris nian, hanesan aumentu iha asesu ba eletrisidade, qualidade iha abitasaun (ka uma) no kbiit atu hetan osan no sasán (propriedade de ativos). Desde 2014 to'o agora, la iha atualizasaun ba índise pobreza nian. Governu IX iha objetivu atu halo peskizas no estudus ne'ebé presiza, iha kedas 2024, hodi atualiza índise ne'e.

5. Níveis konsumu privadu mós hatudu kreximentu ekonomia no redusaun pobreza nian ne'e, husi Independénsia to'o agora, no, tuir dadus ekonómikus husi Konta Nasionál, entre 2007 no 2014, famílias timorenses mak sai responsavel ba aumentu konsumu privado to'o kedas 63,3%. Iha tinan 2021, kontribuisaun konsumu setór privadu nian ba kreximentu ekonomia ninia valór maka 65,1% .
6. Iha tinan 2020, konstrusaun, nu'udar indikadór ida ba dinámika ekonómika, rejista ona área total ba konstrusaun ne'ebé atu halo ho valór 2.105.668 m<sup>2</sup>, ne'ebé korresponde ba 17 lisensas ne'ebé fó ona, no valor osan ne'ebé prevee 900,2 milloens de dólares. Kompara ho tinan 2016, área ba konstrusaun prevista maka 92.814 m<sup>2</sup>, ho total lisensas 46 ne'ebé fó ona, no valór total previstu maka 37.716 milloes de dólares.
7. Kona-ba akizisaun transporte rasik, iha 2020, rejista kompra (ka sosa) 20.032 veíkulus, no husi total ne'e, 83,9% ba motorizadas, 13% ba veíkulus lijeirus pasajeirus (karreta), 0,2% veíkulus lijeirus atu tula karga (ka sasán) no 1,9% ba veikulus pesados (karreta boot).
8. Timor-Leste kontinua mosu hamutuk ho **Países Menus Avansadus 46** (PMA), ne'ebé identifikadus iha Relatório Konferénsia Nasoens Unidas nian kona-ba Komérsiu no Dezenvolvimentu (CNUCD). Ho ekonomia ida ne'ebé dependente tebetebes ba políticas no programas despesa pública nian, falta de diversifikasaun ne'ebé konsistente ba ekonomia, ne'ebé bele dudu kreximentu ekonómiku ida ne'ebé lidera husi setór privadu, mak sai nu'udar obstákulu ba dezenvolvimentu sustentável no ba dependénsia menór ba reseitas petróleu nian.
9. Tuir dadus husi Peskiza Forsa Traballu, iha tinan 2021, 62,9% populasaun timorense iha hela idade ativa (katak, bele servisu), maibé husi populasaun ida ne'e, 30,5% de'it maka integra iha forsa traballu (esklui agrikultura subsisténsia). Husi sira ne'ebé integra iha forsa traballu, la to'o 25% mak hetan empregu formál, ne'e katak kumpre Lei Laborál, no sira seluk iha empregu naun-formál ka nu'udar traballadores independentes (ka servisu ba an rasik).





10. Kréditu ba setór privadu, ne'ebé estagna (la la'o) tiha iha tinan 2019 no tun 10% iha tinan 2020, hahú rekupera fali, ho aumentu ho valór 11,6% iha tinan 2021 no ho valór 17,2% iha tinan 2022. Keda (tun) husi kréditu ba setór privadu ne'ebé verifika akontese tanba kontrasaun ekonómika, maibé iha tinan rua ikus ne'e, filafali ba kreximentu.
11. Índise Presus ba Konsumidór (IPC), ne'ebé tun beibeik husi 2011, hodi atinje dezvalorizasaun ho valór 1,5%, iha tinan 2016, rejista inflasaun ida ne'ebé pozitiva ho valór 3,8% iha 2021 no 7,2% iha 2022. Tuir previzaun, iha tinan 2023, Índise Presus ba Konsumidór ninia valór maka 5,5%, no iha 2024, atinje 3,3%.
12. Timor-Leste investe hela ninia reseitas, ne'ebé mai husi rekursus naturais, iha fundu rikeza soberanu, Fundu Petrolíferu ka Fundu Mina-rai, tuir prinsípios transparénsia no boa governasaun, no iha obrigasaun atu hasai de'it montantes limitadus, atu finansia prioridades estratéjikas nasionais iha Orsamentu Jerál Estadu, hanesan infraestruturas, edukasaun no saúde.
13. Fundu ida ne'e, ne'ebé estabelese iha tinan 2005, ho saldo abertura nian ho valór 204,6 milloens de dólares, sai nu'udar instrumentu ida ba polítika fiskál ne'ebé di'ak, hodi haree no sukat didi'ak interesses timoroan hotu nian, ba longo prazu, tamba montante ne'ebé bele hasai, reguladu husi Rendimentu Sustentável Estimadu (RSE), ne'ebé to'o de'it 3% husi total rikeza petrolífera. Objetivu RSE nian mak atu kontrola gastus ba rendimentus petrolíferus, ne'ebé por enkuantu aas hela, no tahan impactu husi presu mina-rai ne'ebé volátil (ka sa'e-tun) no salvaguarda uzu sustentável iha finansas públikas.
14. Bainhira altera Lei Fundu Petrolíferu, iha tinan 2011, haoin prosesu rigorozu no partisipativu ida, define ona alokasaun ida pelumenus 50%, iha Titulos Públikus, to'o 50% iha asoens no no to'o 5% iha mekanizmus alternativus. Estratéjia diversifikasaun Fundu Petrolíferu ida- ne'e, prova duni katak forte no positiva, hodi proporsiona retornus ne'ebé maka'as. Tuir Banku Mundiál, Fundu ne'e, ne'ebé afeta husi reseitas petróleu nian (ne'ebé dala ruma sa'e, dala ruma tun), husi retornus ne'ebé hetan husi investimentu líkidu, no mós husi levantamentus (osan ne'ebé hasai, tuir orsamentu Estadu), ninia valór, iha loron 31 fulan-maiu tinan 2023, maka dolar amerikanu millaun rihun 17.9 (17.9 mil milhões de dólares americanos).
15. Kona ba investimentu husi Fundu Petrolíferu ne'ebé realiza ona, to'o agora rejista ona retornu pozitivu hamutuk dolar amerikanu millaun rihun 8.1 (8,1 mil milhões de dólares americanos), (no husi valór ida ne'e, dolar amerikanu millaun rihun 7.5 (7,5 mil milhões de dólares americanos) rejista ona depoizde alterasaun ba polítika investimentu nian ne'ebé





aprova ona iha tinan 2011). Iha tinan 2022, rejista ona perda boot liu ida iha istória investimentu Fundu nian, ho valor dolar amerikanu rihun 2.1 (2,1 mil milhões de dólares), maibé iha tinan 2023, situasaun nian ne'e muda ona, ho retornu pozitivu hamutuk dolar amerikanu millaun 726,5 to'o remata fulan Maiu.

16. Kona-ba mós dezenvolvimentu setór petrolíferu, importante atu relembra katak, iha 2007, Timor-Leste tama iha Inisiativa da Transparénsia Indústrias Extrativas (ITIE), no katak, iha de'it tinan 10 Ukun-An, dezenvolve kedas Sistema ho klase mundiál atu jere reseitas, no sai, iha Jullu 2010, primeiru País husi Ásia-Pasífiku no terseiru País husi Mundu tomak, ne'ebé hetan estatutu katak hala'o tuir duni ITIE, iha divulgasaun no transparénsia reseitas petróleo no gás.
17. Iha 2002, primeiru Orsamentu Jerál do Estadu ninia valór maka 75,7 milloens dólares, husi ajuda internasionál. Iha 2022, OJE sa'e ba dolar amerikanu 2.155,7 (2 mil, 155 milhões e 400 mil dólares). Kreximentu ne'ebé signifikativu (ka boot) iha despesa pública ezije ba Governu atu dezenvolve sistema ida kona-ba jestaun ba finansas públicas, ne'ebé efisiente, responsável no transparente. Nune'e, reformas lubuk ida hahú ona iha Ministériu Finanzas no iha ministérius seluk, hodi hetan profesionalizmu boot liu. Reformas ne'e permite atu hadi'a jestaun no ezekusaun finanseira no prestasaun servisu.
18. Transferénsias husi Fundu Petrolíferu finansia maioria husi despeza pública iha Timor-Leste, no dezde tinan 2009 Governu halo levantamento anual husi Fundu superior ba 3% husi Rendimentu Sustentável Estimadu (RSE). Dependénsia ba Fundu Petrolíferu ne'e de'it akontese tanba rekolla reseitas doméstikas sei kiik nafatin (menus husi 12% PIB). Governu IX komprometidu atu kontinua reforma ba jestaun finansas públicas hodi bele diversifika reseitas no rasionaliza despesas, hodi promove sustentabilidade fiskál.
19. Hodi bele assegura di'ak liután jestaun ba rekursus, Governu, iha 2008, kria Autoridade Nasionál Petróleu (ANP), ne'ebé transforma, iha 2016, ba Autoridade Nasionál Petróleo no Minerais (ANPM), nu'udar instituisaun pública ne'ebé responsável ba jestaun no regulasaun ba atividades petrolíferas no esplorasau mineira iha Timor-Leste nia laran, tanto iha tasi (*offshore*) komu iha rai-laran (*onshore*), no iha Área Konjunta Dezenvolvimentu Petrolíferu (ACDP), hanesan ne'ebé hatuur molok iha tinan 2018. Atu maximiza partisipasaun Timor-Leste nian iha dezenvolvimentu setór petrolíferu, Governu kria mós, iha 2011, kompañia nasional petróleo, ho naran TIMOR GAP E.P. (GAP, katak: Gás no Petróleu).





20. Kriasaun Institutu Petróleu no Jeolojia (IPG), iha 2012, no empreza Kompañia Mineira Nasionál Timor-Leste, iha 2022, nina objetivu mak atu dezenvolve estudus jeolójikus no defende interesses Estadu nian iha atividades esplorasau ba rekursus minerais país nian.
21. Ho senário ida ne'ebé réal kona-ba situasaun sosioekonómika país nian, Governu Konstitusionál IX assume, hanesan prioridade número um, maka kriasaun empregu. Ba ida ne'e, Governu kompromete atu kria kondisoens hotu ne'ebé bele atu hatuur no haburas diversifikasaun ekonómika, iha áreas produtivas, hanesan agrikultura, pekuária, peskas, florestas no turizmu, aleinde setór indústriá nian. Ba ida ne'e, kriasaun Banku Dezenvolvimentu ida ne'ebé loke ba investimentu estranjeiru, ninia objetivu mak atu fó liña de kréditu ba empresas nasionais, atu bele inisia (ka hahú), ho konfiansa, partisipasaun ne'ebé ativa no efetiva iha kreximentu ekonómiku Pais nian.
22. Banku Dezenvolvimentu Nasionál (BDN) sei iha mós knaar sentrá ba iha jestaun Fundu Veteranus no Fundu Seguransa Sosiál, atu bele garante sustentabilidade iha futuru ba Fundus ne'e, kona-ba uza didi'ak Fundu Veteranus no mós atu imprime (ka kuda metin) serteza ne'ebé boot iha jestaun ba reformas, hodi liberta Estadu husi obrigasaun finanseira anuál.





## **2. KONTINUA HO DEZENVOLVIMENTU HUSI KAPITÁL SOSIÁL**

“Rikeza ka rikusoin Nasaun ida nian mak povu nia forsa ka kbiit rasik. Dezenvolvimentu másimu iha Saúde, Edukasaun ho kualidade moris povu timor tomak nian, ne’e esensial tebes atu bele harii metin Nasaun ida ne’ebé justa no dezenvolvida”.

Dezenvolvimentu ekonómiku Timor-Leste nian hanesan objetivu nasional ida ne’ebé depende maka’as tebes ba kapasitasaun, saúde ho kualifikasaun husi nia forsa de traballu. Investe iha kapital umanu, ne’e hanesan estratéjia fundamentál ida, hodi permite dezenvolvimentu ne’ebé sustentável no mós kria kondisoens ba inkluziun ne’ebé boot liu, bein-estár ka moris di’ak no ho dignidade iha sosiedade timor laran.

Sosiedade ne’ebé kulturálmente demokratika no dezenvolvida, mak ida ne’ebé la husik hela ema ida ba kotuk, hodi buka no investe maka’as iha grupus ne’ebé frájeis no vulneráveis liu, no asume (ka simu) papel fundamentál fetu, jovens ho idozus nian ba dezenvolvimentu sustentável, hodi rekoñese mos, la’os de’it sira-nia direitus tuir Konstituisaun, maibé hanesan iha kazu kona-ba fetonia direitus, promove igualdade no transversalidade jéneru iha momentus hotu-hotu politikus, sosiais no ekonomikus País nian tomak no iha ninia instituisoens hotu-hotu.

### **2.1. Edukasaun no Formasaun**

Halakon obstákulus iha asesu ba edukasaun no asegura atu labarik no foin sa’e sira bele hetan asesu ba edukasaun ida ho kualidade, la haree ba kondisaun ekonómika no sosial no mós fatin iha ne’ebé sira horik ba - sai nu’udar estratéjia prioritária ba Governu. Asesu ba Edukasaun, ho kualidade, labele sai de’it privilégio ba ema balun, maibé, pelu kontráriu, edukasaun prezisa sai nu’udar instrumentu inkluzivu ida ne’ebé bele hamenus diferensas, iha oportunidades socio-ekonómikas, hodi promove dezenvolvimentu ekuitativu (ka, hanesan) iha ita-nia Nasaun.

Edukasaun sai nu’udar direitu fundamentál ida ba sidadauns no sai instrumentu importante ba dezenvolvimentu sosial no ekonómiku, nune’e mós atu kria sosiedade ida ne’ebé saudável no próspera.

Iha tinan 2028, Timor Leste hakarak atu atinje edukasaun ida ne’ebé ho kualidade di’ak liu, ho oportunidade boot iha asesu ba ema hotu, hodi sai edukasaun ida ne’ebé bele hatán lolós ba nesidades merkadu-de-traballu nian, kontribui hodi hamenus dezempregu, liu husi aprendizajen iha moris tomak (aprendizajen ao longo da vida), no, liuliu, atu hakotu tiha sírkulu







visiozu iha kiak ne'ebé mai husi jersaun ba jersaun (interjersional). Edukasaun ida ne'ebé atu atinje, mak sei promove aprendizajen ida ne'ebé serve hanesan baze, atu sidadauns bele ativus iha partisipasaun ba dezvoltamentu sustentável, iha konsolidasaun ba Nasaun no, nune'e mós, atu sidadauns bele aplika sira-nia potencialidade no sira-nia kreatividade umana ne'ebé favorese ba inovasaun.

Atu atinje rezultadus ne'e, programa IX Governu Konstitusionál iha área Edukasaun, refleto (ka hatudu) programa ida koerente no integradu. Liu husi programa ida ne'e, hakarak afirma katak dalan lós atu alkansa rezultadus ne'ebé ita hein ho forma sustentável, maka liu husi partisipasaun permanente husi comunidade edukativa no kontribuisaun ativa husi entidades oioin, públicas no privadas (inklui mos sociedade sivíl no setór privadu) ho baze iha sistema koordenaun ida ne'ebé firme. No mós, liu husi programa ida ne'e, sei promove definisaun no implementasaun ba intervensoens edukativas, ne'ebé bazeia ba evidências científicas no konkretas nune'e mós ba estudus rigorozus, ho qualidade.

Nune'e, Governu sei hadi'a qualidade Edukasaun no formasaun profesionál, hodi asegura asesu ne'ebé hanesan ba populaun timoroan tomak, iha áreas Ensinu hotu-hotu. Ba ne'e, Governu sei:

- i. Reforma jestaun no administrasaun iha sistema edukativu, iha nível Ministériu Edukasaun, Munisipál no mós iha eskolas, inklui definisaun ba prosedimentus ne'ebé adekuadus no ba sistemas monitorizasaun no avaliaun;
- ii. Haforsa kondisoens atu labarik sira, ho tinan entre tolu to'o lima, bele hetan asesu ba preparasaun hodi tama ba ensinu báziku obrigatóriu, inklui edukasaun pré-eskolár no programa sira seluk ba dezvoltamentu iha primeira infánsia (DPI) no ba preparasaun hodi tama ba ensinu báziku, iha eskolas ne'ebé besik ba sira-nia hela-fatin. Asegura mos, partisipasaun efetiva husi comunidade edukativa;
- iii. Hahú programa tutoria ida ho dozajen ne'ebé aas no intervensoens seluk ne'ebé oferese edukasaun ida ne'ebé asesivel no rekupera aprendizajen, liuliu iha área remota sira no eskola sira iha ne'ebé identifika alunu sira ne'ebé lakon aprendizajen tanba COVID-19;
- iv. Haforsa (ka hametin) kondisoens hodi implementa ensinu báziku ne'ebé universál, obrigatóriu no gratuitu, ho qualidade ne'ebé di'ak duni. Ensinu Báziku sei sai nu'udar sentru ida hodi aprende atu koñese, aprende atu halo, aprende atu moris ho ema seluk no mós aprende atu forma nia an rasik. Iha idade ho tinan neen, labarik hotu-hotu sei hetan asesu ba Ensinu Báziku ida ho qualidade, ho akizisaun ba kompetências ne'ebé maka'as iha matemátika no iha literasia, iha lian (ka, línguas) oficiais (portugés no tetun), ho mós





kompeténsia bázika iha lian inglés, hanesan lian estrangeiru, nune'e mós kompeténsia iha valores fundamentais husi identidade nasionál, husi istória no husi kultura timor-nian, no mós dezvoltimentu ba abilidade iha sékulu XXI;

- v. Reforsa kondisoens ba Ensinu Sekundáriu ida, iha ne'ebé estudantes bele hetan asesu ba koñesimentus sientífikus, umanístikus no mós téknikus. Alunus sei aprende atu aplika koñesimentus hirak ne'e, iha setores produtivus país nian, hodi prepara sira atu tama ba merkadu de traballu ka atu kontinua sira-nia estudus superiores, universitáriuus ka politéknikus. Governu sei kontinua fó opsaun rua: Ensinu Sekundáriu Jerál ka Ensinu Sekundáriu Tekniku-Vokasional;
- vi. Asegura atu estudantes ne'ebé tama iha Ensinu Superiór, bele prontu atu fó resposta ne'ebé los liu, iha merkadu de traballu, hodi asegura asesu ne'ebé hanesan ba ema hotu no haforsa **mekanizmus akreditasaun nian no avaliasaun ba qualidade iha nível ensinu ida ne'e**;
- vii. Reforsa oportunidade ba hirak ne'ebé hakarak estuda no hakle'an sira-nia koñesimentus, liuliu sira ne'ebé vulneráveis liu, no sira ne'ebé hasoru dezafius boot, liuhusi programa edukativu ne'ebé atraente no flexível, bazeia ba metodolojia ne'ebé ho qualidade ba ensinu ba ema adultus;
- viii. Moderniza no hodi assegura importansia ne'ebé boot, iha esforsus ba formasaun profesionál kontínua, hodi haforsa padroens efetividade ne'ebé tenke di'ak, hanesan mentoría no akompañamentu, no uza informátika no teknolojia ba informasaun, materiál multimédia no aprendizajen 'à distánsia' (ka, husi dok) atu assegura dosentes ho qualidade, preparadus atu forma futuru Timor-Leste nian;
- ix. Kontinua dezvoltolve rekursus umanus nasionais, liu husi programas, estratéjias no investimentus plurianuais. Fundu Dezvoltimentu Kapítal Umanu sei kontinua kontribui ba dezvoltimento iha Edukasaun no Formasaun Profisionál ba foin-sa'e no adultus, ho forma ne'ebé transparente no koordinadu, no ho baze iha identifikaun ba áreas koñesimentu no habilidades ne'ebé sei falta liu;
- x. Konsolida Komisaun Nasionál Edukasaun (CNE), nu'udar mekanizmu ba promosaun diálogu inkluzivu no partisipativu, entre partes interessadas iha setór edukativu, no koordinasaun ne'ebé di'ak entre Ministériu Edukasaun ho sosiedade sivíl no setór privadu no mós ho parseirus dezvoltimentu nasionais no internasionais;
- xi. Hakle'an programa iha edukasaun inkluziva, hodi promove kultura kona-ba respeito ba diversidade, hodi rekoñese talentus oioin no mós kapasidades oioin, husi ema hotu, atu





nune'e bele promove susesu ba alunus no, efetivamente, possibilita sira atu hetan futuru hanesan sidadauns ne'ebé hetan respeito husi comunidade tomak, no aseguira edukasaun ne'ebé orienta liu ba alunu, nu'udar realidade loron-loron, ne'e hotu nu'udar prinsípiu-xave ba polítika edukativa;

- xii. Reforsa programa sira ne'ebé aseguira igualdade ba labarik sira ne'ebé la iha kondisaun ekonómika, liuhosi programa alimentasaun eskolár no subsidiu eskolár ne'ebé ninia rekursu sira distribui ho justu, no garante katak eskola sira ne'ebé tebes iha área rural sira hetan facilidade no rekursu sira ne'ebé nesesita;
- xiii. Kria planu mestre ba infraestruturas Ministériu Edukasaun nian, inklui eskola sira husi nivel hotu-hotu no edifísiu administrativu sira, bazeia ba sensu infraestruturas hodi rezolve problema sira ne'ebé sai hanesan obstákulu ba dezentvolvimentu edukasaun nian;
- xiv. Konsolida Lian Tetun hodi garante padraun ida ba nia uzu, no promove nia uzu iha estabelesimentu ensinu sira, iha áreas oin-oin governu nian, iha média no ba populasaun hotu. Nune'e, Governu kompromete atu haka'as liután iha implementasaun Planu Estratéjiku Nasionál Edukasaun (2011-2030), atu nune'e bele alkansa metas hirak tuir mai, iha tinan lima oin mai;
- xv. Halo estudu no avaliaun finanseira ne'ebé prezisa hodi hahú prosesu atu loke eskola CAFÉ sira iha Postos Administrativos, atu promove dí'ak liu koñesimentu ba Língua portuguesa, liu husi kualifikasaun ba professores timorenses.

### 2.1.1. Ensinu Pré-Eskolár

- Pelu menus 60% husi labarik, ho tinan entre 3 to'o 5, sei benefisia ba Edukasaun Pré-Eskolár ka programa preparasaun ba Ensinu Báziku obrigatóriu, ho atensaun espesial ba comunidades rurais, atu nune'e labarik sira bele partisipa neineik iha edukasaun pré-eskolár ho 100%;
- Implementa ho kompletu, Kurrikulu Nasionál de Baze no programas ba orientasaun pedagójika, relasiona ho edukasaun pré-eskolár;
- Garante asesu ba materiál didátiku, nune'e mós livru istória sira iha lian ofisial no nasional sira, hodi nune'e bele apoia implementasaun efetiva ba Kurrikulu Nasionál Baze no promove dezentvolvimentu ba kapasidade fundamentál leitura nian;





- Define sistema administrasaun no jestaun ba estabelesimentus pré-eskolares, adekuaudu ba realidade nasionál, ne'ebé bele asegura efetividade iha prosesu ensino-aprendizajen no maximiza rekursus umanus no finanseirus, hodi loke liután asesu husi pré-eskolas ba insentivus finanseirus públikus;
- Assegura konstrusaun ka rehabilitasaun, iha minimu, facilidades 100, hodi uza ba edukasaun pre-eskolár, ne'ebé kompletas ho rekursus umanus, ekipamentus no materiál didátiku;
- Garante katak 100% edukadór sira hosi edukasaun pré-eskolár iha kualifikasaun mínima ne'ebé lei ezije;
- Kontinua ofereze dezentvolvimentu profisionál ba profesór sira tuir kompeténsia ne'ebé indika ona iha Kuadru Kurrikulár ba Formasaun edukadór hosi edukasaun pré-eskolár;
- Ofereze formasaun completa ba inan-aman hosi edukasaun pré-eskolár atu bele sai parseiru ne'ebé di'ak tebes iha aprendizajen oan sira nian;
- Promove partisipasaun hosi labarik sira ho nesesidade edukativa espesial iha prosesu ensinu no aprendizajen liuhosi introdusaun modifikasoens no akomodasoens ne'ebé prezisa iha estabelesimentu edukasaun pré-eskolár hotu-hotu.

### 2.1.2. Ensinu Báziku

- Aumenta ba 95%, taxa líkida iha matríkula;
- Aumenta taxa aprovasaun, iha etapa final ensin u báziku, ba pelu menus 85%;
- Hamenus rásiu husi alunus iha sala laran, ba média nasionál, profesor 1 ba alunus 35, liuhusi konstrusaun, pelu menus, 1.050 salas foun;
- Asegura iha mínimo, aumentu ba 30% ba kapasidade literasia husi alunus, ne'ebé iha ona fin 2º anu escolar, kapasidade ne'ebé sei sukat ho baze husi avaliasaun, tuir padraun internasionál;
- Asegura katak Eskolas Bázikas Sentrais Públikas hotu-hotu sei hetan instalasaun bee no saneamentu, no bibliotekas ho kondisoens atu uza, no mós aumenta ba 50% número eskolas ne'ebé hetan ona asesu ba instalasoens laboratoriais nian;
- Kria fundu ida, atu fó resposta ba situasoens emerjensia, ne'ebé bele tau-em-risku seguransa no saúde alunus no professores nian;





- Implementa, ho kompletu, Kurríkulu Nasionál de Baze, no ninia programas ba orientasaun pedagójika;
- Dezenvolve no implementa medidas pedagójikas, ne'ebé adekuadas, hodi asegura ensinu ida ho qualidade, iha áreas rurais, inklui formasaun espesial no apoiu ba profesór sira iha sala multimedia;
- Halo revizaun ba Kurrikulu Nasionál ba 3º siklu do Ensinu Baziku, hodi aprova lejislasaun relevante no orientasoens pedagójikas ba kurríkulu ida ne'ebé dezenvolve kompeténsia sira hosi sékulu XXI;
- Konsolida atividades ne'ebé hariku kurríkulu, inklui programa “Horta Pedagójika”, no kria programas foun ne'ebé estimula kompetensias kulturais, artístikas no desportivas, iha eskolas tomak iha ensinu báziku; ba kurríkulu ida ne'ebé aliña ho norma sira sékulu XXI nian;
- Garante atu alunos no professores tomak bele iha asesu ba livrus no materiais eskolares, ne'ebé relevantes no ho qualidade, hodi promove mos uzu ba Teknolojia husi Informasaun no Komunikasaun (TIC);
- Hamosu programas televisivus lubuk ida no vídeos, hodi apoia prosesu ensinu-aprendizajen;
- Define no implementa programas de excelénsia, liuhusi prosesu partilla (ka fahe ba malu) padroens-modelu atu potencializa asesu ba práttikas ho qualidade iha estabelesimentus eskolares públikus, ne'ebé presiza liu, liuhusi utiliza Centro de Aprendizajen e Formação Escolar (CAFE), no eskolas ne'ebé identifika ona, hanesan rekursu;
- Aprofunda jestaun demokrátika iha eskolas, liuhusi medidas ne'ebé haforsa partisipasaun inan-aman no alunos;
- Reforsa implementasaun konteúdu kurríkulu nian iha matéria formasaun kona-ba valores sívikus, igualdade de jéneru no respeito ba diversidade;
- Garante katak profesór hotu-hotu hosi Ensinu Báziku iha abilidade profesionál no koñesimentu hosi sékulu XXI no garante sira-nia asesu ba aprendizajen dijital;
- Promove partisipasaun labarik sira-nia ho nesesidade edukativa espesial iha prosesu ensinu no aprendizajen liuhosi introdusaun modifikasoens no akomodasoens ne'ebé presiza iha estabelesimentu edukasaun no ensinu hotu-hotu;





- Garante atribuisaun ba subsídiu eskolár sira hodi nune'e bele responde ho loloos nesesidade estudante sira nian, ho haree mós ba materiál no ekipamentu nesesáriu sira ba pedagogia ida ne'ebé moderna no igualdade ba labarik sira ne'ebé hela iha área remota sira;
- Loke oportunidade no apoia estudante sira hodi partisipa iha konkursu akadémiku nasional no internasionál sira;

### **2.1.3. Ensinu Sekundáriu Jerál no Tékniku Vokasionál**

- Atinje to'o 85%, taxa bruta ba matrikula, hodi loke tan número vagas ne'ebé nesesárias, iha eskolas foun no eskolas ne'ebé iha ona;
- Konstroi ka reabilita, pelumenus 300 salas de aula, liuhusi programa konstrusaun no reabilitasaun eskolas foun no sala de aulas ba Ensinu Sekundáriu;
- Asegura katak 100%, husi eskolas sekundárias públikas, bele hetan kondisoens tomak ne'ebé di'ak no prontas atu sai hanesan fatin ida ba aprendizajen ne'ebé adekuada, ho facilidades hanesan laboratóriu no biblioteca, iha ambiente ida ne'ebé seguru no respeitozu;
- Hahú implementa medidas atu halo avaliasaun, tuir padraun internasionál, atu sukat rezultadus husi aprendizajen (ex. Programa Avaliasaun Internasionál Estudantes - PISA), ne'ebé serve nu'udar baze ba reforsu ba qualidade iha nível ensinun ida ne'e, no sai mos nu'udar mekanizmu hodi sukat progresu ne'ebé iha;
- Haree hikas fali Kurrikulu Nasionál ba Ensinu Sekundáriu Jerál, atu promove adaptasaun ne'ebé di'ak-liu ba padroens rejionais no internasionais ba ensinun, no asegura adkire (ka hetan) kompeténsias prátikas no ba laboratóriu, kompeténsias kulturais, artistikas no desportivas, habilidades ba moris no kompeténsias transversais ba empreendedorismu;
- Haree hikas fali Kurrikulu Nasionál ba Ensinu Sekundáriu Tékniku-Vokasionál, atu promove ajustamentu di'ak-liu ba nesesidades husi merkadu, hanesan: agrikultura, indústria, mekánika, eletrónica, konstrusaun sivil, no prestasaun servisu ne'ebé vokasionadus (ka, iha tendénsia) ba artes, empresas, turizmu no restaurasaun, ho foku ba desenvolvimentu iha áreas rurais;
- Asegura asesu professores nian ba materiais pedagójikus, ne'ebé bele apoia implementasaun ba kurrikulu;





- Garante katak 100% husi professores, iha Ensinu Sekundáriu Jerál, iha kualifikasaun minima ne'ebé lei exije, liuhusi formasaun kontínua ba professores iha kurríkulus no iha programas orientasaun pedagójika nian;
- Uza informátika no teknolojias komunikasaun, hanesan instrumentu atu promove ensinua ida ne'ebé modernu no ho qualidade;
- Implementa programa akonsellamentu profesionál ida, hodi apoia alunus atu hili kursus ne'ebé sira hakarak hasai, iha Ensinu Superiór;
- Promove parcerias fortes ho entidades relevantes, inklui setór privadu, atu garante Ensinu Sekundáriu ne'ebé asesível no ho qualidade, inklui apoiu finanseiru no realizasaun estájius ba alunus, ne'ebé ajusta ho nesesidades merkadu nian;
- Defini no implementa programas de exelénsia, liuhusi prosesu partilla kona-ba padroens-modelu, atu potencializa asesu ba prátikas ne'ebé ho qualidade, ba estabelesimentus eskolares públikus ne'ebé presiza liu;
- Hadi'a jestaun Eskola Téknika Agrícola (ETA) ne'ebé eziste iha nasaun ne'e, (Lautein, Manatutu, Bobonaru no Oekusi Ambenu).

#### **2.1.4. Ensinu Rekorrente**

- Uza metodolojias atrativas no flexíveis, hodi aumenta taxa de aprovasaun no graduasaun ba programas Ensinu Rekorrente nian;
- Avalia no reforsa Sentrus Komunitáriu ba Aprendizajen, hodi promove liuliu katak Sentrus ne'e hetan partisipasaun, ne'ebé efetiva, husi sociedade sivíl no comunidade lokál, atu maximiza utilizasaun Sentrus ne'e ba atividades edukativas oioin iha comunidades nia let;
- Haforsa qualidade Ensinu Rekorrente, liuhusi asesu ba materiais didátikus ho konteúdu ne'ebé konkretus no fásil atu kompriende.
- Habelar Programa Ekivalénsia nian to'o Ensinu Sekundáriu, bazeia ba estudu viabilidade ida.
- Dezeña modalidade hosi ensinua rekorrente ne'ebé insentiva igualdade jéneru, hanesan kombinasan ba oportunidade ensinua rekorrente ho programa pré-eskolár sira.





### 2.1.1.5. Reforsu ba Koezaun Sosiál liuhusi Edukasaun

- Promove integrasaun ba modifikasoens físicas ne'ebé nesárias, iha instalasoens hotu-hotu ne'ebé foun ba Eskolas Públikas;
- Implementa sistema edukativu ida nu'udar reforsu, ho formasaun kle'an liu ba professores, hamutuk ho programa ba apoiu spesífiku iha eskolas públikas no privadas, ne'ebé oferese servisu edukativu espezializadu ida ba alunus ne'ebé ho necessidade edukativa espezializada, ba alunus ne'ebé iha nesidades edukativas espeziais, hodi permite katak eskolas ne'e bele servi populasaun di'ak liután;
- Tinan-tinan halo rastreiu (buka-hatene) vizaun no audisaun hosi alunu hotu-hotu, atu bele deteta problema sira ne'ebé bele rezolve liuhosi intervensaun *precoce* (molok to'o nia tempu) ida;
- Garante katak alunu hotu-hotu ho nesidade espezial iha oportunidade hodi hetan avaliaun, liuliu liuhosi ezame nasional, hodi utiliza modifikasaun no/ka adaptaun nesária sira ba alunu ida-idak;
- Oferese oportunidade ba formasaun avansada iha edukasaun espezial;
- Hahú programa ida ho “para-profisionál sira” atu alunu sira ne'ebé ho difikuldade aprendizajen bele hetan apoiu ida ne'ebé konsentradu liu iha aula;
- Assegura reforsu institusionál no tékniku ba Sentrus Rekursus ba Edukasaun Inkluziva, liuhusi análise rigoroza kona-ba nesidades;
- Promove alimentasaun ne'ebé nutritiva ba alunus, inklui hadia implementasaun programa Merenda Eskolár, hodi haforsa nia jestaun no efikásia, liuhusi mekanismus koordinasaun interministerial;
- Estabelese ligasaun ho Programa Saúde iha Família no ho programas relevantes seluk, hodi koordena apoiu ligadu ba saúde física no mental labarik sira, iha eskola ka iha lar (uma mahon), inklui sira ne'ebé iha problema psikolójiku, trauma no problemas saúde seluk-tan;
- Reforsa koordinasaun ho programa “Bolsa da Mãe”, hodi oferese mos asesu ba bolsas estudu ba alunus, ho nesidades edukativas espeziais;
- Kontinua reforsa qualidade de Ensino iha Institutos no Universidades, públikus no privadas;







- Promove medidas apoiu ba labarik sira ne'ebé laiha koñesimentu lian ofisiál ida, bainhira sira integra ba sistema edukativu, liuhusi kontinuasaun programa-pilotu EMBLI to'õ 6.º ano eskolár remata, hodi asegura reforsu ba formasaun espesifika kona-ba uza primeira língua hanesan ponte aprendizajen ba lian ofisiál sira;
- Dezenvolve programa atividades rekreativas no programas animasaun nian no inovasoens seluk-tan, hodi promove koñesimentu lian ofisiál ba labarik sira ne'ebé ho idade ki'ik;
- Elabora no implementa programa espesífiku ida, atu asegura inan-foin-sa'e sira kontinua hetan asesu ba edukasaun, iha kondisoens hanesan ema seluk;
- Dezenvolve programa ne'ebé enkoraja ema ho defisiénsia atu sira partisipa iha atividades profissionais, ne'ebé iha relevánsia boot ba dezvoltimentu nasionál, inklui mos hanesan professores;
- Hahú implementa programa transporte eskolár, ho métodos ne'ebé adekuadus ba realidade nasionál no partisipasaun ativa husi comunidade educativa;
- Aumenta persentajen professoras no feto iha kargus direasaun no xefia, iha entidades relevantes ba setór edukasaun, ho aumentu minimu 15%.

### **2.1.6. Jestaun no Kualidade Ensinu**

- Promove sistema ida rigorozu ba Avaliasaun do Ensinu no Jestaun no Akreditasaun ba Eskolas no implementa programas de kapasitasaun hodi bele halakon frakezas ne'ebé identifika ona;
- Promove no haforsa mekanizmu kontrolu ba número oras ensinu formál ba alunu ida-idak;
- Haforsa sistema rekursus umanus, iha estabelesimentus edukasaun no ensinu, ne'ebé bazeia ba méritu, profisionalizmu no kompeténsia, nune'e mós oferese insentivu, formasaun no kapasitasaun, no mós implementa avaliasaun ba dezenpeñu ho baze ba kualidade no progresaun iha karreira, hodi bele asegura valorizasaun iha profisaun ne'e;
- Implementa medidas ne'ebé bele adekua professores nia kualifikasaun ho sira-nia funsaun ne'ebé atu hala'o, no asegura katak sira kolokadus tuir nesesidade real;
- Asegura katak prosesu tomak ba planeamentu, nia finansiamentu no nia aprovizionamentu iha kualidade, no implementa asoens atu monitoriza nia efetividade, hodi utiliza dadus





Edukasaun nian no dadus kona-ba populasaun, hanesan ferramenta baze ba planeamentu, monitorizasaun no avaliasaun;

- Moderniza nívéis de Ensinu ne'ebé iha, liuhusi utilizaun teknolojia informátika iha administrasaun no jestaun eskolár no iha sistema informátiku ba jestaun eskolár;
- Haforsa kapasidade servisu munisipais nian, inklui mos, liu husi koordenaun efetiva ho prosesu desentralizasaun administrativa, formasaun ba jestaun no administrasaun no iha áreas seluk;
- Asegura jestaun eskolár eficiente, liuhusi definisaun no implementasaun regulamentus kona-ba disciplina professores no alunus nian, no ba finansiamentu eskolár;
- Hadi'a relasaun eskolas ho inan-aman sira, inklui promosaun ba asosiasaun inan-aman nian no realizasaun kampañas sensibilizasaun ba envolvimentu inan-aman sira, iha edukasaun labarik sira-nian;
- Implementa programas ne'ebé hariku alunus, liuliu atividades desportivas, eskuteirus, atividades sívika, artístika no kulturál;
- Reestrutura INFORDEPE atu bele oferese dezvoltamentu profisionál progresivu no ho qualidade ba rekursus umanus iha edukasaun no asegura formasaun ne'ebé efetiva liu ba Jestores no professores;
- Prepara professores, tuir áreas relevantes ba espesializasaun, hodi asegura kolokasaun ne'ebé efetivu, antes hahú anu letivu;
- Promove qualidade no relevánsia iha Institutu Nasionál Linguístika nian, no asegura tan rekursus hodi fortalese lian ofisiál Tetun no lian nasional seluk.

### **2.1.7. Ensinu Superiór**

- Reforsa qualidade ensinu iha Institutu no Universidade, públiku no privadu sira;
- Kria Komisaun koordenadora ida ba Universidade no Institutu Superiór sira, hodi estuda estratéjia koletiva ida hodi define assisténsia ida ne'ebé di'ak liu hosi parte Estadu nian no hodi implementa objetivu ba hasa'e qualidade Ensinu;
- Asegura sistema Ensinu Superiór ida ne'ebé abranjente no luan, regula hosi padraun qualidade ne'ebé rigoroza no ne'ebé hatán ba nesesidade País ne'e nian no respeita Sistema Nasionál Kualifikasaun nian iha Timor-Leste;





- Reforsa kapasidade Ajénsia Nasionál ba Avaliasaun no Akreditasaun Akademika (ANAAA), hodi promove avaliasaun ho qualidade no akreditasaun ba estabelesimentus Ensinu Superiór nian;
- Kontinua no reforsa programa bolsas-de-estudu, liu husi Fundu Dezenvolvimentu Kapital Umanu (FDCH), hodi asegura katak sei fó resposta ba áreas estratéjikas iha dezenvolvimentu País nian, ne'ebé identifika liuhosi mapeamentu rekursus umanus ne'ebé elabora hosi FDCH, no garante asesu ho baze iha méritu no iha programas espesifikus ba apoiu sosiál sira;
- Kontinua reforsa qualidade ensinu iha Universidade Nasionál Timor Lorosa'e, inklui kriasaun kursus foun, ne'ebé ajustadus ba nesesidade dezenvolvimentu sosioekonomiku País nian, hodi hadi'a kondisaun infraestruturas no ekipamentu sira, formasaun ba profesór sira iha nivel oiain ensinu nian;
- Habelar Ensinu Tékniku Superiór, iha áreas estratéjikas ba ekonomia nasional, hodi kria Instituto Superiór Politékniku ba Turizmu no Ajénsia no Gia Turizmu iha Lospalos, Instituto Superiór Politékniku ba Enjenãria, iha Suai no Akademia Peskas no Estudus Mariños iha Manatuto, no hadi'a kondisaun infraestruturas, jestaun no ba ensinu iha Instituto Politékniku Betano, liuliu kompleta instituisaun ida-ne'e ho ekipamentu sira ne'ebé adekuaudu ba ensinu superiór tékniku;
- Haforsa Instituto Nasionál ba Siénsias no Teknolojia hodi desenvolve no kria koñesimentu sientífiku ho impaktu relevante iha dinámika sosiál, ekonómika no kulturál país nian, ne'ebé disponibiliza ona iha Repositóriu Nasionál Dijital ida estudus investigasaun no análise ba siénsias aplikadas, nune'e mós ninia rejistu no ninia divulgasaun;
- Implementa programas ne'ebé bele favorese asesu ida boot (ka luan) ba materiais akadémikus ba Dosentes no Estudantes, liuhusi bibliotekas fizikas no dijitalis;
- Promove ligasaun entre Institutoens Ensino Superiór akreditadas, públicas no privadas, ho empresas nasionais kualifikadas, ho objetivu atu asegura aliñamentu entre oferta edukativa no nesesidades ba merkadu de traballu;
- Asegura implementasaun ba Política de Jestaun no Organizasaun do Ensino Superiór, ne'ebé estabelese diretrizes kona-ba diversifikasaun ba oferta edukativa, hodi kumpre kurríkulu ba Padraun Mínimu no ba línguas ofisiais ne'ebé promove identidade, patriotizmu no koezaun sosiál iha comunidade edukativa nia laran;





- Promove implementasaun ba Karreira Dosentes Universitáriu s iha instituisaun ensinu superiór públika no privada hotu-hotu;
- Promove reforsu iha nivel kompeténsia linguística no sientífika ho nune'e estudante sira hetan sesu ba ensinu superiór, hodi harii programa preparatóriu ida iha Instituisaun Ensinu Superiór hodi reforsa no hetan kompeténsia (*Ano Zero*);
- Halo aprovasaun no/ka atualizasaun ba leizlasaun estruturante no espesífika Ensinu Superiór nian, hodi reforsa funsionamentu setór no hasae qualidade Ensinu ne'e nian, promove igualdade asesu no igualdade jéneru;
- Garante utilizausaun ba língua ofisiál sira hanesan língua eskuziva no formasaun no ensinu iha Instituisaun Ensinu Superiór hotu-hotu, tuir hatuur ona iha Lei Baze Edukasaun;
- Kria mekanizmus no prosedimentus ne'ebé garante mapeamentu, monitorizasaun, inspesaun no akompañamentu regulár ba instituisoens do Ensino Superiór, ho objetivu atu aseguara qualidade ensinu;
- Dezenvolve programa kapasitasaun ida iha Ensinu Superiór, hodi hasae qualidade institucionál ba servisu akadémiku sira no apoiu administrativu;
- Promove kooperasaun iha área Ensinu Superiór, ne'ebé sei regula no enkuadra ho prioridades ba Timor-Leste, ho Instituisoens estranjeiras de Ensinu Superiór, ne'ebé akreditadas;
- Aprova no implementa programa kombate ba plájiu akadémiku iha instituisoens Ensinu Superiór, públikas no privadas;
- Dezenvolve parserias ho paízes, ne'ebé integra iha ASEAN no CPLP, atu fomenta troka experiéncias no mobilidade ba estudantes no dosentes no mós atividades akadémikas selu-seluk;
- Dezenvolve rede ida ba rezidénsia universitária;
- Estabelese parseria ho parseiru nasional no internasionál sira, hodi dezenvolve programa, konteúdu, kurríkulu, formasaun no disponibilizasaun ba profesór no Tékniku Especialista sira;
- Promove investigasaun, salvaguarda no divulgasaun iha área patrimóniu kulturál nian (inklui estudu antropolójiku, arkeolójiku, etnolójiku, linguístiku no sosiolójiku);





### **2.1.8. Fundu Dezenvolvimentu Kapital Umanu**

Fundu Dezenvolvimentu Kapital Umanu, ne'ebé estabesele iha tinan 2011, ho misaun atu kontribui ba dezenvolvimentu rekursus umanus nasionais, iha áreas estratéjikas dezenvolvimentu, liuhusi finansiametu ba programas no projetus formasaun plurianuais, ne'ebé destinadu atu aumenta kapasidade ba profesionais timoroan. Fundu ida ne'e inklui programas ba formasaun profesionál, ne'ebé foka liu ba jovens, formasaun profesionál téknika ba funcionáriu públikus, nune'e mós ba professores foin-sa'e, forsas Polísia no Defesa nian no programas bolsas-de-estudu ba funcionáriu Estadu-nian no públiku ein jerál, ho objetivu atu sira hetan grau akadémiku inisiál ka avansadu ida.

Governu sei kontinua:

- Investe iha FDCH atu, ho forma koordenada no estratéjika, fornese edukasaun no formasaun profesionál ida ne'ebé alargada, inklui ba ema sira ne'ebé ho nesesidade espesial;
- Monitoriza no avalia programas FDCH nian;
- Analiza no halo mapeamentu kona-ba rekursus umanus iha setór públiku iha Timor Leste;
- Produz no divulga guiaun ba bolsas-de-estudu no asesu ba formasaun;
- Hadi'a regulamentus no manuais rekursus umanus nian, ba funcionáriu FDCH nian;
- Duplika número bolsa estudu ne'ebé sei atribui, tuir méritu no nesesidade nasional.

### **2.2. Saúde**

Sidadaun hotu-hotu iha direitu ba saúde no assisténsia médika no sanitária no mós iha devér atu defende no promove saúde. Tuir Konstituisaun Repúblika, Estadu tenke promove kriaun husi servisu nasional saúde ida ne'ebé universál, jerál no, karik bele, gratuitu (ka la selu).

Governu sei kontinua implementa Polítika Nasionál Saúde nian ho Planu Estratéjiku Nasionál Setór Saúde 2011-2030 (PENSS 2011-2030), hodi mantein vizaun kona-ba "Timor-Leste ne'ebé saudavel", iha ne'ebé timoroan hotu-hotu bele iha asesu ba saúde no, iha ne'ebé, saúde sai hanesan fatór dezenvolvimentu globál, ba luta hasoru pobreza ka moris-kiak.

Inisiativa sira Governu nian kona-ba Setór Saúde sei kontinua orienta ba oinsá masimiza esforsu tomak, hodi garante prestasaun servisu ne'ebé di'ak liu, iha setór ida ne'e, no mós jeneraliza (ka habelar) asesu ba kuidadu saúde sira ho qualidade, no halo avaliasaun beibeik kona-ba efisiénsia,





transparénsia ho profisionalizmu, iha jestaun rekursu finanseiru, umanu, materiál no lojístiku, infraestruturá ho ekipamentu sira.

Tanba ne'e, sei hametin Sistema Nasionál Saúde – ne'ebé representa liuhusi elementu independente lubun ida ne'ebé sei kontribui ba saúde ho bein estár famílias hotu nian, nomos iha estabelesimentu ensinu sira, iha fatin servisu no iha fatin públiku no iha komunidadé sira nia leet - liuhusi kapasitasaun ba instituisoens ne'ebé presta kuidađu sira Saúde nian, ba profisionál saúde, ba sistemas fornésimentu no distribuísiaun medikamentu sira ho sistema sira emerjénsia médika nian.

### **2.2.1. Objetivu jerál sira**

Objetivu jerál sira ba área Saúde, mak hanesan tuirmai:

- i. Hadi'a prestasaun kuidađu Saúde sira iha País tomak, ho atensaun espesiál ba área remota sira no ba kamada populasaun ne'ebé dezfavoresida liu, haktuir prinsípiu sira hanesan inkluzsaun, ekuidade, efisiénsia no kualidade;
- ii. Hadi'a sistemas finansiamentu no jestaun husi rekursu finanseiru, umanu, lojístiku, materiál no ekipamentu ho infraestruturá sira setór Saúde nian;
- iii. Kontinua dezenvolve esforsu sira kona-ba desentralizasaun Servisu Saúde sira, hodi hadi'a koordenasaun entre Ministériu Administrasaun Estatál no instituisoens ne'ebé relevante;
- iv. Hadi'a koordenasaun intersetoriál Governu tomak nian, hodi konkretiza "Timor-Leste ida ne'ebé saudavel", inklui hadi'a nutrisaun ho kondisaun sanitária sira, liuhusi estratéjia sira ne'ebé konsertada, hodi hadi'a agrikultura no autosufisiénsia alimentár, aumentu iha produsaun animál no hadi'a liu tan setór peska, no mós liuhusi fornésimentu eletrisidade, bee mós no saneamentu báziku;
- v. Revee no hadi'a estruturá Sistema Nasionál de Saúde, ninia organizasaun, rekursu sira ho kapasidade téknika atu hadi'a prestasaun servisu integradu sira, iha kuantidade no kualidade sufisiente, hodi hadi'a mos sistemas planeamentu, monitorizasaun, avaliasaun no rekolla (ka halibur) husi indikadór sira;
- vi. Kontinua investe ba garantia seguransa no melloria kualidade prestasaun servisu saúde sira nian;





- vii. Asegura funsionamentu ne'ebé di'ak liu ba Servisu Autónomu Medikamentus ho Ekipmentus Saúde (SAMES, I.P), no Institutu Nasionál Saúde Públika Timor-Leste nian atu bele garante disponibilidade no distribuissau ai-moruk, reajente no konsumivel médiku sira (utensilio médiku sira) ho efisiénsia, lailais no ho qualidade;
- viii. Asegura funsionamentu ne'ebé di'ak liu, husi Servisu Emerjénsia no transferénsia pasiente sira;
- ix. Estabelese parserias ho Sociedade Sivíl, Setór Privadu ho Parseiru Dezenvolvimentu sira, atu bele dezenvolve kampañas sensibilizasaun, iha País tomak, hodi hadi'a Saúde públika, liuliu liuhusi prevensaun no hadi'a kuidadu sira iha área nutrisaun, imunizasaun, saúde reprodutiva, saúde mentál no saúde ambientál.

Hodi alkansa objetivu hirak ne'e, Governu sei halo asoens no buka atinje meta sira hanesan tuirmai:

### 2.2.2. Prestasaun Servisu sira Saúde Primária nian

1. Garante katak suku sira hotu ne'ebé ho populasau entre ema 1.500 to'o 2.000, liuliu ne'ebé hela iha área remota sira, bele iha asesu ba Postu de Saúde ida ho pakote servisu sira ne'ebé abranjente;
2. Asegura katak Sentru de Saúde Komunitáriu sira, iha Postu Administrativu sira, bele garante atendimentu ba ema entre 5.000 to'o 15.000 no iha kapasidade atu jere Postu Saúde 4 iha área jeográfika ida-idak nian;
3. Aumenta ba 70% taxa feto isin-rua ne'ebé simu kuidadu pré-natál sira, pelumenus dala-haat durante período isin-rua;
4. Aumenta ba 80%, taxa partu sira ne'ebé hetan assisténsia husi profesionál Saúde ida;
5. Aumenta taxa kobertura ba kuidadu sira pós-natál ba 90% durante semana rua dahuluk hafoin partu;
6. Kontinua promove esforsu atu hadi'a estadu nutrisaun populasau nian, ne'ebé foka liu ba bebé ho labarik sira, inklui prevensaun no tratamentu kona-ba falta nutrisaun, nomos liuhusi kampaña sira atu halo mudansa ba komportamentu kona-ba nutrisaun – ne'e nu'udar objetivu ne'ebé bele rezulta hodi reduz taxa deznutrisaun (malnutrisaun no





- obezidade), inklui persentajen labarik sira ne'ebé hetan akompañamentu no monitorizasaun ba sira-nia kreximentu;
7. Garante 90% imunizasaun hasoru poliomielite (ka moras polio), sarampu, tuberkuloze, difteria (ka moras respirasaun) no epatite B;
  8. Kontinua prepara no implementa planu kona-ba prevensaun ba moras kardíaka (ka, fuan nian), reumátika (ka isin-sin) ho febre reumátika;
  9. Reduz impaktu no aumenta konxensializaun ho prevensaun kona-ba moras hanesan: HIV-SIDA, tuberkuloze, asma (ka dada-iis susar tanba alerjia), malária, dengue, lepra (ka rate);
  10. Kontinua hadi'a asesu ba tratamentu ne'ebé relasiona ho moras iha foru (ka, kampu psikolójiku no mental);
  11. Reforsa asoens kona-ba promosaun saúde orál no hadi'a servisu odontolójiku sira (katak, kona-ba moras nehan);
  12. Reforsa asoens promosaun saúde okulár no hadi'a servisu oftalmolójiku sira (katak, tratamentu moras matan);
  13. Reforsa asoens kona-ba promosaun saúde ho baze iha ábitu alimentár sira no hadi'a prestasaun servisu sira ba moras kardiovaskulár (ka fuan nian), diabetes (ka mi-midar) ho ipertensaun;
  14. Promove kampaña sira kona-ba saúde jerál ho envolvimentu husi família, comunidade no eskola sira, liuliu kona-ba prevensaun moras relasiona ho konsumu droga, tabaku, álcool, moras ne'ebé bele tranzmite liuhusi atividade seksuál ho komportamentu seluk-tan ho risku hodi hetan moras kontajioza (ka ne'ebé da'et).

### 2.2.3. Prestasaun de Servisu sira iha Saúde Ospitalár

1. Kontinua halo planu, finansia no hala'o prestasaun kuidadu kardíaku no paliativu sira iha Ospital Nasionál Guido Valadares (HNGV);
2. Halo planu, finansia no hala'o prestasaun kuidadu onkolójiku sira (ka, kona-ba moras kankru) no renál (ka, kona-ba rins), no mós kuidadu saúde espesializadu sira seluk tan iha Ospital Nasionál Guido Valadares;
3. Estabelese servisu sira ba neurosirurjía iha HNGV;







4. Aumenta númeru no kualidade ba Médiku no Tékniku espesializadu sira, iha HNGV no Ospital Referénsia sira, haree ba pakote komprensivu kuidadu saúde sekundáriu no tersiáriu sira;
5. Reforsa kondisoens no disponibilidade iha Ospital Nasionál no iha Ospital Referénsia sira, atu bele kontinua sai hanesan sentru estájiu sira, ho kualidade ne'ebé di'ak liu, ba profesionál saúde hotu-hotu;
6. Prepara estudu detalladu hodi avalia nesesidade sira País nian no kondisoens finansimentu nian, atu bele alkansa meta atu hari Ospital ida, iha kada munisípiu, to'o tinan 2030;
7. hamenus transferénsia pasiente sira ba tratamentu médiku iha estranjeiru, liuhusi oferta servisu sira, ekipamentu, meius diagnóstiku no médiku espesializadu sira ne'ebé di'ak liu, iha HNGV.
8. Implementa polítika atu deskonjestiona Ospital sira ka hamenus númeru pasiente sira, liuhusi mekanizmu 'haruka fila fali' ka halo "kontra referénsia" husi pasiente ne'ebé prezisa kuidadus saúde primáriu ba Sentrus de Saúde Komunitáriu;
9. Desentraliza kompeténsia administrasaun no jestaun finanseira sira iha Ospital Referénsia, hodi asegura fortalesimentu institusionál no autonomia di'ak ida kona-ba jestaun no rekursu sira ne'ebé afeta ba Ospital sira ne'e;
10. Reforma Institutu Nasionál Saúde Pública Timor-Leste hodi hadi'a asesu no jestaun servisu laboratóriu nian iha territóriu tomak;
11. Reforma Banku Sangué nian, hodi jere di'ak liu sistema fornesimentu raan no troka raan.

#### **2.2.4. Infraestruturas iha Setór de Saúde**

1. Kontinua harii no reabilita Postu Saúde sira, hodi alkansa meta hanesan Postu de Saúde ida (1) ba suku ida-idak no ba lokalidade ida-idak ho abitante entre ema 1.000 to'o 5.000;
2. Kontinua reabilita no hasa'e kapasidade (ekipamentu sira, rekursus umanus) iha Sentru Saúde Komunitáriu sira;
3. Garante katak Postu Saúde no Sentru Saúde Komunitáriu sira bele hetan ekipamentu no funsiona ho di'ak, inklui aumenta instalasaun/edifisiu sira HNGV nian hodi simu





especialidade adisionál sira tan no garante akomodasaun ba especialista sira ne'ebé mai vizita;

4. Expande número no qualidade hosi ekipamentu médiku sira, inklui fó apoiu no asesu ba teknolojias informasaun nian;
5. Garante katak 100% hosi edifísiu sira ne'ebé integra iha Servisu Nasionál de Saúde hetan asesu ba eletrisidade, bee moos no saneamentu báziku;
6. Garante katak profesionál Saúde ne'ebé hala'o servisu dook husi sira-nia área rezidénsia, liuliu iha área remota sira, sei iha alojamentu ne'ebé di'ak;
7. Kontinua reabilita no hasa'e kapasidade téknika iha Ospital Referénsia sira, atu bele oferese servisu especializadu sira seluk tan;
8. Kontinua aumenta edifísiu servisu sentráal sira iha Ministériu de Saúde, atu bele akomoda ho di'ak ema hirak ne'ebé iha.
9. Harii Ospital Saúde Psikiátrika (ba moras mentál).

#### **2.2.5. Jestaun no Distribuisaun hosi Medikamentu no Ekipamentu Médiku sira**

1. Kapasita Servisu Autónomu Medikamentus no Ekipamentus de Saúde (SAMES, I.P), atu bele hala'o prestasaun servisu sira ne'ebé di'ak liu no asegura efisiénsia iha aprovizionamentu no lojístika ba produktu farmaséutiku sira no ba ekipamentu médiku sira ba Servisu Nasionál de Saúde;
2. Revee sistema jestaun husi stock ai-moruk no konsumu médiku nian, hodi garante stock ida ho, pelumenus 20% husi nesidade sira iha armazén SAMES nian no pelumenus 10% iha Unidade Saúde sira;
3. Hadi'a provizaun no distribuisaun medikamentu ho produktu sira ne'ebé asociadu (ka liga ba) iha Servisu Nasionál de Saúde tomak, hodi garante seleridade (ka, lalais), efisiénsia, transparénsia no qualidade servisu sira, liuhusi koordinasaun no komunikasaun ida ne'ebé di'ak liu entre SAMES ho entidade relevante sira;
4. Reforma Institutu Nasionál Saúde Públika Timor-Leste hodi hadi'a jestaun no kontrolu qualidade nian hosi análise klínika no sistema fornimentu raan;
5. Revee regulamentasaun no fiskalizacao ba Farmásia sira no ba fatin sira seluk ne'ebé la especializadu atu fa'an medikamentu sira (ka ai-moruk);





6. Regula prátika sira hodi uza medisina alternativa no komplementár no promove medisina tradisionál timorensen.

#### **2.2.6. Emerjénsia Médika sira**

1. Garante kualidade ho efisiénsia iha Servisu sira Emerjénsia nian, hahú husi liña atendimentu ba to'o seleridade resposta (resposta lalais) ho meiu no profisionál sira ne'ebé adekuaudu ba kazu emerjénsia ida-idak, durante 24 oras loron ida (loron tomak);
2. Asegura ezisténsia husi frota transporte emerjénsia ida ne'ebé suficiente no apropiada, liuliu ho ambulánsia ho veíkulu multifunSIONÁL sira, ho kapasidade atu dezloka (ka la'o) iha país tomak;
3. Reforsa kapasidade evakuasaun médika urgente liuhusi meiu aéreu sira husi fatin sira ne'ebé dook tebes (área remota sira) no difisil atu hetan asesu husi rai.

#### **2.2.7. Jestaun ho Administrasaun iha Setór de Saúde**

1. Implementa Planu Estratéjiku Nasionál Setór Saúde 2011-2030;
2. Haree di'ak fali no hadi'a estrutura Sistema Nasionál de Saúde nian, inklui nia organizasaun, rekursus ho kapasidade téknika, hodi hadi'a prestasaun servisu sira integradus, no hadi'a mos sistemas planeamentu, monitorizasaun, avaliasaun no rekolla de indikadores;
3. Hadi'a sistema finansimentu ho jestaun kona-ba rekursu finanseiru, lojístiku, materiál ho ekipamentu no infraestrutura sira Setór Saúde nian;
4. Dezenvolve no operacionaliza planu ida ba otimizasaun rekursu materiál no umanu sira, inklui formasaun, kapasitasaun ho avaliasaun kona-ba dezempeñu, hodi hadi'a kondisoens ijiene no asetizasaun (ka esterilizasaun) hosi edifísiu hotu-hotu iha ne'ebé halo prestasaun servisu saúde primária no Ospitalár sira;
5. Implementa levantamentu kona-ba sira hodi hadi'a Unidades Sanitárias, iha edifísiu sira iha ne'ebé hala'o prestasaun servisu saúde primária no Ospitalár sira;
6. Kontinua dezenvolve esforsu sira kona-ba descentalizasaun servisu sira Saúde nian, liuhusi koordinasaun di'ak liután ho Ministériu Administrasaun Estatál no instituisaun relevante sira;





7. Dezenvolve no implementa padraun saúde sira ne'ebé apropriadu no seguransa iha servisu, iha instituisoens Estadu tomak nian;
8. Implementa regulamentasaun tomak kona-ba prestasaun servisu sira, husi unidade privada saúde nian sira, tuir Sistema Públiku de Saúde nian;
9. Hadi'a Sistema Informasaun Saúde sira nian, atu bele halibur informasaun klínika kona-ba utente ida-idak, iha rejistu ida de'it, hodi permite halo lailais konsulta no mós preskrisaun eletrónika ba medikamentu sira ho utilizasaun husi meu komplementár diagnóstiku sira nian, ho objetivu halo hamutuk Rejistu Saúde Eletróniku ida de'it ba sidadaun hotu-hotu.

#### 2.2.8. Rekursus Umanus Saúde nian

1. Kontinua kria kondisoens atu Postus de Saúde hotu-hotu bele iha médiku ida (1), enfermeirus rua no parteiras rua;
2. Kontinua kria kondisoens atu aldeias hotu-hotu, iha fatin sira ne'ebé la'o liu oras ida hodi to'o iha Postu Saúde, bele iha asesu ba profesionál Saúde ida ne'ebé competente;
3. Kontinua kapasita Institutu Nasionál Saúde Públika Timor-Leste, hodi garante qualidade de ensinu, investigasaun no peskiza iha saúde, no hadi'a supervizaun ba instituisoens formasaun iha setór ne'e;
4. Halo parseria ho instituisoens Ensinu Superiór no Ministériu do Ensinu Superiór no Siénsia, hare'e fali kurríkulu ba ensinu superiór ne'ebé destina ona ba formasaun profesionais de saúde;
5. Implementa polítikas atu garante formasaun akadémika, kualifikasaun profesionál no formasaun kontínua ba profesionais de saúde;
6. Kontinua investe atu hadi'a kompeténsias profesionais no kapasidade téknika ba rekursus umanus no profesionais iha setór de Saúde, hodi fó formasaun ne'ebé adkuada ba kuadrus superiores, médius no bázikus;
7. Estimula parserias ho kooperasaun internasionál, hodi forma no kapasita profesionais de saúde, hahú husi profesionais de Saúde especializadus to'o téknikus ho rekursus umanus seluk, iha setór de saúde (nune'e mós iha área administrasaun, jestaun, finansas, aprovizionamentu no kontabilidade);





8. Implementa planus kona-ba forsa laborál, kuadrus de pesoál, regulamentus no padroens ho kódigus konduta ba profesionais iha setór de Saúde.

### **2.3. Inkluziun Sosiál, Protesaun Sosiál no Solidariedade Sosiál**

Husi 2007 ba 2017, governus ne'ebé tuituir malu (IV, V no VI Governos) fó prioridade ba assisténsia ba sidadauns ne'ebé kiak no vulneráveis liu, iha sosiedade timor. Maski ita hatene katak, ba longu prazu (ka tempu naruk), prestasaun edukasaun no formasaun ne'ebé ho kualidade no kriasaun oportunidades ba empregu, mak sei sai nafatin hanesan instrumentus fundamentais atu bele sai husi moris-kiak, atu to'o iha ne'ebá, Estadu nia devér mak atu aseguira katak Kombatentes Libertasaun Nasionál sira (ne'ebé simu sakrifísius barak tebetebes ba Pátria), feto ho labarik sira (iha sira ne'e mak rezide fórmula susesu ba dezvoltimentu sustentável), nune'e mós ho famílias kiak no kbiit-laek sira, idozus ho sidadauns vulneráveis seluk tan (hanesan kazu kona-ba ema defisientes), hotu-hotu bele iha asesu hodi satisfaz sira-nia nesidades básicas ba bein-está, no mós asesu ba oportunidades atu bele sai husi sira-nia kondisaun frajilidade.

Tanba ne'e, IX Governu sei kontinua fó tulun ba kamada populaun ida ne'e, no mós dezvoltolve polítikas no kria estratéjias ne'ebé bele reduz dependénsia ba apoiu husi Estadu. Iha ne'e inklui mos:

- Konsolida implementasaun ba Estratéjia Nasionál kona-ba Protesaun Sosiál;
- Konsolida implementasaun ba Lei kona-ba Rejime Jerál ba Seguransa Sosiál no garante protesauun ba traballadores ho sira-nia famílias, no mós iha situasoens hanesan maternidade, paternidade, adosaun, idade ferik-katuas, invalidez no mate;
- Konsolida Institutu Nasionál de Seguransa Sosiál no Fundu Reserva Seguransa Sosiál, atu nune'e bele jere, ho independénsia, transparénsia, efikásia no efisiénsia, sistema seguransa sosiál, inklui rejimes kontributivus no naun-kontributivus;
- Aprova Lei de Bazes ba Protesaun Sosiál;
- Haree di'ak fali (ka halo revizaun) no avalia dokumentus lejislativus no operasionais kona-ba Pensaun Sosiál;
- Haree di'ak fali no avalia programa Bolsa de Mãe Jersaun Foun, subsídiu apoiu kondisionál, ne'ebé sei reajusta ho apoius sosiais pekuniárius (ka, fó osan) ba famílias ne'ebé prezisa liu, no foka liuliu iha investimentus iha Saúde ho Edukasaun labarik sira-nian;





- Alarga konstrusaun Centrus de Solidariedade Sosiál (CSS), ne'ebé eziste ona iha Munisípiu sira, ba Postos Administrativos hotu-hotu;
- Hadi'a Servisu sira Atendimentu Sosiál (SAS) ne'ebé hakbesik-an ba comunidades, liuhusi Centrus Solidariedade Sosiál (CSS);
- Hadi'a Programa Apoiu ba Instituisoens Solidariedade Sosiál, ho prioridade ba hirak ne'ebé ho impaktu boot liu hanesan, tulun ne'ebé fó ba labarik ho jovens, ba feto ho sidadauns portadores de defisiénsias, no mós hanesan iha área integrasaun sosiál, dezvoltamentu umanitáriu ho apoiu iha situasoens Emerjénsia ba kazus hanesan dezastres naturais, prevensaun ho reparasaun ba situasoens karénsia no dependénsia;
- Promove asoens koezaun sosiál, ne'ebé promove diálogu, seguransa komunitária ho rezolusaun de konfliktus no problemas sociais iha nível comunidades;
- Revee kuadru jurídiku husi Sentru Nasionál Reabilitasaun.

### 2.3.1. Feto

Feto ho mane iha direitus no obrigasoens ne'ebé hanesan iha aspetus hotu-hotu, iha moris família nian, kulturál, sosiál, ekonómika no polítika. Atu direitus hirak ne'e bele konkretiza ho di'ak liután, hodi Feto timoroan sira bele kontribui barak liu no di'ak liu ba ita-nia sosiedade no ba kreximentu ka dezvoltamentu rai nian, mak Governu sei:

- Estimula krisaun negósius auto-sustentáveis ba feto sira, inklui sira ne'ebé sai xefe família no sira ne'ebé sai vítima ba violénsia doméstika no violénsia bazeia ba jéneru, hodi asegura independénsia ekonómika;
- Garante katak 60% husi feto sira bele hetan asesu ne'ebé hanesan ba pozisoens (ka, kargus) foti desizaun nian, hetan asesu ba justisa no seguransa, tuir ninia kapasidade no méritu;
- Koopera ho Ministériu Edukasaun atu revé, no kontinua asegura implementasaun kurrikulu ne'ebé sensível ba jéneru ho efikásia no qualidade iha Sistemas de ensinu;
- Kontinua promove asoens kona-ba formasaun profisionál iha áreas ne'ebé bele hamosu empreza ki'ik no natoon no mós kooperativas, ne'ebé lidera husi feto;
- Koopera ho Ministériu Edukasaun, no mós ho INDICA – Instituto para a Defesa dos Direitos da Criança, IP (Instituto ba Defesa husi Direitus Labarik-nian) atu asegura katak 75% husi labarik feto sira ho idade eskolár, bele remata ensinu báziku (PED 2022);





- Kontinua implementa Planu de Asaun Nasionál kona-ba Violénsia bazeia ba Jéneru;
- Kontinua implementa Planu de Asaun Nasionál kona-ba Feto, Pás no Seguransa;
- Kontinua implementa kampañas atu luta hasoru violénsia doméstika;
- Kontinua implementa polítika ba orsamentu ne'ebé sensível ba kestoens Jéneru nian;
- Asegura kondisoens servisu ne'ebé di'ak liu ba feto, ne'ebé sai mós hanesan mães mo edukadoras, liuhusi revizaun ba lejislasaun laborál no liuhusi koordinasaun ho SEFOPE;
- Apoia organizaun no asosiasaun feto nian sira, ne'ebé defende feto sira nia direitu no interesse;
- Implementa Deklarasaun Maubisse nian ne'ebé foka liu ba atribuisaun igualdade oportunidade sira ba feto, kona-ba edukasaun no formasaun profesionál, asesu ba merkadu traballu no moris sosiál no polítika.

### **2.3.2. Labarik**

Labarik iha direitu ba protesaun espesial husi parte família, husi comunidade no Estadu, liuliu hasoru formas abandonu (ka, soe no husik hela), diskriminasaun, violénsia, opresaun, abuzu seksuál ho esplorasau. Labarik sira goza direitus tomak ne'ebé rekoñese universalmente, no mós direitus ne'ebé konsagra iha konvensoens internasionais, ne'ebé Estadu ratifika ka aprova regularmente. Labarik sira hotu, ne'ebé moris husi matrimóniu ka lae, goza direitus no hetan protesaun sosiál ne'ebé hanesan ho sira-seluk.

Nune'e, Governu sei kontinua foti medidas hodi:

- Implementa Rejime Jurídiku kona-ba Protesaun ba Maternidade, Paternidade ho Adosaun, hamutuk ho medidas seluk hodi apoia Labarik vulneráveis;
- Implementa Lei kona-ba Protesaun ba Labarik sira ne'ebé iha perigu;
- Implementa Rede kona-ba Protesaun Labarik sira iha Postu Administrativu sira hotu-hotu iha País;
- Kapasita ka hakbiit INDICA – Instituto para a Defesa dos Direitos da Criança IP (Instituto ba Defesa husi Direitus Labarik-nian) no implementa Planu Asaun Nasionál ba Labarik;





- Kria no dinamiza programas okupasionais no ba tempus livres ne'ebé espesífikus ba Labarik sira, ne'ebé hela iha orfanatus, ho akompañamentu pedagójiku no psikolójiku ne'ebé di'ak;
- Promove kampañas ho asoens sensibilizasaun kona-ba direitos ho deveres Labarik sira-nian no kona-ba lejislasaun relevante ne'ebé afeta labarik sira;
- Inkrementa ka dezenvolve programas kona-ba inkluziun sosiál ba Labarik sira, ne'ebé konsidera hanesan marjinalizadas ka iha konfliktu ho lei;
- Kria programas ne'ebé prevene marjinalidade ho delinkuénsia (ka atus krime) Labarik sira-nian hodi halo reinsersaun ba comunidade ka ba instituisoens ne'ebé hala'o servisu iha área protesaun labarik nian;
- Kontinua implementa programas kona-ba prevensaun, protesaun ho assisténsia ba Labarik sira, ne'ebé sai vítimas violénsia, abandonu, inestu (katak relasaun iha uma laran - aman ho oan, maun ka alin mane ho feton rasik), no abuzu seksuál, liuhusi liña atendimentu ida ne'ebé segura ba denúnsia kona-ba kazus hanesan ne'e;
- Hadi'a monitorizasaun ho tratamentu husi Polísia, Ministériu Públiku no Tribunais kona-ba kazus violénsia ho abuzu ba Labarik sira.

### 2.3.3. Idozus

Sidadaun hotu-hotu terseira idade nian iha direitu ba protesaun esepiál husi parte Estadu. Polítika kona-ba terseira idade engloba medidas ho karáter ekonómiku, sosiál no kulturál, hodi proporsiona ba idozus oportunidades ba realizasaun pesoál, liuhusi partisipasaun ida ne'ebé digna no ativa, iha vida comunidade.

Maibé, Estadu mós tenke rekoñese katak la'ós de'it Gerrilleiros mak luta no la'ós de'it Ema hotu ne'ebé partisipa iha Rede Clandestina mak luta ba Libertasaun da Pátria. Ba sidadauns ne'ebé fó apoiu ba Rezisténsia, Estadu tenke fó rekompensa sira ba atividades ne'ebé sira hala'o durante Rezisténsia.

Ne'e duni, IX Governu sei tau matan liuliu ba Idozu sira, ho idade liu ona tinan 70, tanba kamada boot populasau nian ne'ebé terus husi kedas hahú funu libertasaun nian, ho sakrifísius oiain, lakon família ne'ebé mate tanba ema oho, tanba hamlaha no moras no, ikus mai, iha tinan 1999, enfrenta (ka, hasoru) ameasas hotu-hotu hodi la hakiduk atu ba tú iha Referendum ba Ukun Rasikan. Sira mak Heróis Vivos, ne'ebé Estadu tenke hakru'uk ba, tanba sira-nia sacrificios hotu-hotu







no, liuliu, sira nia desizaun ne'ebé berani atu Vota ba Ukun Rasik-an. Sira mak ta'uk no la ba Vota, Membros Organizações klandestinas nia Votus sei la to'o, tanba guerrilheiros mós la vota, tuir instrusaun husi Komando Superiór da Luta.

Tan ne'e, IX Governu tenke fó atensaun boot liu ba idozus ne'e, ne'ebé bele bolu 'Heróis Vivos'. Ho ne'e hotu, mak Governu sei:

- Hasai normas ne'ebé konkretas, hodi halo urjentemente levantamento ba idozus, ho idade liu tinan 70, para sira bele hetan apoio ne'ebé boot liu, hodi hamenus matan-wen iha sira-nia loron ikus sei moris;
- Kontinua fó subsídios pekuniáriu (ka osan) ba idozus, liuhusi Subsídium de Apoiu ba Idozus ho Inválidus (SAII);
- Kria Sentrus Atendimentu ba idozus, iha Munisípiu sira hotu;
- Dezenvolve kampañas kona-ba idozus nia direitus no promove sira-nia integrasaun ho kuidadu sira espesiais iha famílias no iha comunidades;
- Kria programas kona-ba Tempus Livres/Espasus Konvíviu/Terapia Okupasionál ba idozus, hodi promove nia bein-estár ho integrasaun iha sosiedade (bele inklui atividades desportivas, artes, teknolojias tradisionais hanesan olaria ho artezenatu, pintura, paseius, ka hanesan de'it espasus ba konvíviu).

#### **2.3.4. Grupos Vulneráveis seluk**

Sidadaun ne'ebé iha Defisiénsia goza direitus ne'ebé hanesan no mós sujeitu ba deveres ne'ebé hanesan ho sidadauns seluk, exetu kona-ba ezersísiu ka kumprimentu deveres ne'ebé nia labele hala'o tanba razaun defisiénsia.

Hanesan medidas apoiu ba grupos sidadauns ne'e, Governu sei:

- Estimula kriaun negósius autosustentáveis ba sidadauns ne'ebé ho Defisiénsia;
- Hadi'a kapasidade iha país tomak atu presta servisu sira ho qualidade ba ema vulneráveis, inklui konstrusaun ekipamentus no asesibilidade ba ekipamentus iha instituisoens públicas nian;
- Dezenvolve programas de apoiu ba famílias ho comunidades ne'ebé tau-matan ba ema sira ho Defisiénsia;





- Hadi'a kondisoos assisténsia nian ba ema ho defisiénsia iha Sentro Nasionál Reabilitasaun no, ba oin, harii sentru sira hanesan ne'e iha Munisípiu sira hotu;
- Kontinua dezenvolve Programas Reabilitasaun ho prestasaun servisu sira no divulgasaun hodi hadi'a qualidade moris ema sira ne'ebé ho Defisiénsia, liuhusi reabilitasaun ne'ebé especializada no integrada;
- Halo levantamentu kona-ba ema sira ne'ebé ho moras krónika no kria pogramas de apoiu, no mós promove kampañas de sensibilizasaun kona-ba moras krónikas;
- Implementa programas reabilitasaun ba rekluzus (ka, prezus) ho ex-rekluzus (ka, ex-prezus) ba sira-nia integrasaun iha sosiedade;
- Investe iha programas assisténsia alimentár, hodi apoia vítimas dezastres naturais no indivíduos ho famílias vulneráveis;
- Hadi'a mekanizmus sokorru ho assisténsia ba vítimas dezastres naturais, inklui konstrusaun infraestruturas, ho distribuisaun materiais konstrusaun no materiais ba armazenamentu;
- Realiza asoens formasaun ho kapasitasaun ba prevensaun, mitigasaun no asaun ba kazus dezastres naturais, iha comunidades iha País tomak;
- Halo levantamentu kona-ba ezisténsia toksikodependentes iha país no kria kondisoens ba sira-nia rekuperasaun ho akonsellamentu, no mós reforsa kampañas de sensibilizasaun kona-ba konsumu drogas no kombate tráfikú ilegal;
- Apoia Institutu Nasionál Kombate ba HIV-SIDA, I.P., no kontinua realiza kampañas de prevensaun kona-ba tranzmisaun HIV-SIDA, fó apoiu ba pasientes iha Casa de Rekuperasaun Saúde, iha Tibar, no mós hadi'a assisténsia kona-ba alimentasaun, kuidadu sira saúde no tratamentu ba pasientes ho moras HIV-SIDA no dezenvolve kampañas integrasaun no terapia okupasionál, liuhusi koordenasaun ho Ministériu Saúde;
- Implementa Deklarasaun Maubisse nian.





## 2.4. Kombatentes de Libertasaun Nasionál

Konstituisaun determina katak Estadu tenke asegura protesaun espesial ba mutiladus funu, oan-kiak ho sira ne'ebé dependente hela ba ema sira ne'ebé dedika sira-nia moris tomak iha Luta ba Independénsia no soberania Nasionál no proteje ema hotu-hotu ne'ebé partisipa iha rezisténsia hasoru okupasaun estranjeira. Lei mos define tiha ona mekanismus hodi fó omenajen ba Eróis Nasionais. Nune'e, Governu sei kontinua rekoñese valór ne'ebé aas tebes husi Eróis Nasionais, sei prezerva no selebra memória kona-ba Luta no sei halo buat hotu (ka providensia) atu sira hotu ne'ebé simu sakrifisius tomak hodi alkansa bein-komún (ka hotu-hotu nia di'ak), bele moris, agora, ho kondisoens ne'ebé dignas, tanba País nia dignidade rasik mos depende ba ida ne'e.

Governu sei kontinua dezenvolve asoens hanesan ne'e:

- Promove rekoñesimentu ofisial ba Veteranus no Kombatentes Libertasaun Nasionál, liuhusi atribuisaun ka fó kondekorasoens no husi atus rekoñesimentu ofisial seluk tan, hodi fó atensaun espesial ba CLN sira ne'ebé hetan tinan 3 iha Base de Apoio tamba, tuir Lei ne'ebé vigora, sira seidak hetan (ka sai benefisiáriu ba) pensaun ruma;
- Atribui Diplomas de Honra ba Veteranus no CLN sira ne'ebé iha rejisto no sira-nia prosesus validadus hotu ona;
- Promove nafatin Serimónias de Kondekorasaun ba Veteranus, Mártires no CLN sira, ne'ebé to'o agora seidak simu medallas de onra husi Estadu;
- Atribui pensaun Prestasaun Pekuniária Únika ka benefisiu seluk ba CLN sira ho tinan 3 iha Base de Apoio, liuhusi revizaun ba Lei kona-ba Estatutu CLN;
- Revee estatutu ba familiares, husi Kombatentes ne'ebé mate ho 'dedikasaun eksklusiva '4-7 anos', atu bele hetan direitu ba prestasaun pekuniária únika;
- Revee Estatutu atu bele atribui 'dedikasaun eksklusiva' ba kombatentes ne'ebé mate, iha funu laran maibé la konsidera hanesan mártires;
- Hakotu prosesus ne'ebé sai reklamadus no pendentes, husi kedas rejistu 2003-2005 nian;
- Hala'o lalais prosesu verifikasaun no validasaun ba rejistos husi tinan 2009;
- Loke rejistu foun ba Veteranus no CLN sira ne'ebé seidak rejista-an, husi tinan 2003 to'o 2009;
- Asegura protesaun sosial ho pensoens ba Veteranus ho Kombatentes Libertasaun Nasionál sira, no mós ba famílias mártires no sira ne'ebé lutu;





- Implementa sistema atribuisaun bolsas de estudo ba mártires ho Kombatentes Libertasaun Nasionál sira-nia oan, haree ba kondisaun individuál ida-idak;
- Integra Veteranus ho Kombatentes Libertasaun Nasionál iha vida ekonómika no sosiál, inklui asesu ba kualifikasoens ho oportunidades empregue;
- Estimula kriasaun negósius autosustentáveis ba Veteranus ho Kombatentes Libertasaun Nasionál;
- Haree ba viabilidade atu kria Fundo Veteranus nian;
- Fó apoiu ba CCLN hodi harii banku komersiál ida ho verba sira Fundu Investimentu Veteranu sira nian;
- Akonsella Veteranus no CLN sira hodi halibur iha asosiasoens ka kooperativas no Estimula investimentu iha mikro, empresas ki'ik ka médiu, husi sira-nia osan pensaun rasik;
- Implementa programas prezervasaun ho valorizasaun ba Istória Luta nian, no mós harii Monumentus istórikus no seluk tan (semitérius ka rate, jardins eróis, etc.);
- Halo immortalizasaun hosi matebian durante períodu luta nian, ne'ebé rekolle ona liuhusi rejistu Uma Lisan nian, atu halo gravasaun (hakerek) iha monumentu husi Postu Administrativu sira hotu;
- Halo konstrusaun Semiterius Espesiais foun (iha Ainaro, Natarbora, Covalima, Kelikai, Iliomar, Uatulari, Ermera, Maliana) no halo remata semiterius ne'ebé to'ogora seidak hotu (Laga no seluk-tan) no kontinua ho konstrusaun *Jardim dos Heróis* iha Metinaro;
- Hakoi restus mortais ne'ebé rekolla tiha ona no tau hela iha 'Uma Mahon', iha Munisípiu lubuk ida;
- Insentiva Veteranos no KLN hodi kontinua hala'og nafatin rekolla ba restus mortais;
- Kria Komisaun Nasionál Sientífika Independente ba Istória Luta Libertasaun Nasionál nian, ne'ebé prevee ona iha artigu 36º Estatutu CLN nian;
- Konklui investigasaun rigoroza ida kona-ba Istória Luta ba libertasaun nasional, hodi bele fahe ba eskolas no comunidades, atu futuras jerasoens koñese pasadu, onra presente no valoriza futuru;
- Implementa programas prezervasaun no valorizasaun Istória Luta, hanesan mos kona-ba selebrasaun ba momentus ho dias istórikus;





- Implementa Estatutu Orgániku ba Konsellu Nasionál Kombatentes Libertasaun Nasionál nian no apoia sira-nia programas no inisiativas, inklui sira-nia partisipasaun iha programas dezvoltamentu Nasionál;
- Kontinua apoia “Centro Nasionál Chega!” ho nia programas no inisiativas, atu nune’e bele prezerva memória kona-ba pasadu no promove rekonsiliaun ho pás, iha nível Nasionál no internasionál;
- Halo diliénsia sira hotu ne’ebé presiza, liuliu hamutuk ho Ministériu Edukasaun nian, hodi inklui materiál no konteúdu husi “Centro Nacional Chega!” iha kurríkulu ensinu nian;
- Lansa (ka fó-sai), iha formatus oioin, Istória Kontemporánea Timor-Leste nian, inklui dados kona-ba investigasaun istórica ho levantamentu ne’ebé halo iha País tomak, kona-ba períodu Rezisténsia ho Luta ba Independénsia;
- Disponibiliza expozisoens, espasus muzeulójikus ho instalasoens, ne’ebé iha relasaun ho períodu Rezisténsia no istória kona-ba luta Nasionál, inklui espasus muzeulójikus “Abrigus subterrâneos Rezisténsia nian”, fatin sira ne’ebé marka ho eventus importantes, expozisoens permanentes, temporárias ho itinerantes, liuhusi apoiu ho promosaun ba Arkivu ho Muzeu Rezisténsia Timor nian (AMRT).

## 2.5. Kultura no Patrimóniu

Tuir Konstituisaun da Repúblika, Estadu rekoñese no garante, ba sidadaun ida-idak, direitu ba Kultura no determina katak ema hotu-hotu iha direitu ba fruisaun (ka aproveita, goza) no kriaun kulturál, no mós devér atu prezerva, defende no valoriza patrimóniu kulturál. Kultura hanesan mós forma pasífika no konstrutiva ida, atu dezenvolve personalidade no expresa emosoens, hodi poténsia (ka aumenta) konsiénsia kona-ba sidadania no valoriza sensibilidade ema ida-idak nian no nia empatia ba maluk seluk. Nune’e, Kultura iha papel ne’ebé fundamentál no insubstituível (ka la iha atu substitui ka troka) iha konstrusaun sosiedade ida ne’ebé pasifikada no moderna.

Nune’e, sei kontinua dezenvolve esforsus kona-ba promosaun ho valorizasaun espresoens artístikas oioin, aleinde salvaguarda no promove Patrimóniu Istóriu no Kulturál, materiál no imateriál, inklui Patrimóniu arkeolójiku no edifikadu, múzika, línguas (ka lian) no dialetus no istória orál, arkitetura tradisionál, artezanatu ho kualkér forma de espresaun artístika, tradisionál ka moderna.





Governu sei uza Kultura no Patrimóniu kulturál, hodi promove konsiénsia patriótika ho sentidu pertensa no identidade Nasionál, hodi bele, ho nune'e, kontribui atu kria otimizmu no bein-estár iha populasaun no estimula nia partisipasaun iha dezenvolvimentu sustentável País nian.

Ne'e mak, Governu sei promove objetivus jerais tuir mai, iha área Kultura no Patrimóniu:

- Fomenta Identidade Nasionál no Kultura timor-nian, hodi kontribui ba konstrusaun Nasaun ida, ne'ebé pasífika, tolerante no kreativa;
- Asegura katak populasaun tomak iha asesu ba diversidade saberes (ka, koñesimentus), expresoens artístikas no elementus kulturais, kona-ba espesifisidades istórikas no jeográfika País nian;
- Aumenta kooperasaun, parserias ho interkámbius artístikus no kulturais ho Nasoens seluk no mós Organizmus Internasionais, atu bele promove Kultura ho Patrimóniu timor-nian iha estranjeiru, nune'e mós hanesan estratéjia aprendizajen no formasaun ba ita-nia instituisoens kulturais no ita-nia produtores kulturais ho artistas nasionais;
- Dezenvolve turizmu kulturál no apoia inisiativas, públikas ka privadas, ho objetivu atu prezerva no dezenvolve patrimóniu kulturál nasionál;
- Hadi'a no reforsa koordenasaun intersetoriál hodi promove kultura ho forma tranzversál, inklui asoens formasaun profisionál ho ensinu kulturál no artístiku iha eskolas;
- Insentiva konsumu ne'ebé boot liu iha Arte no Kultura, iha ita-nia País, no insentiva konservasaun patrimóniu kulturál;
- Kontinua promove manifestasoens kulturais nasionais hotu-hotu, inklui feiras, konkursus no serimónias tradisionais, ho seluk-seluk tan;
- Implementa kuadru legál ida ba prezervasaun (katak kuidadu no bali didi'ak) lokais ka fatin istórikus País nian, tuir nia regras rehabilitasaun ho konservasaun rasik (halo artikulasaun ho entidades governamentais relevantes, hanesan Ministériu da Justisa);
- Dezenvolve programa mapeamentu ba fatin istórikus hotu-hotu, liu husi artikulasaun (ka koordenasaun) ho entidades governamentais relevantes, hanesan Ministériu do Turizmu;
- Implementa Código do Direito de Autor e Direitos Conexos, ne'ebé aprova husi Lei no. 14/2022, de 21 de dezembro.





Atu konkretiza objetivus jerais, ne'ebé deskreve iha leten, Governu sei dezenvolve asoens tuir mai no konkretiza metas hanesan:

- Harii Muzeu ida ho Sentru Kulturál iha Díli (PED 2015);
- Kontinua konstrusaun Biblioteka Nasionál;
- Estabelese Akademia Arte, Kultura no Indústrias Kriativas;
- Estabelese Sentrus Kulturais Rejonais iha Oe-Cusse Ambenu, Liquiçá, Ermera, Maliana, Ainaro ho Suai (PED 2020);
- Kria Kompañia Nasionál ba Teatru no Dansa no promove realizaun eventus no vizitas regulares, iha nível munispál;
- Implementa kuadru legál kona-ba Patrimóniu Kulturál no promove regulamentasaun legál husi biblioteka sira;
- Kontinua halo levantamentou kona-ba bens kulturais, iha País tomak, no divulga (ka publika) liuhusi baze dadus 'online' ida;
- Investe iha formasaun ba kuadrus no apoia investigasaun iha áreas kulturais, liuhusi parserias ho instituisoens akadémikas nasionais no internasionais;
- Impulsiona (ka dudu) kriaun asosiasoens nasionais ne'ebé defende, promove ho konserva patrimóniu kulturál, liu mos husi kooperasaun ho instituisoens no organizmus internasionais;
- Hadi'a koordenaun entre entidades públikas responsáveis ba área Kultura ho Entidades Governamentais responsáveis ba área Edukasaun, atu bele dezenvolve programas ho kurrículus iha área patrimóniu kulturál, asaun kulturál no artístika;
- Hadi'a koordenaun entre entidades governamentais responsáveis ba área Kultura ho entidades governamentais responsáveis ba área Turizmu, hodi dezenvolve programas iha ámbitu patrimóniu kulturál ho asaun kulturál ne'ebé atrativus ba setór turístiku;
- Reforsa lasus istórikus, kulturais, linguístikus no artístikus ho países CPLP, liuhusi promosaun programas, eventus ho interkámbius iha área kulturál no artístika;
- Estreita (ka hametin) lasus kooperasaun no amizade ho países ASEAN no iha Pasífiku, liuhusi programas, eventus no interkámbius iha área kulturál no artístika;
- Reforsa kooperasaun ho UNESCO;





- Haree di'ak fali lejizlasaun ne'ebé iha ba Kultura no korrije (ka hadi'a) lakunas (ka faltas) ne'ebé presiza, hodi disponibiliza (ka prepara) kadru legál ida ne'ebé efetivamente bele apoia, promove no armoniza inisiativas iha área kulturál ho ninia intervenientes;
- Kria lejizlasaun ba promosaun mesenatu kulturál (ka halo doasoens, fó ajuda ba kultura);
- Promove atividades kulturais ho artístikas, liuliu iha área expresoens artístikas, hanesan kria saun prémios nasionais, hodi motiva partisipasaun ne'ebé boot, liuhusi patrosínus ka mesenatu.

## **2.6. Juventude**

Estadu promove no enkoraja inisiativas kona-ba Juventude, iha konsolidasaun ba Unidade Nasionál, iha rekonstrusaun, iha defeza no iha dezvoltimentu País. Estadu promove, tuir ninia possibilidades, edukasaun, saúde ho formasaun profesionál ba Jovens.

Jovens timoroan sira mak hanesan futurús líderes Nasaun nian no iha sira-nia liman responsabilidade atu transforma País ne'e, iha futurú, no kontribui ba nia dezvoltimentu sustentável. Timor-Leste, Nasaun ida ne'ebé liu 50% husi populasaun tomak, mak iha hela idade tinan 20 ba kraik, no maioria husi jovens ne'e presiza hetan kualifikasoens ne'ebé di'ak liu, ho mos asesu di'ak liu ba oportunidades empregu ba sira-nia realizasaun pesoál no profesionál.

Esforsu husi Governu ne'e maka atu kria oportunidades ne'ebé posibilita Jovens kronketiza sira-nia potenciál.

Kona-ba ida ne'e, no atu alkansa metas ne'ebé iha, Governu hakarak implementa asoens tuir mai, hanesan:

- Implementa Polítika Nasionál kona-ba Juventude ho planus de asaun nasionais, ne'ebé bele promove dezvoltimentu ho autonomia ba Juventude;
- Reforsa funksionamentu husi Konsellu Nasionál Dezvoltimentu Juventude, hodi kria kondisoens ba koordena saun ne'ebé di'ak liu entre entidades públikas no privadas, hodi asegura dinamizasaun inisiativas ba jovens no atu sira tama iha merkadu de traballu, no mós garante prepara saun kona-ba polítikas ho aplica saun planus de asaun nasionais, ne'ebé relasiona ho estratéjias ne'ebé aprova tiha ona iha Polítika Nasionál kona-ba Juventude;







- Apoia estabelesimentu de Asosiasaun de Jovens;
- Kontinua promove Parlamentu Jovens nian ka “Parlamentu Foin Sa’e”, inklui kapasitasaun iha área lideransa, pensamentu krítiku, kapasidade debate ho análize sosiál;
- Harii Sentru Nasionál Juventude nian iha Díli (PED 2020);
- Dezenvolve kbiit atu loke no hala’o Kampus de Formasaun iha Lideransa, hodi promove kondisaun fízika ne’ebé di’ak, kualifikasoens administrativas, rezolusaun konfliktu ho valores sívikus;
- Hadi’a Sentrus Juventude ne’ebé iha ho konstrusaun Sentrus Multifunsoens ba Juventude, iha Munisípiu sira, atu bele fó formasaun iha áreas hanesan línguas ka lian, teknolojias, arte, múzika, desportu ho edukasaun sívika;
- Promove Jornada sira Juventude nian.

## 2.7. Desportu

Forma ida mós ne’ebé di’ak liu, atu oinsá bele hadi’a jovens nia karáter no fomenta valores kooperasaun, amizade no espíritu de ekipa, no mós hadi’a jovens nia kondisaun fízika, mak aposta iha desenvolvimentu Desportu.

Desportu hanesan parte ne’ebé krusiál ka desizivu tebes, iha jovens nia vida, hodi envolve sira barak no di’ak liu iha relasionamentus sosiais no promove diálogu, toleránsia, étika, demokrasia, kompetisaun saudável no, mezmú kapasidade lideransa. Jerálmente, Desportu iha kapasidade atu halibur ema no halo sira servisu hamutuk ba ideál komun ida, hodi promove mos identidade Nasionál ida ne’ebé forte, buat ne’ebé ita hein no bele dehan husi sidadauns hotu-hotu, iha konstrusaun no desenvolvimentu País nian.

Finalmente, atividade fízika ne’e hanesan fator importante ida ba qualidade moris ema hotu-hotu nian, hodi asegura ita ema nia produtividade ne’ebé boot liu ho sensasaun bein-estár.

Atu bele promove no insentiva prátika atividades desportivas, husi ita-nia jovens timoroan sira, Feto ho Mane, Governu sei kontinua dezenvolve metas ho asoens hanesan tuir mai:

- Haree di’ak fali (ka, Revee) no implementa Planu Estratéjiku kona-ba Desportu Timor-Leste;





- Finansia, promove no apoia atividades desportu iha comunidades tomak iha País, atu bele promove kompetisoens ka konkursus kona-ba modalidades oioin, iha nível Nasionál;
- Apoia no desenvolve rekursus umanus, iha áreas jestaun instalasoens desportivas, treinu no desenvolvimentu atletas, jestaun ekipas ho jestaun eventus;
- Apoia partisipasaun comunidades ho alunus iha atividades desportivas, liu husi klubes ho eventus desportivos komunitáriu no eskolares, hodi hadi'a mos koordenasau entre entidades governamentais responsáveis ba área Desportu no entidades governamentais ne'ebé responsáveis ba Edukasaun, ho objetivu promove Desportu Eskolár no entidades governamentais ne'ebé responsáveis ba área Desportu ho entidades Munisipais, atu bele desenvolve Desportu Munisipál;
- Asegura partisipasaun iha Jogus Universitáriu CPLP no ASEAN;
- Insentiva no desenvolve talentus, atu bele promove Desportu de alta kompetisaun;
- Enkoraja no promove Turizmu desportivu, inklui desportus radikais no desportus marítimus;
- Desenvolve futebol, voleibol ho basketeból, inklui desenvolvimentu ligas, halo parseria ho entidades nasionais no internasionais;
- Apoia Komisaun Reguladora Artes Marsiais nian, atu bele desenvolve modalidade ida ne'e, ho forma pasífika no gratifikante ba ninia partisipantes, hodi kumpre Lei Artes Marsiais nian iha nível Nasionál;
- Promove realizasaun kompetisaun saudável entre grupus artes marsiais, ho objetivu atu promove amizade no solidariedade entre grupus ne'e, hodi hakotu mentalidade violénsia nian;
- Reabilita infraestruturas desportivas no harii instalasoens foun, inklui Jináziu multiuzus iha kada Munisípiu (PED 2020) no reabilita Estádiu Díli ho kompleksu Jimnodesportivu;
- Promove profesionalizasaun Desportu nian, liuhusi kapasitasaun ba federasaun desportiva sira, ho objetivu másimu atu garante partisipasaun timoroan sira iha *Asian Games, Sea Games* no *Jogos Olímpicos*.





## **2.8. Teknolojias Informasaun no Komunikasaun (TIC)**

Ita moris iha era globalizasaun no teknolojia ne'ebé, sidadauns husi kualkér país bele hetan koñesimentu ne'ebé lailais no luan tebetebes. Maibé presiza kria kondisoens atu hetan asesu ba teknolojias informasaun no komunikasaun, hodi inkuti (ka, haburas) iha ema no iha instituisoens, sira-nia partisipasaun ativa iha produsaun, disseminasaun no uzu ba koñesimentu ne'e.

Domíniu kona-ba Teknolojias de Informasaun no Komunikasaun sei kontribui hodi hadi'a qualidade ensinu no formasaun, ba jestaun ho administrasaun públikas ne'e di'ak liu no ba dezvoltamentu setór privadu, fatores ne'ebé nesésarius ba kompetitividade ho dezvoltamentu sustentável país nian.

Nune'e, Governu sei kontinua ho asoens hanesan tuir mai:

- Implementa Polítika kona-ba Teknolojias de Informasaun ho Komunikasaun;
- Dezenvolve no implementa kadru legál kona-ba fó apoiu ba uzu Teknolojias de Informasaun no Komunikasaun, hodi propoin ba Parlamentu Nasionál kona-ba aprovasaun lejislasaun iha matéria kriminalidade informátika no jestaun, asesu no protesaun ba baze de dados pesoais eletrónikas;
- Kapasita Ajénsia Teknolojia de Informasaun no Komunikasaun IP – TIC TIMOR, , ne'ebé nia misaun mak atu jere rede informátika husi Governu ho entidades públikas seluk tan, ba modernizasaun Estadu no hadi'a funsionamentu ho prestasaun servisu sira instituisoens públikas nian;
- Reforsa kapasidades iha instituisoens, no iha infraestruturas no rekursus umanus iha setór ida ne'e;
- Implementa estratéjia kona-ba modernizasaun administrativa, hodi dezenvolve valor adisionál husi Governu Eletróniku, inklui estabelesimentu plataformas konektividade ho asesu ba internet, iha instituisoens Estadu no Governu nian tomak;
- Proporsiona asoens formasaun iha Teknolojias de Informasaun no Komunikasaun ba líderes, administradores, diretores ho funsionários públikus hotu;
- Kria infraestruturas ne'ebé presiza, ba asesu jeneralizadu ba internet iha País tomak, inklui iha áreas rurais, liuhusi kriasaun Espasus Internet ka Sentrus de Teknolojias de Informasaun no Komunikasaun;





- Kontinua realiza akampamentus ba Teknolojias de Informasaun no Komunikasaun nian iha País tomak;
- Promove kriasaun konteúdos ne'ebé adapta ba sirkunstánsias ho nesesidades lokais;
- Promove no fasilita asesu Feto sira-nian ba Teknolojias de Informasaun no Komunikasaun foun;
- Promove investigasaun sientífika, inovasaun ho kompetitividade ne'ebé uza teknolojias de informasaun no komunikasaun;
- Kria parserias ho setór privadu Nasionál no internasionál, atu bele dezenvolve Teknolojias de Informasaun no Komunikasaun, nu'udar instrumentu ne'ebé útil ka di'ak ba akizisaun, produsaun no difuzaun koñesimentus;
- Kontinua oferese formasau gratuita, iha área informática, husi ótika utilizador nian, dezeńu gráfiku no uzu teknolojias de informasaun foun ba peskiza ho investigasaun no kriasaun negósius.

## 2.9. Komunikasaun Sosiál

Konstituisaun Repúblika determina katak sei garante liberdade ba imprensa no ba meius komunikasaun sosiál seluk tan, inklui liberdade de espresaun ho kriasaun husi jornalistas, asesu ba fontes informasaun, liberdade editoriaál, protesaun ba independénsia no ba sijilu (ka, segredu) profesionál no direitu kona-ba estabesele jornais, publikasoens no meius de difuzaun seluk tan. Estadu tenke asegura liberdade no independénsia, husi Órgauns Públikus, ba komunikasaun sosiál, hasoru Poder Polítiku no Poder Ekonómiku, no garante katak sei la iha monopóliu kona-ba meius komunikasaun sosiál.

Sei kompete mos (ka, sai responsabilidade) ba Estadu atu asegura ezisténsia Servisu Públiku ba Rádiu no Televizaun, ne'ebé tenke izentu, hodi haree mos, entre objetivu sira-seluk, kona-ba protesaun no divulgasaun kultura no tradisoens Timor-Leste nian, no mós garantia kona-ba espresaun tuir pluralizmu opiniaun.

Tanba ne'e, mak Governu sei:

- Apoia no reforsa TATOLI - Ajénsia Notisioza Timor-Leste IP;
- Apoia no reforsa Konsellu de Imprensa, nu'udar órgaun independente regulador ba setór komunikasaun sosiál;





- Kontinua apoia programas disemina saun kona-ba Asaun Governativa, hodi promove koñesimentu públiku nian ba asaun governativa ho transparénsia ne'ebé boot liu kona-ba governasaun;
- Kontinua apoia RTTL, E.P. inklui hadi'a infraestruturas físicas ho atualizasaun ekipamentus téknikus, no mós iha implementasaun Planu Estratéjiku ida ba Imprensa, atu nune'e bele hadi'a qualidade ho kuantidade informasaun ne'ebé divulga;
- Propoin ba Parlamentu Nasionál atu aprova lejislasaun hodi regula setór komunika saun audiovisuál iha Timor-Leste;
- Estabelese Institutu ba Formasaun de Jornalistas no kontinua aposta iha formasaun jornalistas ba desenvolvimentu no diversifikasaun setór ida ne'e;
- Dezenvolve mekanizmus ba kooperasaun intersetoriál, ne'ebé bele poténsia (ka optimiza) uzu ne'ebé korretu kona-ba línguas ofisiais husi jornalistas;
- Dezenvolve mekanizmus ba kooperasaun intersetoriál, hodi fomenta no divulga lian ofisiais ba populasaun tomak;
- Apoia Konsellu de Rádus Komunitárias no estabelesimentu estasoens Rádus Komunitárias foun;
- Apoia Asosiasoens de Jornalistas Nasionais;
- Insentiva asesu no partisipasaun Feto, iha órgauns de komunika saun sosiál;
- Inkrementa ka dezenvolve perspetiva kona-ba Jéneru iha Órgauns Komunika saun Sosiál no insentiva kampañas no programas ne'ebé bele promove uza lian ofisiál sira, identidade Nasionál, edukasaun ba sidadania, knaar feto nian iha sosiedade no koñesimentu tékniku no sientífiku;
- Promove diversifikasaun Órgauns de Komunika saun Sosiál, iha nível Munisipál;
- Kria, hamutuk ho Ministériu Administrasaun Estatál, programa ida hodi dissemina polítika descentralizasaun administrativa;
- Kria programa ida hodi fó apoiu ba meios komunika saun sosiál privadu sira atu kontribui ba desenvolvimentu husi setór komunika saun sosiál nian;
- Kria Sentro Informasaun iha Suku ida-idak, ho objetivu atu promove koñesimentu husi sidadaun hotu-hotu kona-ba notísia atualidade nian, nasionál no internasionál;





- Kria programa formasaun profisionál hodi kapasita “*media officer*” sira husi liña ministeriál no husi Munisípiu sira, ho objetivu atu aumenta efikásia komunikasaun ofisiál instituisaun ida-idak;
- Dezenvolve planu ida hodi dissemina promosaun Timor-Leste nian, liuhusi plataformas dijitalis.

## 2.10. Sosiedade Sivíl

Sosiedade Sivíl hanesan parte determinante iha prosesu konstrusaun Estadu, iha dezvoltimentu no konsolidasaun demokrátika iha Timor-Leste.

Parseria entre Governu ho Organizasoens Sosiedade Sivíl tenke reforsa, hodi bele iha partisipasaun ne’ebé ativa no responsável liután, iha implementasaun ajenda estratéjika ba dezvoltimentu País nian.

Apoia Sosiedade Sivíl atu kumpre nia papel, sai hanesan parte integrante husi estratéjia Ezekutivu nian, atu asegura boa governasaun no promove inkluzoens sosiál. Konstrusaun Nasaun ida ne’ebé saudável, implika (ka husu) dezvoltimentu Sosiedade Sivíl ida ne’ebé mos saudável no independente.

Governu sei, ho ida ne’e, kontribui hodi hadi’a kapasidades, inisiativas ho asoens Sosiedade Sivíl nian, promove mos toleránsia, pás ho dignidade umana no mantein Estadu responsável, ba ninia asoens no fó solusoens alternativas no progresistas ba País.

- Halo estudu ida no averigua (katak buka hatene didi’ak) iha ka la iha sustentabilidade finanseira kona-ba atribuisaun (ka, fó de’it) fundus no kona-ba insentivus fiskais ne’ebé organizasoens sosiedade sivíl hetan ka simu, atu nune’e Estadu bele hasai desizaun ne’ebé loos;
- Hadi’a apoiu ba implementasaun atividades Sosiedade Sivíl nian, inklui koordenaun no diálogu ne’ebé di’ak liu ho Governu;
- Promove no dinamiza kooperasaun entre Sosiedade Sivíl husi países ka grupus países (hanesan liuhusi CPLP ho ASEAN) ho objetivu atu explora oportunidades dezvoltimentu ekonómiku, kulturál, sosiál no polítiku, no mós asoens solidariedade no defeza direitus umanus;





- Kontinua fó apoiu no kolabora ho instituisaun no konfisaun relijioza oioin, hodi insentiva realizasaun inisiativa sira ne'ebé bele promove valór morál no étiku sira sosiedade nian, no mós promosaun ba Dame, armonia familiár no sosiál, no toleránsia;
- Promove partisipasaun ativa husi Sosiedade Sivíl iha kombate ba pobreza iha área rural, ho forma ne'ebé sustentável;
- Promove partisipasaun husi Sosiedade Sivíl iha melloria ba boa governasaun;
- Promove envolvimentu ativu husi Sosiedade Sivíl iha promosaun ba devér síviku sira no ba direitus umanus.

### 2.10.1. Relijiaun

Konstituisaun Timor-Leste asegura, ba ema hotu-hotu, liberdade de konsiénsia, relijiaun no kultu, maibé iha separasaun konfisoens relijiozas husi Estadu.

Ema ida sei labele hetan persegisaun ka diskriminasaun, tanba ninia konviksoens relijiozas, hodi mós iha garantia ba liberdade hanorin ba kualkér relijiaun, tuir ida-idak nia fiar.

Governu sei kontinua apoia no kolabora ho instituisoens no konfisoens relijiozas ne'ebé eziste, hodi insentiva sira hala'o inisiativas ne'ebé bele promove valores morais no étikus iha sosiedade nia laran no mós promove pás, armonia familiár no sosiál ho mós toleránsia.

Aleinde ne'e, Governu sei:

1. Kontinua kooperasaun ho CET (Konferénsia Episkopál Timorensé) relaciona ho boa governasaun, reforsa CET nu'udar instituisaun, no mós relaciona ho transparénsia no responsabilidade;
2. Dezenvolve polítika ida ne'ebé bele garante katak konfisaun relijioza hotu-hotu bele pratika sira nia fiar ho dame;
3. Promove partisipasaun husi konfisaun relijioza sira iha promosaun ba direitus umanus, edukasaun sívika no redusaun pobreza.





### 2.11. Abitasaun

Ema hotu-hotu iha direitu, ba nia an rasik no ba nia família, ba abitasaun (ka uma) di'ak ida ho luan ne'ebé natoon, ho kondisoens ijiene no konfortu, ne'ebé bele prezerva intimidade pesoál ho privasidade família nian.

Atu proporsiona abitasaun ne'ebé kondigna ba ita-nia sidadauns, Governu sei:

- Reeve Política Nasionál ba Abitasaun, tinan 2007 nian, hodi dezenvolve Programa Nasionál Abitasaun, iha ne'ebé inklui kestoens sustentabilidade, hodi garante, tuir prazu, abitasaun ne'ebé kondigna ba timoroan hotu-hotu, ho asesu ba bee mós no rezervatóriu, instalasoens saneamentu individuál (hariis fatin), koziña ka dapur, eletrisidade ho nível konfortu ne'ebé tuir padroens modernus;
- Kria regulamentus hodi estabelese rekizitus mínimus, atu bele harii no asegura konstrusaun uma ne'ebé dignu, ne'ebé promove habitabilidade ho kondisaun seguransa no mós ho hijiene;
- Haree di'ak fali no reforma Programa kona-ba Objetivus Dezenvolvimentu Milénium (MDG Sukus – PED 2015);
- Kria no implementa programa apoiu ba rehabilitasaun no konstrusaun uma, hodi hadi'a qualidade nu'udar hela fatin;
- Introdús téknikas modernas ho materiais konstrusaun ne'ebé di'ak no haree tuir kultura, tradisaun ho klima Timor-Leste, envolve partisipasaun comunidades lokais durante prosesu tomak;
- Estuda no implementa programa kona-ba promosaun atu harii uma hosi investidores privadu sira, iha fatin foun, liuhosi Planu Urbanizasaun ne'ebé planeadu no ho infraestruturas hotu ne'ebé hetan ona aprovasaun;
- Asegura akompañamentu permanente ba comunidades, relaciona ho forma oinsá nia abitasauns bele simu animais hakiak, hodi forma no sensibiliza líderes komunitários ho xefes de família kona-ba kestoens Saúde Pública, ne'ebé asosia ho konvíviu (ka moris hamutuk) ho animais.
- Promove política ida kona-ba abitasaun saudável no bairru sira ne'ebé inovadór no integradu;
- Fó apoiu ba comunidade, aldeia no suku sira ba ninia dezenvolvimentu.







### 3. KONTINUA HO DEZENVOLVIMENTU INFRAESTRUTURAS

*“Pilár sentrál ida hosi Plano Estratéjiku ba Dezenvolvimentu maka konstrusaun no manutensaun iha infraestruturas oioin ne’ebé produtivas”.*

Infraestruturas, importante tebes ba dezenvolvimentu ekonómiku no sosiál, maibé sai duni dezafiu bot, tamba infrastrutura ne’e nia eskala no kustus asosiadus ba implementasaun rede infraestruturál ida, maka permite atu sustenta produtividade, kriasaun servisu no dezenvolvimentu ba setór privadu, iha nível Nasionál.

Ho razaun ida ne’e, planeamentu, orsamentasaun, monitorizasaun no avaliasaun halo parte importante iha estratéjia ida ne’e. Nune’e, iha tempu badak, Governu propoin halo levantamentu ida ne’ebé detalladu ba infraestruturas hotu no projetus ne’ebé halo iha tinan 5 ikus ne’e, para bele loke auditoria, hodi halo avaliasaun foun, korresaun no restruturasaun iha planu infraestruturas nian, atu kombate hasoru totál falta de transparénsia, ne’ebé soe hela ba sorin, no ho objetivu atu hamenus tiha asimetrias (ka, diferensas boot husi fatin ida ba fatin seluk) no haree mós ba lakunas (ka, fallas) ne’ebé sei eziste, iha infraestruturas bázikas iha País laran.

Prioridade prinsipál hosi Governu, kona-ba setór infraestruturas nian maka, sei ezije profesionálismo boot liu hosi rekursus umanus no emprezas ne’ebé hetan kontratu iha setór ida ne’e, hodi implementa reforma institusionál ida ne’ebé inklui ona planeamentu ne’ebé di’ak, monitorizasaun, inspesaun no fiskalizasaun ba projetus no obras hirak ne’ebé la’o hela.

Ho hanoin katak, atu konstrói ekonomia produtiva no moderna, maka presiza kontinua hala’o investimentu iha infraestruturas ho eskala bot, nesesáriu tebes atu garante konstrusaun ho qualidade no asegura ninia kustu-benefísiu, hodi mos loke dalan ba investimentus ne’ebé nesesárius iha futuru, kona-ba operasaun no manutensaun, no hodi haree ba rekursus ne’ebé disponível no ninia sustentabilidade iha loron ikus.

Iha hakarak katak, ho planu infraestruturas ida ne’e, bele kombate pobreza bot iha rai laran. Iha âmbito ida ne’e, maka liuhosi konstrusaun infraestruturas bázikas, Governu hakarak mós:

- Kria kondisoens ba Saúde di’ak liu, nune’e mós bem-estár fíziku, mentál no sosiál ba sidadauns, ida ne’e inklui: fasilita asesu ba prestasaun kuidadu sira saúde primários, sekundários no tersiários; hadi’a ambiente fíziku, inklui estradas no pontes ne’ebé seguras no hanoin ba konstrusaun ekilibrada iha infraestruturas, hodi hamenus risku poluisaun no degradasaun ambientál, no mós investe iha limpeza urbana; fasilita no





promove asesu ba uma-mós ho kondisaun ne'ebé di'ak ba saúde pública; kria kondisaun ba saneamentu báziku no asesu ba eletrisidade, iha 24 oras nia laran, iha territóriu tomak;

- Kria kondisoens ba Edukasaun ne'ebé di'ak, liuhosi asesu barak no di'ak liután ba fatin hanorin, ba formasaun profisionál no ba konsumu kulturál. Ne'e inklui mós atu fornese Bee, Saneamentu báziku, eletrisidade no asesu ba internet no mós ba teknolojia foun iha informasaun no komunikasaun nian;
- Kria kondisoens ne'ebé presiza hodi permite katak sidadauns ho nesesidades espesiáis bele asesu ba infraestrutura bázika sira;
- Kria kondisoens ba investimentu privadu no ba kreximentu ekonómiku, tanba liuhosi prestasaun kondisoens di'ak iha transporte, komunikasaun no fornese enerjia, maka bele dinamiza no diversifika ekonomia. Maibé, tenke planeia tuir potencialidade Rejiaun ida-idak nian no tenke haree kona-ba nia efeitu multiplikador iha setór sira seluk, hodi fó benefísius ekonómikus ba populusaun tomak;
- Kria kondisoens ba empregu, hodi fasilita mobilidade no asesu ba oportunidade servisu nian, nune'e mós oportunidades hirak ne'ebé sei mosu husi kreximentu ekonómiku no husi investimentu privadu, ne'ebé sei buras tan iha Rai laran. Maibé, liuliu, prosesu konstrusaun ba infraestruturas ne'ebé naturalmente presiza kuantidade bot no variedade hosi maun-de obra, hodi nune'e mós tan oportunidades atu hadi'a kualifikasaun no especializasaun ba ita-nia emar, liuhosi negosiasaun iha kontratus, entre Governu ho empresas kontratadas, ne'ebé halo konstrusaun ba grandes projetus iha infraestrutura.

### 3.1. Governasaun iha Setór Infraestruturas

Sei halo levantamentu kle'an ka detalladu ida, ne'ebé bele hamosu atualizasaun ba infraestruturas bázikas hirak ne'ebé iha ona no ba projetus infraestrutura hirak ne'ebé la'o hela, hodi halo reavaliasaun, korresaun no re-estruturasaun ba planu infraestruturas, nune'e bele aseguara konstrusaun ho qualidade ho ninia relasaun kustu-benefísiu ne'ebé di'ak liu, no bele projeta investimentus ne'ebé presiza iha futuru, haree husi operasaun no manutensaun, hodi hatene lolós kona-ba rekursus ne'ebé iha no sustentabilidade iha futuru.





Ba hanoin ida ne'e, Governu hakarak mós, iha termus espesifikus, atu:

- Investe, racionalmente no ho forma sustentável, reseitas husi Fundu Petrolíferu ba infraestruturas bázikas modernas no produtivas, no sei halo koordinasaun ne'ebé estratéjika ba planeamentu ne'e rasik ho dezvoltimentu setór sira seluk no ba polítikas dezvoltimentu;
- Hadi'a jestaun Fundu Infraestrutura nian, liuhusi Secretariadu Grandes Projetos, hodi kontinua implementa projetus ho dimensaun boot, plurianuais, ho prioridade ba projetus hirak ne'ebé atu promove dezvoltimentu sosioekonómiku Rai laran nian, nune'e bele kontribui ba halakon kiak no hadi'a moris sidadauns nian. Fundu Infraestruturas sei kontinua finansia projetus de infraestruturas bázikas, edifisius públikus no projetus iha área edukasaun, juventude no desportu, saúde, defeza no seguransa, abitasaun sosiál, sistemas finanseirus no infraestruturas apoiu nian;
- Reforsa no kapasita Komisaun Nasionál Aprovizionamentu, atu sai efikás, eficiente no transparente liu tan, iha prosedimentus aprovizionamentu ne'ebé relasiona ho infraestruturas, inklui mós funsaun nu'udar apoiu ba liñas ministeriais hotu, iha prosesu aprovizionamentu iha territóriu Nasionál tomak;
- Reforsa no kapasita Ajénsia Dezenvolvimentu Nasionál, sai efikás, eficiente no transparente liu, iha prosedimentus no propostas ba setór infraestruturas, inklui fiskalizaun prévia no planeamentu ba projetus, nune'e mós iha ninia funsaun kona-ba jestaun ba implementasaun, monitorizasaun, fiskalizaun, avaliasaun no kontrolu qualidade nian;
- Asegura efisiénsia, efikásia no transparénsia, iha sistema investimentu ba infraestruturas no projetus boot nian, inklui prosedimentus aprovizionamentu, jestaun ba kontratus no sistema de pagamentus;
- Haforsa sistema monitorizasaun, inspesaun, fiskalizaun no avaliasaun ba projetus infraestruturas no projetus boot, iha nia realizasaun ka implementasaun física no finanseira;
- Estabelese parserias entre Ministériu Obras Públikas, Ajénsia Dezenvolvimentu Nasionál no Universidades hodi reforsa meius kontrolu ba qualidade iha konstrusaun de infraestruturas;





- Kontinua halo avaliasaun, hodi halo (ka fó) sertifikadu ba Emprezas konstrusaun sivíl nian, hanesan mós ba Konsultoria Téknika sivíl;
- Dezenvolve no atualiza padroens no kritérius ba konstrusaun infraestruturas bázikas;
- Kontinua supervizona, monitoriza no avalia qualidade materiais ne'ebé uza iha konstrusaun projetus infraestruturas;
- Halo estudu no análise ba qualidade, hodi haree daudauk ona ba utilizaun matérias-primas lokais, nune'e mós iha utilizaun bens no materiais seluk, hodi hamenus importaun, ne'ebé sustenta hela kreximentu setór infraestruturas;
- Aumenta kapasidade 'mão-de-obra' (ka badaen) timoroan nian, iha nível Nasionál, Munisipál no rural;
- Asegura, iha kontratos ne'ebé sei halo iha futuru, partisipasaun bot badaen (ka maode-obra) timoroan, inklui hadi'a kondisoens servisu ne'ebé di'ak liu no oportunidades ba formasaun no estájius profesionais;
- Estabelese sistema hodi implementa manutensaun regulár husi infraestruturas sira;
- Insentiva partisipasaun setór privadu Nasionál iha desenvolvimento infraestruturas;
- Haforsa kooperasaun bilaterál ho nasoens seluk, hodi halo kooperasaun iha infraestruturas ba obras públikas;
- Halo reabilitasaun ba Laboratóriu Nasionál hodi garante qualidade husi projetu sira infraestruturas nian;
- Reforsa Institutu Jestaun Ekipamentus hodi fó resposta ba situasoens emerjénsia no dezastres naturais.

### 3.2. Rede Rodoviária

Governu sei kontinua implementa planu infraestruturas ba rede rodoviária iha Rai laran, inklui konstrusaun, reabilitasaun no manutensaun ba estradas nasionais, munisipais no rurais tuir kritériu internasionál ba nia qualidade no iha seguransa.





Iha biban ida ne'e, destaka mós asaun no metas prinsipais hanesan tuir mai:

- Hadi'a estradas rurais, hodi uza empresas lokais (PED 2015 - 1270 km), hodi implementa Programa ba Dezenvolvimentu Estradas Rurais no Planu Mestre no Investimentu Estratéjiku kona-ba Estradas Rurais;
- Halo rehabilitasaun ba estradas nasionais ho rejionais no urbanas (iha kapital munisípius), tuir padroens internasionais (PED 2022);
- Realiza estudus anuais iha monitorizasaun ba kondisaun estradas iha estradas hotu-hotu ne'ebé reabilita, atu nune'e bele determina nesesidade ba halo manutensaun (PED 2015);
- Kompletu planu ba autoestrada Nasionál sirkunvalasaun nian. Governu sei revee didi'ak dezeńu ho nia detalles hotu husi faze II t'ó faze IV, molok atu loke konkursu aprovizionamentu;
- Halo estudu kona-ba monitorizasaun ba pontes ne'ebé eziste (ka, iha ona) iha rai laran no asegu nia rehabilitasaun no manutensaun ne'e rasik, hanesan mos konstrusaun ba pontes foun, iha áreas nevráljicas iha Rai laran;
- Hala'o estudu kona-ba monitorizasaun ba kontrolu xeias no kontinua asegu konstrusaun paredes de retensaun (ka, bronjong) no gabioens iha territóriu Nasionál tomak.

### **3.3. Bee moos no Saneamentu Báziku**

Investimentu iha asesu ba Bee moos no Saneamentu báziku la bele adia (ka dada) tan. Laiha infraestrutúra ida ne'e maka sei afeta ba saúde pública, inklui hada'et moras, mate, no dezenvolvimentu ladi'ak ba labarik sira.

Investe iha Bee moos no Saneamentu maka hanesan investimentu iha Saúde, Edukasaun, iha meiu ambiente no iha kreximentu ekonómiku, inklui hadi'a oportunidade ba empregu no produtividade Nasaun nian. Investimentu estratéjiku ba áreas hirak ne'e, importante tebes ba kreximentu ekonómiku no ba moris di'ak populasaun nian.

Iha biban ida ne'e, Governu rekoñese katak, laiha (ka seidauk iha) investimentu substansiál ida ba setór ida ne'e to'ó agora, no hatene katak investimentu iha Saneamentu Báziku hanesan prioridade ida, no mós hanesan forma ida hodi halakon kiak.





Objetivus Governu nian, ba área ida ne'e, maka:

- Fó asesu ne'ebé jeneralizadu, seguru no sustentável ba abastesimentu bee moos, ba konsumu privadu sidadauns hotu-hotu, inklui ba agrikultura, komérsiu no indústriá;
- Hadi'a indikadores iha área Saúde, Edukasaun no iha dezvoltimentu sosiál no ekonómiku, hodi garante asesu ba Bee moos no Saneamentu Báziku, iha territóriu tomak;
- Asegura katak timoroan hotu hetan asesu ba Saneamentu Báziku ne'ebé di'ak, iha territóriu tomak, liuhosi sistema esgotos ne'ebé autosufisientes no ho kualidade, inklui konstrusaun Sentrus de tratamentu, no sei fó asesu ba instalasoens sanitárias públicas, iha Kapital no iha Munisípiu sira;
- Asegura sistemas drenajen ho kualidade, iha Dili no iha Munisípiu sira hotu;
- Asegura formasaun téknika ba timoroan sira, iha setór Bee no Saneamentu Báziku no assegura kapasitasaun institusionál ba entidades no organismos ne'ebé jere, implementa, monitoriza no fiskaliza setór ne'e;
- Kria mekanizmu alternativu sira ne'ebé di'ak atu hasoru mudansas klimáticas no atu prevene efeitos ne'ebé ladi'ak ba infraestruturas bee moos no saneamentu nian.

Atu konkretiza objetivus hirak ne'e, Governu sei dezvoltolve asaun hirak tuir mai, hodi alkansa metas ne'ebé trasa:

- Asegura katak maioria populasaun rurál, iha Timor-Leste, hetan asesu, ne'ebé di'ak no sustentável, ba Bee moos (PED 2015);
- Asegura katak Eskolas Públicas hotu-hotu sei hetan kanalizasaun ba Bee moos (PED 2020);
- Kria mekanizmus koordensaun intersetoriál, hodi dezvoltolve planu estratéjiku ida ne'ebé konsistente ba jestaun Bee moos;
- Aprova no implementa Planu de Investimentu, Polítikas no Reforma Institusionál 2023-2030, hodi kumpre metas hirak ne'ebé define ona iha PED no iha Objektivu VI husi Objetivus ba Dezvoltimentu Sustentável (ODS). Planu ida ne'e, sei identifika investimentus ne'ebé presiza ba abastesimentu Bee moos no Saneamentu iha territóriu tomak;





- Dezenvolve estudus, análizes no planus investimentu, ne'ebé orienta ba foti desizaun kona-ba opsoens ne'ebé di'ak liu atu investe iha setór Bee;
- Dezenvolve no implementa estudus, análizes no planus investimentu, ne'ebé orienta ba hili opsoens kona-ba sustentabilidade ne'ebé di'ak liu, ba manutensaun no operasaun sistema abastesimentu Bee moos;
- Reeve Polítika Nasionál ba Jestaun Rekursus Ídrikus;
- Reeve Polítika Nasionál ba Abastesimentu Bee moos;
- Reeve kuadru legál ne'ebé presiza, hodi halo implementasaun ba polítikas jestaun rekursus ídrikus nian no abastesimentu Bee moos;
- Implementa Planu Diretor kona-ba Abastesimentu Água no Saneamentu iha Dili no iha Kapitais Munisipais seluk;
- Halo Reforma ba modelu institusionál setór nian, nu'udar setór públiku ho autonomia, efisiénsia no sustentabilidade boot liu, hodi implementa estratéjia Governu nian no hodi garante regulasaun téknika no ekonómika ne'ebé efetiva;
- Identifika fontes foun Bee nian, inklui desalinizasaun, konstrusaun rezervatórios no instalasoens ba tratamentu Bee, iha territóriu Nasionál tomak no kontinua loke tan rede abastesimentu Bee iha territóriu Nasionál tomak;
- Asegura katak áreas urbanas munisípais iha instalasoens sanitárias ho kondisoens di'ak (PED 2020);
- Halo koneksaun/ligasaun sistema esgotu ba uma hotu-hotu ne'ebé eziste iha Dili no, bainhira la bele, garante nia ligasaun ba fosa séptika ka asesu ba instalasaun sanitária komunitária nian (PED 2020);
- Hadi'a koordenasaun ho parseirus desenvolvimentu, iha projetus kooperasaun iha âmbito abastesimentu no jestaun Bee no Saneamentu iha áreas rurais, hodi garante investimentus ne'ebé importante iha comunidade rurais;
- Aprova no implementa política tarifária ida ne'ebé inklui tarifa ne'ebé diferente ba consumidores diferentes, husi particulares ba consumidores komersiais no industriais;
- Dezenvolve infraestruturas ne'ebé adekuadu, inklui sistema operasaun no manutensaun hodi rekolla, tratamentu no hamoos esgotus (PED 2020);





- Hadi'a monitorizasaun no sistema kontrolu hodi rekolla no tratamentu ba Bee fo'er iha instalasoens públikas, komersiais, industriais, sosiais no rezidensiais;
- Implementa lejislasaun no regulamentus, ne'ebé vigora hela, hodi dezenvolve sistemas integradus ba jestaun ba sasán fo'er tós iha sidade laran;
- Implementa Plano Mestre ba Saneamentu ho Drenajen iha Dili;
- Hadi'a sistema Drenajen iha Munisípiu sira hotu, hodi asegura konstrusaun sistemas drenajen ba bee udan-nian (PED 2020);
- Aumenta projetus formasaun profisionál no kapasitasaun institusionál hodi dezenvolve infraestruturas ba Bee no Saneamentu Báziku, inklui manutensaun no operacionalizasaun ba sistemas hirak ne'e, liuhusi koordenaun intersetoriál ho entidades governamentais relevantes;
- Asegura atu harii mekanizmus ba monitorizasaun, prevensaun no asoens kona-ba alterasaun klima, hodi hamenus ninia efeitu iha infraestruturas Bee no saneamentu báziku, liu husi koordenaun intersetoriál ho entidades Governu nian ne'ebé relevantes.

### **3.4. Enerjia**

Asesu ba fornesimentu eletrisidade, regulár no fiável, sai nu'udar direitu báziku no aliserse ba kreximentu ekonómiku iha Timor-Leste. Ho ida ne'e, kontinua investe iha setór enerjétiku, krusiál hodi hadi'a qualidade moris timoroan sira-nian no hodi fó apoiu ba kreximentu Indústria, Komérsiu no Turizmu, hodi kontribui ba dezenvolvimentu ekonómiku ho sosiál, iha áreas rurais no urbanas.

Governu hakarak nafatin kontinua aposta iha hadi'a sistema tranzmisaun no distribuisaun enerjia elétrika, no mós investe iha expansaun sistema enerjias renováveis.







### 3.4.1. Fornesimentu Eletrisidade

Governu sei fó prioridade ba asaun no metas tuirmai:

- Asegura katak populasaun tomak hetan asesu ba eletrisidade, iha 24 oras loron-loron, liuhosi expansaun Programa Eletrifikasaun nasionál no mós liuhosi uza fonte enerjias renováveis (PED 2015) - Iha capitais Munisípius hotu-hotu, nune'e mós iha Postos Administrativos, populasaun sei iha asesu ba eletrisidade 24/oras por dia. Maioria husi 461 suku no maioria Aldeias iha ona asesu ba eletrisidade. Kona-ba Ataúro, seidak halo duni estudo de viabilidade di'ak ida, atu bele konkretiza plano sustentável de eletrifikasaun ba illa iha ne'ebá.
- Analiza pontu situasaun iha zonas rurais, liuliu iha área remota sira, no desenvolve planu konkretu ida kona-ba eletrifikasaun rural, inklui liga redes ki'ikoan ba rede Nasionál ka oferece fontes enerjias renováveis;
- Haree fali Programa Eletrifikasaun Nasionál, hodi hadi'a produsaun no distribuisaun eletrisidade iha territóriu tomak no kontinua halo instalasaun no manutensaun ba liñas de média no baixa tensaun;
- Reeve organizaun setór Eletrisidade nian no implementa planu foun ida ba País;
- Reestrutura setór Eletrisidade hodi garante prestasaun servisu di'ak no fiskalizaun di'ak, hodi haree ba efisiénsia boot iha operasionál no iha ekonómika;
- Aprova no implementa Polítika Tarifária ida ne'ebé inklui tarifas ne'ebé la hanesan ba konsumidores ketak-ketak, ba partikulares, no mós ba komersiais ho industriais.
- Desenvolve liña transmisaun foun entre Camea no Komoro, harii subestasaun foun ho kapasidade 2 x 31.5 MW, hodi responde ba aumentu husi nesesidade fornimentu enerjia elétrika iha sidade Dili;
- Estuda no analiza possibilidade hodi implementa liña transmisaun ida Dili – Aileu – Maubisse – Betano, hodi sai hanesan alternativa ida ba fornimentu enerjia baihira iha sobrecarga;
- Implementa sistema kontrolu no servisu tékniku reparasaun ida, hodi garante fornimentu enerjia elétrika 24h (loron tomak);
- Estabelese sistema fa'an *online* ida ba “pulsa eletrisidade”.





### **3.4.2. Gás Naturál**

Timor-Leste iha asesu ba rezervas boot hosi gás naturál, iha Tasi Timor. Disponibilidade gás naturál ba produsaun eletrisidade iha potenciál atu oferese kombustível ida baratu no mós, bainhira kompara ho kombustível líkidu. Haree ba ambiente nian, ho kuantidade ne'ebé hanesan hosi eletrisidade produzida, emisaun carbono husi eletrisidade ne'ebé prodús husi gás naturál ne'e, konsidera ki'ik liu duke eletrisidade ne'ebé prodús husi diesel.

Ho ona asinatura Tratadu Fronteiras Marítimas entre Timor-Leste no Austrália, Governu sei hahú negosiasaun ho kompañias petrolíferas kona-ba dezvoltimentu kampu Greater Sunrise no buka atu garante konstrusaun ba instalasaun prosesamentu gás, iha Kosta Sul Timor-Leste nian. Iha ámbitu ida ne'e, sei desenvolve estudu viabilidade ida kona-ba utilizasaun gás naturál hodi produz eletrisidade, sei halo esforsu hodi utiliza enerjia ne'ebé bele gasta menus no bele tulun iha problema ambientál.

### **3.4.3. Enerjias Renováveis**

Fontes ba Enerjias renováveis bele kontribui ba kreximentu ekonómiku no hamenus nível kiak iha áreas rurais remotas. No mós kontribui ba ambiente ne'ebé ladún poluídu no bele hamenus impaktu ba alterasaun klimátika, tuir kompromisus ne'ebé assume iha Konvensoens Internasionais.

Iha ámbitu ida ne'e, sei halo fali estudu hodi haree ba implementasaun projetu produsaun enerjias renováveis ne'ebé la poluente, hanesan mós:

- Enerjia hidroelétrica ne'ebé produz ho rekursu hosi Bee, tuir estudu viabilidade kona-ba potenciál projetus hidroelétrikus;
- Enerjia eólica: tuir estudus preliminares ne'ebé halo ona, liuliu iha rejiaun foho, ne'ebé iha potenciál hodi instala turbina eólica, hanesan mós parke eólica iha Lariguto no Bobonaro;
- Enerjia solár: kontinua desenvolve estudus no promove iniciativa ne'ebé uza klima favorável Timor-Leste nian no taxa luz solár loron-loron, hodi halo instalasaun ba sistema produsaun enerjia solár;
- Enerjia biomasa: desenvolve estudus no projetus ba produsaun enerjia liuhosi ai-horis, lixu agríkola no lixu animál nian, hanesan mós lixu doméstiku no industriál, ne'ebé bele transforma ba biomasa no konverte ba eletrisidade.





Nune'e, Governu sei hala'o asaun hirak hanesan tuir mai:

- Kria Gabinete Rekursus Naturais Renováveis, ne'ebé koordena asaun iha nível intersetoriál, halo análise no estudus de viabilidade kona-ba setór ida ne'e, no ne'ebé sei responsabiliza ba implementasaun projetus enerjias renováveis, inklui jestaun, monitorizasaun no avaliaun (parte balun, inklui ona iha objetivus PED);
- Kontinua investe iha programa eletrifikasaun rural, liuhosi apoiu tékniku no finanseiru ba comunidade, hodi halo produsaun no utilizaun fonte enerjias renováveis;
- Asegura katak metade hosi nesesidade kona-ba enerjia elétrika ne'e sei mai hosi fonte enerjias renováveis (PED 2020);
- Hahú filafali estudu viabilidade kona-ba potenciál hodi harii Mini-Ídrikas iha territóriu tomak;
- Harii Sentrálarigutu no Bobonaro, hanesan modelu ba dezvoltamentu eólico (PED 2015);
- Garante katak, pelu menus besik famílias 100.000, bele asesu ba sistema enerjia solár (PED 2020);
- Dezenvolve poténsia enerjia solar, liuhosi Sentru Solár Dili (PED 2015);
- Dezenvolve estudu viabilidade ida ba konstrusaun sentrálar termoelétrika hodi prodús enerjia hosi lixu doméstiku no industriál iha Dili (PED 2015).

### **3.5. Transportes**

Kria kondisaun ba kreximentu ekonómiku, hadi'a no aumenta sirkulasaun ema no sasán, ne'e fundamental hodi implementa vizaun ne'ebé hatúr iha Planu Estratéjiku Dezenvolvimentu Nasionál 2011-2030.

Nune'e, urjente atu hadi'a sistema transportes terrestres, marítimus no aéreo no kria sistema previzaun meteorolójika ida ne'ebé, entre sira seluk, bele oferese seguransa liuliu kona-ba sirkulasaun aérea. Ho ida ne'e, Governu sei haree fali pontu situaun kona-ba setór transportes, hodi aprova Planu Mestre Integradu Transportes nian, hadi'a kapasidade institusionál iha setór ida ne'e no fó kapasitasaun, hodi forma rekursus umanus ne'ebé presiza.

Sei kontinua atu aprova Lei ne'ebé presiza no implementa kadru legál ne'ebé vigora hela, ho forma integrada, atu garante seguransa transporte, no asegura koordenaun intersetoriál. Sei





hadi'a mos seguransa Sistema Transportes Públikus nian, liu husi implementasaun estrutura ida hodi rejista, analiza no hato'o relatóriu kona ba atividades ne'ebé relasiona ho transportes, tamba bele hakanek, halakon vida, ka halakon ka estraga ema nia sasán. Estrutura ne'e sei mos investiga asidentes transporte nian no hato'o rekomendasoens kona-ba seguransa rodoviária.

### 3.5.1. Transporte Terrestre

Governu sei kontinua dezenvolve Transportes Terrestres, inklui dezenvolvimentu infraestruturá no instalasoens de apoiu ba transportes terrestres, públiku no privadu. Ida ne'e inklui sinalizasaun rodoviária, ne'ebé adekuada, no garante ba nia kumprimentu, iha País tomak.

Ba áreas urbanas, sei kontinua hadi'a medidas ba jestaun tráfégu, atu bele responde ba situasoens espesífikas ne'ebé mosu. Teknolojia trafegu nian hanesan utilizaun sistema inovador ba transporte (hanesan, intersesoens ne'ebé uza sinalizasaun moderna ona hodi halo monitorizasaun ba tráfégu) sei aplika hodi hadi'a jestaun tráfégu atu garante seguransa ba pasajeirus. Governu sei halo esforsus hodi dezenvolve, aprova no implementa polítika Nasionál ida ba prevensaun no seguransa rodoviária.

Nune'e mós sei hadi'a kondisoens ba konfortu no seguransa ba pasajeirus iha transportes públikus. Sei haree mos atu introduz Sistema transportes públikus ho vias ka diresaun ne'ebé proprias, hodi aumenta qualidade no fasilita pasajeirus bele hetan transporte públiku ne'ebé konfortável, efisiente no mós seguru.

Iha ámbitu ida ne'e mós, ho hanoin atu hadi'a servisu sira de transporte públiku, ne'ebé agora iha daudauk, Governu sei halo esforsu hodi loke tan no moderniza instalasoens de apoiu, hanesan terminais no mós fatin atendimentu ba públiku.

Buka mós atu asegura akompañamentu ne'ebé permanente ba operadores atividade ne'e nian, hodi enkoraja atu hadi'a sira-nia servisu no kumpre leis ne'ebé vigora, ida ne'ebé sei sujeita ba prosesu revizaun hodi hadi'a di'ak liu tan.

Ikusliu, Governu sei halo revizaun kle'an ba Kódigu estrada nian, hodi haree liuliu ba aumentu seguransa nian, no hodi prevee kriaun aulas obrigatórias molok halo ezame kondusaun, no hodi estabelese formasaun espesial ba ema ne'ebé kondús veíkulu transporte koletivu pasajeiru no ba ema ne'ebé kondús veíkulu pezadu transporte merkadorias.





### 3.5.2. Transportes Marítimus

Dezenvolvimentu infraestrutur portuária, fundamentál tebes atu permite katak Timor-Leste importa sasán no ekipamentus ne'ebé presiza, hodi haforsa no diversifika ekonomia Nasionál. Investimentu ba Sistema portuário Nasaun-nian sei haree tuir (ka akompaña) projeto Portu Tibar nian. Sei hadi'a di'ak liután efisiénsia operasionál, inklui mos dezenvolvimentu ka konstrusaun portus rejionais foun, hodi asegura katak transporte marítimu sei kontinua hanesan opsau viável ida ba transportasaun ema no sasán, hodi fó vantajen ekonómika, liuliu ba comunidade peskadores.

Ho nune'e, Governu sei:

- Hadi'a instalasaun portuária iha Com no Ataúro;
- Harii instalasoens portuárias iha Kairabela/Vemasse, hodi fasilita asesu ba Tasi no apoiu iha setór turizmu;
- Kontinua implementa modelu Parserias Públiku-Privadas, ne'ebé uza hodi konstrói tiha ona Portu Tibar, ne'ebé determinante ba dezenvolvimentu komérsiu no indústriia iha teritóriu tomak;
- Asegura funsionamentu Portu Tibar, nu'udar instalasaun prinsipál portuária Nasaun-nian;
- Hala'o estudu viabilidade ba konstrusaun portu Manatuto no ba kriaun liña marítima Nasionál ida, hodi fasilita transporte husi portu ida ba portu seluk no ba ligasaun kosteira, nune'e mós hodi presta servisu transporte marítimu ba ema no kargas, iha pontus litorais (ka iha tasi ibun) oioin, iha ita-nia País;
- Reestrutur no moderniza Portu Dili no muda fali ba Marina da Sidade no Portu ba Kruzeirus nian;
- Haforsa regulador no Autoridade Marítima nian, inklui hadi'a no halo modernizasaun ba nia padraun regulatóriu;
- Implementa sistema sinalizasaun marítimu (faról sira) iha Ataúru, Maubara, Baucau no Com, hodi promove seguransa navegasaun no tráfégu marítimu internasionál iha águas nacionais (zona tasi Timor-Leste nian);





### 3.5.3. Transportes Aéreos

Transporte aéreo sai nu'udar servisu-xave ida, ba movimentu ema no sasán mai ita-nia Rain no husi ita-nia Rain ba rai-li'ur. Nune'e, ninia seguransa hetan papel importante atu bele dudu dezentovimentu industria turística, komérsiu no negósius seluk. Atu bele hetan konfiansa ba ligasoens entre Timor-Leste no destinos rejionais no internasionais, Governu sei esforsa atu kria kondisoens ba aumento voos regulares ho opsoens barak.

Atu atende ba kreximentu número pasajeirus nian, konstrusaun/expansaun Aeroportu Internasionál Presidente Nicolau Lobato sei hetan implementasaun. Investe iha transporte aéreo ne'e fundamentál, hodi responde ba tráfejo aéreo barak iha futuru, ne'ebé asosiadu ho kreximentu ekonómiku Nasaun nian.

Nune'e, Governu sei:

- Implementa Política Nasionál Aviasaun Sivil;
- Reorganiza Administrasaun Aeroportos no Navegasaun Aérea Timor-Leste nian (ANATL) hanesan operador aeroportu Timor-Leste nian, inklui desenvolve análise kona-ba opsaun iha refsorsu ba kapasidade iha área kontratasaun no jestaun;
- Aumenta kapasidade Autoridade Aviasaun Sivil Timor-Leste (AACTL) hodi regula didi'ak setór transportes aéreos;
- Dezenvolve Planu Diretor ba Aeroportu Internasionál Prezidente Nicolau Lobato, iha Dili, no halo hotu ninia expansaun, inklui pista no asegura kondisoens nesesárias, atu nune'e aeroportu ida ne'e iha kapasidade ba sirkulasaun pasajeirus besik millaun ida, iha kada tinan, ho padraun seguransa ne'ebé aas liu;
- Dezenvolve estudu viabilidade ba aeroportus munisipais, ne'ebé iha artikulasaun ho Planu diretor aeroportu internasionál nian, ho objetivu atu kompleta rede aeroportus munisipais, ne'ebé totalmente operasionais, inklui iha Suai, Baucau, Oe-Cusse-Ameno, Lospalos, Maliana, Viqueque, Same no Ataúro;
- Operasionáliza Aeroportu Suai nian.
- Dezenvolve mekanizmu ne'ebé presiza hodi halo kontrolu efetivu husi espasu aéreo nasional;
- Kria kadru legál ida atu halo kontrolu efetivu husi espasu aéreo nasional.





### 3.6. Meteorolojia no Jeofízika

Kontinua dezenvolve sistema de meteorolojia no jeofízika ida, atu fó apoiu ba nesesidades iha áreas: aviasaun sivíl, navegasaun marítima, agricultura no servisu públikus.

Nune'e, Governu sei realiza estudu ida, atu haree ba possibilidade atu kria Laboratóriu de Meteorolojia no Jeofízika ida, identifika nesesidades iha rekursus umanus, hodi elabora planu investimentu ida no tau hanoin ba kriasaun mekanizmus ba kooperasaun bilaterál, hodi komesa produz dadus ne'e no kria kondisaun hodi disponibiliza informasaun meteorolójika no jeofízika ba públiku, ho forma ida ne'ebé regulár no viável.

### 3.7. Telekomunikasoens

Teknolojias Informasaun no Komunikaun (TIC) sai hanesan ferramenta vitál ida, atu bele fasilita Ekonomia Dijital, nu'udar setór foun ba kreximentu ekonómiku no mós ba promosaun ba boa governasaun. Governu sei asegura katak ita-nia Nasaun iha rede telekomunikasoens ne'ebé fiável (katak bele fiar ba), ho kualidade no segura, ne'ebé krusiál ba dezenvolvimentu sócio-ekonómiku ba populasaun Timor.

Infraestrutura TIC hetan ona progresus signifikativus, hafoin introdusaun ba merkadu telekomunikasoens ne'ebé kompetitivu, hahú iha 2012. Kobertura ba servisu sira telefone (rede 2G) hetan ona 96% husi áreas hela fatin populasaun nian, no asesu ba servisu dadus 3G nian, disponivel ona iha Munisípiu sira hotu, no mós servisu 4G nian foin hahú daudaun iha Sentros Urbanos. Ho rezultadu ne'ebé atinje ona, iha servisu telefone nian, dezafiu foun iha setór Telekomunikaun mak hanesan dezenvolvimentu redes no servisu sira ba banda larga.

Governu Timor-Leste sei kontinua dezenvolve esforsus, atu kria rede Telekomunikasoens ida ne'ebé moderna, hodi bele ema hotu iha ligasaun (ka koneksaun) ba malu, iha Timor-Leste, no entre Timor Leste ho mundu, hodi hasai proveitu másimu hosi avansus iha telekomunikaun globál, inklui produsaun, difuzaun no hetan no uza koñesimentus ne'ebé iha.

Nune'e, Governu iha asaun no metas hanesan:

- Implementa sistema kabu submarinu (ka husi tasi-okos) ba fibra ótika, ne'ebé konfiável, hodi liga Timor-Leste ba instalasaun (ka facilidades) aterrajen, liu husi kabu, iha Rejiaun, ne'ebé permite ita-nia País hetan kapasidade no liñas de transmisaun ne'ebé kompetitivu hodi fó koneksaun ba iha Sentru Globál distribuasaun IP nian.





- Formula no implementa planus ne'ebé presiza, hanesan Planu Nasionál ba Banda Larga, Planu Nasionál ba Seguransa Sibernética, Planu kona ba Governu Elektroniku, Planu Infraestrutura ba Ekonomia Dijital nian, no mós Planu ba Migrasaun Televizaun Dijital Terrestre (DTTB) nian, atu bele sai matadalan ba direasaun jerál polítika nian no bele orienta intervensoens kona-ba implantasaun no dezvoltimentu infraestruturas;
- Kria estrutura ida ba Seguransa Sibernética no infraestrutura kritika. Entidade ida ne'e sei funsiona hanesan Ajénsia Nasionál atu halo supervizaun ba estratéjia kona-ba seguransa sibernética, operasoens no mós dezvoltimentu kapasidade, nune'e mós atu supervizona polítika, projetu no programa de dezvoltimentu iha infraestrutura kritika ne'e;
- Promove kapasitasaun iha área Siénsia no Teknolojia, ne'ebé presiza atu impulsiona (ka dudu) kreximentu ekonómiku foun, Governu sei haforsa Rede Peskisa no Ensino Nasionál (TLREN) inklui aplika bandwidth ka banda larga, ba kedas sistema kabu submarino nian ba TLREN, hodi benefisia ka ajuda institusoens, peskiza nian ka ensinu superior nian, iha País;
- Reforsa no kapasita Autoridade Nasionál Komunikasoens (ANC), inklui hadi'a no moderniza ninia quadru normativu, atu bele responde di'ak liu ba avansus teknolójikus no ba mudansas iha merkadu, relasiona ho konverjénsia (ka tendénsia atu ba fatin/hanoin/ida de'it), iha teknolojia;
- Desenvolve instalasaun ba Internet Exchange neutrál (“carrier-neutrál Internet exchange point”) ba operadores atu bele garante transmisaun dados ne'ebé lais no seguru, entre forneseadores servisu Internet (ISPs) iha rai laran;
- Asegura kobertura ba telemóvel ne'ebé fiável, segura no asesível ba timoroan hotu, inklui iha áreas rurais;
- Haforsa kapasidade Ekipa Resposta ba Incidentes Seguransa Komputador nian (TL-CSIRT), hodi garante asesu seguru no asesível ba internet, iha território Nasionál tomak;
- Promove ligasaun iha internet ba Sistema Nasionál Edukasaun nian tomak no mós ba Sistema Nasionál de Saúde tomak, nu'udar setores ne'ebé primárius;
- Konstrói servisu sira Governu Elektroniku, hodi atualiza redes iha Governu.







### 3.8. Servisu Postál

Servisu Postál nu'udar servisu públiku, importante tebes ida, ne'ebé permite haruka korrespondénsia, livrus, publikasoens no enkomendas selu-seluk, iha territóriu Nasionál laran, ho presu ne'ebé asesível, hanesan mós haruka korrespondénsia no sasán ba estranjeiru.

Iha área ida ne'e, Governu iha hanoin atu:

- Reforma no desenvolve Correios de Timor-Leste, ba servisu sira ne'ebé efisiente liu, lais no asesível, ho hanoin atu kria pólos munisipais ho ligasaun ba Servisu sira Sentrais;
- Introduz ka hahú tau sistemas foun no modernus iha Correios de Timor-Leste nian, ne'ebé fó kapasidade atu bele haruka no entrega enkomendas to'o iha nivel Postus Administrativus, iha rai laran tomak;
- Desenvolve Planu Dezenvolvimentu Servisu Postál nian, inklui loke to'o iha Munisípiu sira.





#### 4. KONTINUA HO DEZENVOLVIMENTU EKONÓMIKU

*“Timor-Leste, sai País ho rendimentus ki’ik ho setór privadu ne’ebé emerjente, ho diversifikasaun ekonómika limitada no konsentrada de’it ba produsaun agríkola. Biar nune’e, ita-nia País iha oportunidades ekonómikas ne’ebé konsideráveis (boot no barak) no potenciál ida forte atu sai Nasaun ida ho rendimentus médius”.*

Apezarde progresus barak ne’ebé alkansa tiha ona, iha área ida ne’e, Timor-Leste tenke kontinua investe iha Planeamentu Estratéjiku ba Ekonomia ida, moderna no diversifikada. Atu poténsia (ka hakbiit) setores produtivus hale’u indústrias esensiais tolu – agrikultura, turizmu no petróleo – liuhusi estudu no aproveitamentu rekursus naturais ne’ebé iha, hodi aproveita dadauk mais-valia ne’ebé mai hosi lokalizasaun jeográfika no hosi perfil populasaun nian, sai estratéjia simples no asertada ida, atu lori ba diversifikasaun ekonómika, ne’ebé nesesária teb-tebes hodi reduz dependénsia ba reseitas petrolíferas.

Kriasaun de empregu no promosaun empriendedorizmu sai, au mezmu tempu, faktor no rezultadu atu materializa hanoin no vizaun kona-ba dezenvolvimentu ekonómiku ida ne’e, maske Governu tenke kria kondisoens hodi labele hadok fali jovens, hodi mós promove setór privadu no rekursus hirak ne’e mak fundamentál atu aumenta produtividade Nasionál, hodi kria oportunidade kreximentu ekonómiku ne’ebé sustentável. Ba ida ne’e, Governu sei hamosu mekanizmus jurídikus no polítikus hodi estimula kreatividade, inovasaun no diversifikasaun ba ekonomia Nasionál.

Nune’e, Governu Timor-Leste sei: transforma rikezas naturais Timor-Leste nian, ne’ebé mai husi Rain no husi Tasi, ba iha seguransa ai-hán (seguransa alimentar), iha saúde, iha produtividade no iha oportunidade ba kriasaun de empregu. Sei mos transforma idrokarbonetus ba oportunidade dezenvolvimentu no moris-di’ak (bein-estar) ba populasaun tomak, liuhusi dezenvolvimentu infraestrutura, setór privadu no kriasaun de empregu. Sei transforma mós rikeza hosi nia emar sira, hosi ninia paizajen naturál no hosi ninia kultura ímpar, ba empriendedorizmu no ba aumentu rendimentu iha País tomak.

Ba ne’e, esensiál duni dezenvolve Kuadru Nasionál Planeamentu ida, ho vizaun ba implementasaun Polus de Dezenvolvimentu, iha rejioens iha País laran, ne’ebé define karakterístika própria rejiaun ida-idak nian no potenciál kreximentu setores no subsetores oioin, tuir lolós rekursus lokais ne’ebé disponíveis, atu implementa asoens no estratéjia ba kreximentu





sustentável no desenvolvimento ekuitativu (ka hanesan) iha País tomak, ho moto katak “se natureza ne’e rika, povu labele sai kiak”.

Estratéjia foun ida ne’ebé sei adota husi Governu Konstitusionál IX, ho objetivu atu halo diversifikasaun ekonómika no kreximentu sustentável ba nasaun ne’e, maka halibur hamutuk rekursus tasi nian ho forma sustentável ba paradigma foun ida desenvolvimento nasional nian.

Xefe Ekipa Negosiasaun ba Delimitasaun Definitiva Fronteira Marítima nian (dezde tinan 2016), hetan mós nomeasaun, iha fulan-dezemburu tinan 2019, hodi sai Representante Espesial Governu Timor-Leste nian ba Ekonomia Azul, hodi fornese advokasia koordenada iha nivel nasional no internasionál no apoia no lidera asuntu sira ne’ebé relasiona ho Ekonomia Azul Timor-Leste nian.

Iha sentidu ida-ne’e, iha tinan 2021, hahú programa sensibilizasaun ida kona-ba importánsia área marítima sira iha Timor-Leste. Kampaña Sosializasaun ida-ne’e kona-ba Soberania Marítima – Ha’u-nia Tasi, Ha’u-nia Timor - hanesan kampaña ida ne’ebé ho nia objetivu atu promove konsiensializasaun kona-ba importánsia uniaun no apoiu nasional ba negosiasaun, hanesan dalan atu haforsa pozisaun país nian kona-ba ninia luta ba soberania marítima no, iha tempu hanesan, atu promove ekonomia azul, hanesan abordajen foun atu hasoru futuru país ne’e nian, ho partisipasaun hosi timoroan hotu no ho impaktu diretu iha dimensaun oioin ba país ne’e, inklui dimensaun ekonómika, sosial, ambiental no kultural.

Governu sei kontinua implementa kampaña *Ha’u-nia Tasi, Ha’u-nia Timor* no sei fó prioridade ba definisaun no implementasaun estratéjia ida ba desenvolvimento Ekonomia Azul iha Timor-Leste, ba kreximentu sustentavel nasaun ne’e nian, inklui prezervasaun, konservasaun no uzu sustentavel ba ita-nia rekursu tasi no promosaun ba iniciativa no programa sira ne’ebé ho objetivu ba sustentabilidade ambiental, ekonómika no sosial.

#### 4.1. Ekonomia Azul

Timor-Leste hanesan Estadu kosteiru ida ho zona marítima ne’ebé luan tebes. Ho tasi-ibun ida ne’ebé ho nia naruk no luan besik 700 km no potensial Zona Ekonómika Eskluziva (ZEE) kuaze 75.000 km<sup>2</sup>, identidade Timor-Leste nian metin iha tasi.

Tasi mak hatudu Timor-Leste nia pasadu no hanesan pilár ida husi nia vizaun ba futuru. Ba povu iha illa Timor-Leste, tasi maka sai hanesan parte integrante ba sira nia moris. Tasi iha signifikadu espirituál ida ba povu Timor. Tuir lenda, timoroan sira maka lafaek nia bei-oan – hafoin lafaek mate, nia isin nakfilak sai rai Timor, nia kotuk ruin nakfilak sai foho no foho-oan sira, no tasi maka





ninia hela-fatin ikus. Timoroan barak maka depende ba tasi hodi sustenta moris no meius ba subsisténsia, hodi peska no kaer espésie tasi, hanesan atún (ikan tasi ne'ebé isin barak no furak), kurita no du'ut tasi. Riku ahu-ruin iha meti-ulun no *íngremes falésias subaquáticas* (rai naruk iha tasi-ibun ne'ebé susar atu liu tanba hali'is makaas loos) ne'ebé hale'u Timor-Leste hanesan atrasaun krexente ida ba turista sira. Tanba ne'e, protesaun no prezersaun ba ambiente tasi ne'e fundamentál hodi proteje modu moris nian no dezenvolvimentu ekonómiku iha Timor-Leste.

Soberania marítima ne'ebé alkansa ona, hafoin asinatura no retifikasaun husi “Tratadu entre Repúblika Demokrátika Timor-Leste ho Austrália ne'ebé estabelese ninia fronteira marítima iha Tasi Timor nian”, posibilita atu investe iha dezenvolvimentu ekonómiku no sosiál bazeia ba rekursu ezistente iha área tasi soberana (peska, turizmu no indústria no servisu sira seluk) no bazeia ba rekursu ne'ebé iha tasi okos (setór petrolíferu no indústria no setór sira seluk ne'ebé iha ligasaun no setór ekonómiku). Oportunidade sira seluk ne'ebé maka sei habelar liután ho hetan totalidade ba direitu jurisdisaun marítima, liuhusi delimitasaun fronteira marítima permanente ho Repúblika Indonézia.

Iha sorin seluk, Timor-Leste komprometidu ho Ajenda 2023 ba Dezenvolvimentu Sustentavel, espesialmente, liuhusi apoiu no kompromisu ba Objektivu Dezenvolvimentu Sustentavel 14, ne'ebé prevee atu konserva no uza ho forma sustentavel, oseanu, tasi, no rekursu tasi sira ba dezenvolvimentu sustentavel, inklui mós no foin daudauk ne'e, kompromisu voluntáriu ho meta espesífika iha Konferénsia NasoensUnidas nian iha Novaiorke, iha fulan-juñu tinan 2017, ne'ebé daudaun ne'e presiza kompromisu foun ida.

Ne'e katak, Governu sei reforsa koordenasaun interna hodi promove kreximentu Ekonomia Azul nasional nian, rekoñese katak envolve setór atividade ekonómika oin-oin kona-ba tasi no oseanu, hasa'e sustentabilidade ba tradisional Ekonomia Tasi, hanesan: peska; extrasaun petróleu no gás offshore; transporte marítimu; instalasaun portuária, infraestrutura marítima no lojístika; turizmu; ensinu formasaun no investigasaun sientífika; enerjias renováveis iha oseanu no bioteknolojia mariña; defeza ba área marítima, seguransa ba ema no sasán, vijilánsia marítima no seluk-seluk tan.

Nune'e Governu sei promove esforsu hamutuk no dinámiku husi ministérius no entidades públikas oin-oin, liuliu sira ne'ebé iha responsabilidade iha área agrikultura no peska, meiu ambiente, negósiu estranjeiru, petróleu, administrasaun estatál, defeza no seguransa, ba dezenvolvimentu ne'ebé hetan susesu no sustentavel hosi Ekonomia Azul.

Tanba ne'e, uluk nana'in, ita sei define ita-nia vizaun no estratéjia no atu halo apura (determina) ita-nia valór nasional iha Ekonomia Azul, valór ida ne'ebé presiza atu hatene hodi transforma ita-





nia rikeza. Ida-ne'e sei hala'o ho envolvimentu forsa sosiedade timoroan sira nian hotu, liuhusi promosaun konsulta no diálogu, hodi promove dezenvolvimentu komunidadu sustentável, daudaun no iha futuru no hadi'a kreximentu ekonómiku no kria serbisu hodi halo ekilíbrüu ba atividade ekonomia no kapasidade longu prazu ekosistema tasi atu apoia atividade ne'e, hodi nun'e bele apoia protesaun tasi no oseau.

Objetivu nasionál foun ida-ne'e sei kontribui atu hametin ita-nia identidade marítima, kultura no valór marítimu sira, no atu dezenvolve koezaun nasionál iha prezervasaun ba bein universál ida-ne'e maka tasi.

Iha parte seluk, ne'ebé konsidera katak ita hakarak projeta Ekonomia Azul iha palku internasionál no promove imajen no dezenvolvimentu sustentavel Timor-Leste nian iha rai-li'ur, ita sei promove kampaña la'ós nasionál de'it, maibé mós kampaña ne'ebé orienta ba organizasaun no públiku internasionál sira.

Iha ámbitu ne'e, Governu sei buka atu dezenvolve inisiativa prinsipál sira hanesan tuir-mai ne'e:

- Elabora polítika ba Ekonomia Azul Timor-Leste nian, hodi haree filafali ba ezbosu Polítika Nasionál Tasi nian ne'ebé dezenvolve ona iha tinan hirak ikus ne'e. Polítika nasionál foun ida-ne'e tenke inklui definisaun no oportunidade ne'ebé relaciona ho setór ida-ne'e, benefísiu ekonómiku, sosiál no ambientál sira, definisaun polítika husi vizaun nasionál ida-ne'e no inisiativa ne'ebé sei dezenvolve ho forma kolaborante (ho kolaborasaun) no intersetoriál (entre setór oioin);
- Prepara planu asaun ba kurtu no médiu prazu atu implementa Polítika Ekonomia Azul Timor-Leste nian, tuir períodu orsamentu nasaun nian, ne'ebé inklui definisaun ba sistema partisipativu governasaun integrada, promosaun partisipasaun privada, inklui kontribuisaun finanseira hodi apoia projetu inisiativa privada sira, define lezilasaun ne'ebé sei pasa hodi apoia implementasaun inisiativa sira, haforsa defeza marítima nasionál no hasa'e kapasidade nasionál iha área peskiza, investigasaun no edukasaun, inklui revizaun kurrikulár no promosaun kampaña eskolár kona-ba oseau sira, ba formasaun "jersaun azúl ida";
- Promove kontaktu no estabelese parseria ho organizasaun internasionál espesializadu sira iha kestoens ne'ebé relaciona ho Ekonomia Azul, inklui protesaun no konservasaun ambiente tasi nian, kolaborasaun ho Estadu sira seluk, organizasaun internasionál no organizasaun naun-governamentál sira kona-ba dezafiu sira ne'ebé Timor-Leste hasoru





no solusoens ne'ebé posivel atu proteje ambiente tasi nian; no investe iha oportunidade sira ba kooperasaun internasionál;

- Forma no kapasita joven sira atu sira bele akompaña kriasaun empregu iha ámbitu Ekonomia Azul.
- Promove no komunika imajen Timor-Leste nian, iha nivel nasionál no internasionál, liuhusi kampaña Ha'u-nia Tasi, Ha'u-nia Timor, tuir konseitu TASI: Timor-Leste, Azul, Sustentavel no Inovadór, liuhusi iniciativa oioin, liuliu:
  - i. Estabelese Sentru Edukasaun Mariña ida, ho apoiu husi instituisaun internasionál sira, liuliu akadémika. Propoin atu dezenvolve planu sira ba estabesimentu Sentru Edukasaun Mariña ida, ne'ebé sei sai hanesan ánkora ba Ekonomia Azul Timor-Leste nian. Sentru ne'e sei fahe importánsia, espesifisidade no biodiversidade ambiente tasi Timor-Leste nian no kontribui ba literasia oseau ba Timoroan hotu-hotu nian, nune'e mós liuhusi dezenvolvimentu kampaña sira ne'ebé dirije ba instituisaun ensinu no joven sira, nune'e mós serve ba atrasaun turístika;
  - ii. Dezenvolve Planu Mestre ida ba Dezenvolvimentu Tasi-ibun Dili nian. Dili mak kapitál ida-ne'ebé furak liu iha mundu, ne'ebé hetan apoiu husi foho furak sira ne'ebé tun ba tasi tropikál. Klaru Tasi-ibun Dili nu'udar sidade nia oin no ofere se oportunidade boot atu sai foku ida ba moradór no turista sira - parte sentrál ida husi Ekonomia Azúl. Propoin atu dezenvolve Planu Mestre Tasi-ibun Dili nian atu kobre área ne'e husikedas Cristo Rei to'o Mota Comoro;
  - iii. Halo mapamentu no divulgasaun fatin luku sira Timor-Leste nian. Fatin luku sira "premium", iha mundu tomak, baibain halo mapeamentu hodi fasilita ninia uzu no promove tipu turizmu ida ne'ebé daudaun ne'e promovidu. Ami sei promove turizmu luku nian, ho sentru informasaun ne'ebé adekuada no apoiu ho infra-estrutura bázika hodi apoia atividade ida-ne'e;
  - iv. Hodi estabelese Parke Nasionál Mariñu Ataúru. Tasi sira iha Illa Ataúru konsidera ona hanesan biodiversidade ida ne'ebé boot tebes iha mundu, ho ahuruin iha meti-ulun ne'ebé signifikativu iha nivel mundiál. Maibé, ambiente tasi iha Ataúru frajil no vulneravel ba ameasa umana sira. Atu proteje biodiversidade Ataúru, promove turizmu no hadi'a *stocks* ikan sira ba peska artezanál (tradisionál), Timor-Leste bele konsidera hodi estabelese Parke Nasionál Mariñu ida iha Illa Ataúru;





- v. Halo avaliasaun ida ba biodiversidade no mapeamentu ba ahu-ruin sira iha meti-ulun ne'ebé sei realiza husi Parke Nasionál Mariñu Ataúru;
- vi. Estabelese Sentru Nasionál ida ba Regulamentasaun, Peskiza no Kontrolu Setáseus. Timor-Leste nu'udár fatin ida ne'ebé di'ak liu iha mundu tomak hodi observa baleia azul, golfiñu, no kaxalote, no hanesan fatin uitoan balu iha ne'ebé ema sira bele nani hamutuk ho animál sira ne'e. Oportunidade ida-ne'e foin maka koñesidu iha mundu tomak no aumenta ondas ida ba interese internasionál nian, ho taxa ba okupasaun embarkasaun nian ba observaun baleia ne'ebé aas;
- vii. Estabelese Área Tasi Protejida. Iha esforsu globál signifikativu ne'ebé desenvolve hela hodi deklarar área tasi Timor-Leste nian hanesan Área Tasi Protejida, hodi kapasita jestaun sustentavel ba rekursu no ekosistema tasi nian sira. Área tasi sira ne'ebé protejida bele asume forma oioin no tipu protesau no restrisaun oioin. Daudaun ne'e, Illa Ataúru iha Área Tasi Protejida hamutuk 13 ne'ebé jere iha nivel lokál, no apoia husi Konservasaun Internasionál no husi Sentru Triángulu Korál (Ahu-ruin nian). Nu'udar Estadu *costeiro* (ho ninia tasi-ibun sira), Governu ne'e sei apoia direktamente Área Tasi Protejida no kria área foun sira;
- viii. Estabelese Parke Pas Marítimu ida. Parke pas sira, liuhusi kooperasaun bilaterál, rejionál ka multilaterál, kontribui hodi proteje no jere ho forma sustentavel ambiente rai-maran no tasi no rekursu moris sira, ne'ebé estabelese área tasi transfronteirisa sira. Timor-Leste sei desenvolve esforsu hodi kria “parke” sira-ne'e ho prioridade atu halo kooperasaun ho Indonézia;
- ix. Desenvolve no implementa Planeamentu Espasiál Mariñu, iha âmbito Ekonomia Azul, hodi garante área mariña ida ne'ebé moos, saudavel, produtiva no biolojikamente diversifikada. Liuhusi Planeamentu Espasiál Mariñu, ami sei garante abordajen ida ne'ebé koordinada no sustentavel iha ita-nia tasi, hodi halo mapa no analiza uzu iha ita-nia área mariña sira. Inisiativa ida-ne'e inklui mapeamentu ba ita-nia rekursu mariñu sira, jestaun ba uzu tasi husi setór públiku no privadu, konservasaun área mariña sira ne'ebé destakada, protesau ba rota migrasaun baleia no jestaun ba uzu rekreativu, ho objetivu atu garante katak sei utiliza ita-nia tasi ho produtiva no sustentavel;





- x. Kombate lixu iha tasi, liuliu plástiku ne'ebé afeta maka'as liu ba saúde tasi-nian, liuhusi kampaña sensibilizasaun, limpeza rai-henek tasi no tasi-ibun no inisiativa sira seluk hodi monitoriza, kontrola, redús no halo mitigasaun ba lixu tasi no prezervasaun ba oseanu;
- xi. Prezerva no promove kampaña reflorestasaun ai-parapa. Ai-parapa sira ne'ebé distribui barak ona iha tasi ninin kosta norte no sul nasaun ne'e nian, importante tebes ba ambiente tasi, ba comunidade tasi-ninin no hodi halo mitigasaun ba efeitu sira husi alterasaun klimátika sira. Konsidera ekosistema tropikal natural hirak-ne'e nu'udar "ekosistema karbonu azul", no hodi garante katak Timor-Leste mantein ninia floresta ai-parapa ne'ebé luan, ami sei implementa política konservasaun ida, ne'ebé halo ho siénsia no apoiu grupu konservasaun nian. Inisiativa ida-ne'e sei inklui esforsu koletivu protesaun no reflorestasaun nian, hodi promove uzu florestal sira-ne'e ho forma sustentavel, no mós liuhusi kampaña edukasionál no envolvimentu husi comunidade tasi-ibun, ne'ebé kontribui mós ba destinu turístiku ne'ebé importante.

## **4.2. Agrikultura, Pekuária, Peskas no Florestas**

Dezenvolvimentu setór primáriu sai fundamentál ba País, ida ne'ebé besik 75% hosi populasaun hela iha áreas rurais no, iha ne'ebé, nível pobreza (situasaun kiak) sei aas tebes, ho debilidades (frakezas) seluk-tan ne'ebé relasiona ho pobreza.

Tanba ne'e, Governu konsidera Agrikultura hanesan baze ba dezenvolvimentu ekonómiku no sosial País nian. Melloramentu (maneira oinsá hadi'ak) setór ida ne'e, iha ligasaun ho oinsá hadi'a setór peskas no produsaun animál, atu, iha tempu badak nia laran, hadi'a qualidade no moris di'ak ba timoroan tomak. Nune'e, metas (ka target) Governu nian, mak atu hadi'a seguransa ai-hán (seguransa alimentar) Nasionál, reduz pobreza rural, apoia tranzisaun hosi kultura (agrikultura) subsisténsia nian ba produsaun emperezariál ba produtos agríkolos, pekuárius, peskas no florestais nian, hodi promove sustentabilidade ambiental no konservasaun rekursus naturais Timor-Leste nian.

### **4.2.1. Agrikultura**

Atu hodi kumpre objetivu ba nível seguransa aihán (seguransa alimentar) nian, Governu sei habelar setór agríkola, hadi'a prátika kultivu no produtividade agrária nian, dezenvolve asoens







hodi hadi'ak produsaun kulturais agríkolais espesífikas no sistemátikas, tuir lolós ho potenciál hosi rejiaun ida-idak país nian, hodi garante mós objetivu atu dezenvolve nasaun nia setores produtivus.

Metas no asoens, ba área ida ne'e, maka:

- Investe iha kriaun Laboratóriu Públiku ba Investigasaun Agríkola, ho vizaun atu dezenvolve programa investigasaun nian ba produsus agríkolais, ne'ebé konsidera hanesan prinsipais iha Timor-Leste. Hakarak hahú, nu'udar prioridade, iha produsus ne'ebé oferece potenciál boot liu no bele fó apoiu ba vertentes téknikas iha produsaun agríkola, ne'ebé garante no identifika, liuhusi análizes, rai ida-idak nia tipu (ka kompozisaun) no ninia qualidade, nune'e mós ba iha bee, ai-horis no fíni (semente), hodi bele haree oinsá atinje modernidade kompetitiva;
- Estabelese Institutu de Peskiza no Dezenvolvimentu Agríkola, ne'ebé sei halibur Agrónomus no Téknikus, atu hala'o peskiza, ezekuta no supervizona, iha territóriu tomak, estratéjias ba implementasaun sistema produsaun nian, hamutuk ho agrikultores;
- Estabelese mekanizmu hodi apoia tranzisaun agrikultura subsisténsia ida ba iha agrikultura moderna ho orientasaun ba merkadu;
- Implementa programas foun kona-ba agrikultura biolójika, inklui aposta ba ninia komersializasaun iha nível internasionál, liuhusi kampaña marketing nian;
- Kontinua hametin implementasaun husi Polítika Nasionál Seguransa Ai-hán (Seguransa Alimentar) nian;
- Reabilita, habelar/expande no hadi'ak jestaun ba sistemas irrigasaun no ba armazenamento bee, fundamentál ba kultivu agríkola, no halo revizaun ba inventáriu sistemas irigasaun ne'ebé iha;
- Kontinua investe iha estudu no konstrusaun ba sistema irrigasaun nian, tuir téknika no metodolojia sira ne'ebé moderna liu, viável no resistente ba kondisaun klimátika sira;
- Hadi'a jestaun ba sentrus manutensaun Tratores nian hodi garante funksionamentu operasionál, iha uzu tratores atu tulun agrikultores;
- Halo mapeamentu kona-ba zonas agro-ekolójikas ba utilizasaun sustentável, ba mákinas no ekipamentus agríkolais, ho referénsia ba estrutura fízika rai-nian;





- Kontinua investe iha akizisaun no manutensaun de máquinas no ekipamentus agríkolos atu apoia agrikultór sira;
- Hadi'a ka hakbiit servisu husi Extensionistas no jestaun husi programa sedénsia tratór agríkola sira, hodi tulun agrikultór sira;
- Kontinua implementa sistema Mekanizasaun Agríkola, hodi apoia programas extensifikasaun, intensifikasaun no diversifikasaun, atu aumenta produsaun no produtividade agríkola;
- Halo estudus kona-ba harii barrajens iha Timor-Leste no implementa projetu-pilotou barrajen no aproveitamentu lensóis freátikus (katak bee-lihun iha rai-okos);
- Hadi'a jestaun no manutensaun rai ba kultivu, hodi hametin-tan formasaun ba agrikultores no empresas agríkolos;
- Asegura katak Timor-Leste bele atinje 70%, iha produsaun fós, to'o iha tinan 2028, hodi hetok hadi'a liu-tán téknikas no sistemas ba produsaun háre;
- Kria kondisoens atu aumenta área ba natar ne'ebé hetan irrigasaun, hodi atinje hectares 50.000, iha tinan 2028;
- Reforsa Servisu sira Estatística, Informasaun no Previzaun agro-klimátika;
- Reforsa facilidades iha servisu sira kuarentena nian, atu implementa protokolu, padraun, baze dados ba sanitáriu no fitosanitáriu (SPS), hodi facilita importasaun no exportasaun produsus agríkolos no garante interoperabilidade husi sistema Janela Únika;;
- Kontinua promove atu uza sistemas espesifikus iha produsaun fós, iha jestaun kolleitas ne'ebé integradas no sistemas ba intensifikasaun fós;
- Kontinua iha esforsu atu reduz lakon (ka, perda) iha produsaun liuhosi kontrolu pestes no iha pós-kolleita, liuhosi hadi'a sistema kolleita, dulas, no jestaun ba armazenamentu fós, batar, sereais no produsus seluk;
- Kontinua fó subsidiu ba produtores fós, batar, 'shorgum' no produsus bázikus seluk hodi hola sementes, fertilizantes no pestisidas, atu bele aumenta produtividade, nune'e mós atu apoia hadi'a efisiénsia iha prosesu depois de rekolla ba produstu sira ne'e rasik;
- Fó akonsellamentu finanseiru no asisténsia iha komersializasaun ba fós, batar no sereais no produsus seluk, ba produtores ida-idak;





- Asegura área kultivo ba batar atu bele atinje to'o 76.500 hectares iha tinan 2028, ka aumenta produtividade média batar ba 2,5 toneladas kada hectar;
- Aumenta 'area kultivu ho raíz no tubérlukus, hosi 48.000 hectares ba 80.000 hectares iha 2028;
- Kontinua investe iha peskiza, dezenvolvimentu no divulgasaun kona-ba variedades kultura agríkola, ne'ebé espesifika ba Timor-Leste, hanesan mós sereais (fós, batar, trigo, sevada no senteiu), ai-farina, fehuk-midar no koto-nurak;
- Introduz zonas agríkolos, atu identifika áreas ne'ebé adequadas liu ba kultivu no komersializasaun batar no alimentus bázikus seluk, hanesan aifarina, koto-nurak, fehukmidar no sereais oioin;
- Fó formasaun ba produtores batar no sereais, ka produtores alimentus bázikus seluk, kona-ba uzu makinaria agríkola no téknika jestaun agríkola nian, hodi kontinua fahe Tratores manuais no apoia ninia uzu;
- Integra atividades agríkolos ho empresas familiares, hanesan mós prosesamentu produsus agríkolos ka uzu rezíduos agríkolos hanesan fertilizantes orgánikus no alimentu ba animais;
- Dezenvolve no loke tan programas especiais atu apoia ba batar, 'shorgum', ai-abut/raízes no tubérkulus, iha comunidades rurais;
- Dezenvolve no promove sistemas alimentasaun ba karau, husi excedentes (ka saida maka resta) husi batar, ai-abut/raízes no tubérkulus;
- Investe iha produsaun ai-fuan no produsus hortíkolos (ka modo-tahan) hodi substitui importasaun, hodi enkoraja fornimentu ai-fuan ho valór aas (ka folin boot) ba merkadus urbanus;
- Apoia produsaun produsus hortíkolos (modo-tahan) ho eskala boot, ne'ebé besik Sentrus urbanus, liuhusi protokolu ba fornimentu iha merkadu, restaurantes no hotéis;
- Elabora peskizas no estudus investimentu, kona-ba atu sukat (afere) potenciál ba dezenvolvimentu Idroponia nian (téknika kuda ai-horis la ho rai), liuhusi projetu-pilotu ida ne'ebé permite produsaun imediata hosi produsus hortíkolos biolójikus;
- Kria tán insentivus no kontinua apoia agrikultores atu produz kulturais ne'ebé bele fó rendimentu, hanesan kafé, nú, baunilla, kajú, fore-keli, fore-rai, pimenta, açafraão, gengibre





(ai-lia), ai-kanela, kolorau no nóz moscada, inklui mós ninia prosesamentu no transformasaun ba iha produsus doméstikus, ho vizaun atu kria merkadu foun;

- Halo levantamentu ida kona-ba kuantidade no qualidade armazéns ne'ebé disponíveis ba armazenamentu (rai no halot) sereais no produsus agríkolos granulares, koto, favas, ervillas, fore-keli, no seluk-tan;
- Fortalese koordenasaun interministeriál no koordenasaun ho instituisoens relevantes seluk, kona-ba implementasaun no kontrolu servisu sira iha setór agríkola;
- Sukat (afere) no investe, hanesan prioridade, iha kulturadas rendimentu ne'ebé iha poténsiál bot atu hetan promosaun ba eskala komersiál.

#### 4.2.1.1. Kuda Kafé

- Kontinua apoia produsaun no promosaun Kafé orgániku ho qualidade di'ak, inklui mos liuhosi promosaun kafé Timor iha nível Nasionál no internasionál;
- Hadi'a produsaun kafé, liuhosi rehabilitasaun ba plantasoens kafé nian;
- Kontinua dezenvolve estudus no programas de peskiza kona-ba kafé;
- Kontinua apoia Asosiasaun Kafé Timor Timor-Leste (ACTL) no, ho parseria ho setór privadu no parseirus dezenvolvimentu, kontinua implementa Planu Dezenvolvimentu Setór Kafé nian;
- Reeve programa hodi fó estímulo ba renovasaun no expansaun husi área plantasaun kafé, ne'ebé aprova liuhusi Dekretu-Lei nu. 27/2022, lora 19 fulan-maiu, hodi fó resposta ba situasaun no nesesidade atuál sira setór nian;
- Kria programas founs kona-ba promosaun indústrias doméstikas nian, iha prosesamentu rezíduos husi plantasoens, liuliu kafé, ba fertilizantes orgánikus no hahán ba animais, no hosi rezíduos iha plantasoens nú ba materiál no sasán (beins) doméstiku;
- Halo estudu viabilidade kona-ba kriaun empreza públika atu halo komersializasaun kafé nian.





#### 4.2.2. Pekuária

Setór kriasaun animais, iha País, iha potenciál bot atu kontribui ba melloria iha nutrisaun ba povu timor, tantu liuhusi asesu no konsumu ba na'an fresku, no mós hosi susuben (latisíniu). Atu hadi'a setór ida ne'e, nesesáriu atu investe iha rasoens (animal-nia hahán) ne'ebé asesíveis (ka, fásil atu hetan) no ho qualidade, hodi asegura vasinasaun no desparasitasaun animais. Agora dadaun, excedentes no resíduos husi produsaun agríkola, la suficiente atu kria indústriia doméstika ba prosesamentu rasaun ba animias, ida ne'e significa katak, karik iha melloria iha agrikultura, hanesan aumentu iha kultivu, ka karik iha ona fontes proteina nian, ne'ebé disponíveis, liuhusi reziduos ikan-nian, sei bele iha melloria ne'ebé substansiál (ka boot), iha área Pekuária.

Governu sei buka atu aumenta produsaun animál, ba 20%, to'o tinan 2028, ho objetivu atu hamenus importasaun produsus animais hosi estranjeiru. Metas no asoens atu alkansa dezvoltimentu Pekuária nian maka:

- Kontinua investe iha kampañas vasinasaun animál no fornimentu vasinás gratuitas no habelar programas hirak ne'e, ba territóriu tomak;
- Implementa sistema jestaun kontrolu ida ba animál nia moras;
- Kontinua investe iha akizisaun no manutensaun mákina no ekipamentu pekuária no veterinária nian hodi apoia ema sira ne'ebé hakiak animal;
- Kontinua kampañas nasionais ba divulgasaun kona-ba kuidadu sira bázikus de saúde animál no melloria iha nutrisaun animal;
- Investe iha edukasaun no formasaun setór ida ne'e, ba estabelesimentu klínikas veterinárias ho profesionais espesializadus, hodi kontinua mós desenvolve Sentrus de Desenvoltimentu no Treinamentu Pekuáriu;
- Estabelese infraestruturas públikas, ne'ebé nesesárias ba assisténsia veterinária, hodi envolve produtores de animais;
- Estabelese Sentru de Investigasaun ba Produsaun Animál, atu hatene lolós espésies, por ezemplu karau, ne'ebé bele adapta di'ak liu ba kondisoens Timor-Leste nian, hadi'a qualidade jenética nian, técnicas reproduasaun seletiva nian, no kontribui hodi hadi'a parámetros (sasukat) seluk ba produsaun, hanesan taxa mortalidade, taxa hahoris no aumenta todan iha lora-lora;
- Apoia estabelesimentu Asosiasaun Haki'ak Karau (Asosiasaun Kriadores de Gadu), hodi fasilita ninia atividades no ninia polítikas no inisiativas;





- Dezenvolve sistemas espesiais ba produsaun manu no fahi;
- Promove kriasaun empresas ki'ik atu apoia pekuária, inklui infraestrutur freijerasaun nian, triajen, prosesamentu no embalajen (ka falun) na'an, ho vizaun ba dezenvolvimentu indústriá pekuária ida, ne'ebé segura no ho kualidade;
- Hala'o kampañas hodi hatudu no hanorin oinsá prosesa (ka, transforma) rezíduos animais ba fertilizante orgániku;
- Promove asesu ba Instituisoens financeiras no promove kooperasaun ho investidores;
- Asegura estabelesimentu parserias ho setór privadu, Nasionál no internasionál, ba kreximentu setór Pekuáriu iha País;
- Inkrementa (haburas) prosesu transformasaun no exportasaun ba produsos pekuária nian (hanesan, haki'ak karau-timór ba produsaun susu-ben no keiju);
- Kriasaun servisu sira descentralizadus hodi fó apoiu ba produtores lokais, kona-ba esklaresimentu dúvidas, sosializasaun ba kampañas veterinárias (vasinasaun, moras, no buat seluk-tan) no kona-ba kontrolu populasaun hosi espésie ida-idak;
- Kontinua dezenvolve pastajen sira (animál hán fatin) no formulasaun rasoens (hahán) ba animál nian;
- Kontinua investe iha sistema kriasaun animál, hosi sistema tradisionál ba semi-intensivu no intensivu, no kapasitasaun ba téknikus no agrikultores.

#### 4.2.3. Peskas

Timor-Leste iha liña kosteira ida, liu Km 700, no Zona Ekonómika Eskluziva ida ho besik 72.000 km<sup>2</sup>, ne'ebé signifika asesu ba rekursus marítimus (rekursu tasi nian) ho potenciál boot ida ba esplorasau, iha ámbitu setór peskas nian, tamba Munisípiu rua de'it, Aileu ho Ermera, mak laiha asesu ba kosta (tasi ninin).

Iha lidun seluk, besik ba tasi-ibun (costa) sei bele tán dezenvolve atividades akuakultura nian, hanesan hasai budu-tasi no hakiak boek, abalone, kadiuk, pérolas no ostras, ne'ebé kontribui ba kriasaun rendimentus ba comunidades ne'ebé hela iha tasi-ibun.

Nune'e, importante atu dezenvolve estratéjias, iha setór ida ne'e, hodi konsidera rekursus oioin ne'ebé eziste no oinsá bele halo esplorasau, tamba:





- i. Tasi, husi kosta Tasifeto nian, apresenta nu'udar karakteristikas boot mak plataforma kosteira ki'ik, ne'ebé liga ho prezensa hosi ahu-ruin ho temperaturas ne'ebé aas, nutrientes, ne'ebé to'o ba Tasi hosi mota, mós menus ona no la iha nutrientes ne'ebé moris hikas hosi tasi, ne'ebé mos signifika katak possibilidade ba espésies komersiais ki'ik tebes, ho tan produsaun fitopláncton ne'ebé ki'ik, tanba nível oxijéniu reduzidu tebes ho temperatura ne'ebé aas, no, la haluha, redusaun ne'ebé boot ba área maternidade, área ho ai-parapa;
- ii. Tasi, husi fali kosta Tasimane nian, hasoru laloran ne'ebé boot no maka'as tebes, expostu liu ba anin, tamba la hetan protesaun husi illas indonesias, ne'ebé barak hanesan iha Tasifeto, maibé hetan nutrientes barak liu, ne'ebé bá husi mota no mós husi fenómenu resurjénsia<sup>1</sup>, tanba ninia plataforma kontinentál naruk no luan tebes, hodi permite, iha zona ne'ebé exposta ba naroman, bele conserva nutrientes ne'ebé bele hala'o produsaun primária ba *fito pláncton*<sup>2</sup>.

Timor-Leste, maski illa ida, la iha tradisaun boot kona-ba tiha ikan. Ida ne'e, dala barak, bele justifika ho tradisaun kulturál, husi kedas bei-ala sira, maibé, liuliu, tanba kondisoens ne'ebé povu hasoru: kapasidade esplorasau tasi fraka tebes, iha Tasifeto ka Tasimane, no iha ne'e, tasi perigozu liu ba korakora. Hosi parte seluk, estudus hatudu katak, mezmuke iha dadauk ona aumentu iha esforsu ba Peskas, iha tinan hirak ikus ne'e, liuliu aumentu iha número peskadores ne'ebé ativus no número de embarkasaun, número totál iha kaptura (kaer ikan) ki'ik nafatin tetu ba esforsus iha peska, no ida ne'e bele signifika katak País sei esgota nia kapasidade husi meius, ka kapasidade kreximentu nian sei oitoan, mesmu ke la estraga nia meius. Ne'e duni, iha nesesidade atu estuda no implementa estratéjias aproximasaun, hodi aumenta produsaun peskadu nian, ho forma ida ne'ebé sustentável.

Iha liafuan badak, ami sei promove setór Peskas iha Timor-Leste tuir Polítika ba Ekonomia Azul Timor-Leste nian.

Iha ámbitu ida ne'e, Governu sei:

- Haree hikas fali estudus ne'ebé elaboradus ona ba setór Peskas, atu identifika asoens no estratéjias prioritárias ba kreximentu setór nian, hodi haree oinsá supera (ka ultrapassa) tiha obstáculos ne'ebé iha hela, no asoens atu aumenta peskas iha futuru;

<sup>1</sup> resurjénsia - Bee sa'e hosi superfísie okos tasi nian

<sup>2</sup> fitoplancton – comunidade mikrorganismu vejetál, ne'ebé sai baze hahán iha Tasi okos no oceano





- Regulamenta no kontrola Peskas, inklui tamañu ba rede (kaer ikan), defezus (peskas proibidas), espésies protejidas no formas seluk hodi proteje espésies no oinsá evita kaptura (kaer) animais antes de bele halo (ka realiza) reproduasaun no, nune'e, bele mós ajuda repovoamentu naturál. Sei reforsa liu-tán lejizlasaun ne'ebé bele reduz peska ilegál, liuliu husi ró-ahi estranjeiru no definisaun kona-ba zona vijiada;
- Promove kampañas hamutuk ho peskadores no sira-nia komunidadade, kona-ba téknikas peska nian, ne'ebé apresenta menus risku ba delapidasaun (ka estraga) kapasidade produsaun peskadu-nian no estraga meu ne'ebé hale'u;
- Promove konsumu ikan iha ita-nia País, ho forma sustentável, liuhusi kampañas sensibilizasaun kona-ba ninia valor nutritivu, ho objetivu atu aumenta ninia konsumu ba 10kg/ema/tinan;
- Investe iha formasaun rekursus umanus nian, iha área peskas no akuakultura, hodi apoia servisu sira téknikus, iha tasi no iha akuakultura;
- Investe iha peska tasi-klaran, ho orientasaun ba esportasaun futura nian, hodi kontinua dezenvolve Sentrus de Peskas tuir tasi-ibun, no asesu ba ró ne'ebé di'ak liu, ekipamentu no formasaun;
- Kriasaun rede (ka Sistema) konsersaun peskadu nian, ba aproveitamentu totál peskadu ne'ebé kaer, hodi permite mós aumentu esforsus iha kaptura (kaer), tamba garante ona eskoamentu;
- Estabelese ligasaun ba merkadus no ba exportasaun, no mós liuhusi sistema transporte no sentru refrijersaun, entre zonas peska no fatin fa'an no esportasaun nian;
- Estabelese Sentrus atu halo demonstrasaun kona-ba oinsá uza sistema elektróniku ba kontrolu iha peska (ka kaer) no ba korte (ka ko'a), prosesamentu, transporte no armazenamentu ba produktu peskas;
- Dezenvolve prosesus alternativus ba konsersaun peskadu, hanesan salga, fumajen (tamu) no sekajen (ka hamaran);
- Garante prezersaun ikan nian no ambiente tasi-nian, hodi define mós lokais, ne'ebé adekuadus ba peska komersiál;
- Estabelese Sentru Mariñu ba Investigasaun no Dezenvolvimentu de Timor-Leste;







- Maksimiza Sentru Formasaun ba Akuakultura, iha Liquiçá, hodi inisia formasaun ba téknikus ba peskas, peskadores, akuakultores no jovens;
- Kontinua investe iha dezvoltamentu infraestruturas bázikas, hanesan portus, kais no fatin Ró atraka;
- Dezenvolve estudus no peskizas adisionais ba produsaun iha akuakultura, ba konsumu internu no ba exportasaun;
- Dezenvolve tipus oioin ba atividades akuakultura nian, iha bee-midar, bee-fo'er (salobra) no bee-mer (tasi ben);
- Garante, pelumenus tipu 3, ba atividades akuakultura, hodi apoia atividades kosteiras;
- Elabora estudus, atu bele estabelese Entidade de Administrasaun Indireta do Estado, ba área Peskas no Akuakultura, hanesan, Institutu Nasionál de Peskas no Akuakultura, ne'ebé bele mós sai fonte promosaun no motivaun ba investimentu privadu;
- Estabelese merkadu exportasaun ikan nian ida, ba produsus peskas no akuakultura;
- Kriasaun lota nian (fatin fa'an ikan nian ida), ho ekipamentus refrijersaun nian rasik, iha ne'ebé Estado bele haruka kumpre kritérius kona-ba qualidade no seguransa ai-hán (seguransa alimentar) nian, nune'e mós bele haree ba razoabilidade presu (katak, labele sa'e liu no labele tun liu), hodi fó ba setór akompañamentu no organizaun ne'ebé seidak iha.
- Haree hikas lisensas komersiais ne'ebé iha tiha ona, no define esplorasun rekursus mariñus, iha tempu médiu no tempu naruk, hodi asegura no garante ekonomia País nian;
- Kontinua investe iha akizisaun no manutensaun mákinas no ekipamentus peskas no akuakultura.

#### 4.2.4. Produsaun Florestal

*Jestaun florestál ne'ebé sustentável ba rekursus florestais Timor-Leste nian, la sai fundamentál ba famílias no comunidades, ne'ebé depende ba rekursu ida ne'e ba hán, kombustível no kriasaun rendimentu, hanesan mós ba agrikultores konsidera (ka hanoín) kona-ba efeitu deflorestasaun nian iha erozaun ka rai-monu no iha kaptasaun bee nian, se ida ne'e la iha, maka produsaun agrikola sei la iha.*

Timor-Leste lakon tiha ona ninia floresta nativa (ai rai-na'in kedas), hanesan ai-teka, mognu (ka mahoni) no ai-kameli, no, ho ida ne'e, prejudika tiha vida selvajen no hamenus tiha fonte





alimentasaun. Tanba ne'e, sai urjente atu atua ho konsisténsia iha protesaun ba áreas floresta Nasionál, ne'ebé representa besik 50% hosi área terrestre País nian, hodi nune'e setór ida ne'e bele sai rentável ekonomikamente maibé mós hetan sustentabilidade.

Nune'e, Governu sei empenhadu iha asoens tuir mai:

- Kontinua implementa Planus ba Konservasaun Florestál, ne'ebé aprovado ona iha 2012, hodi promove reflorestasaun no agro-florestál ba práttikas sustentáveis iha territóriu tomak, inklui mapeamentu no inventarizasaun ba espésies florestais;
- Kontinua implementa kuadrus legais, inklui Lei de Bases Florestál, kona-ba jestaun no protesaun ba rekursus florestais;
- Implementa Planus de Investimentu Florestál, inklui identifika merkadus potenciais no vantajens komparativas, ba Timor-Leste, kona-ba produsus florestais ho valor ne'ebé bot;
- Kria Instituto de Peskiza no Dezenvolvimentu de Agrikultura, hodi reforsa investimentu no peskiza ba subsetores agrícolas hotu-hotu, inklui produsus florestais;
- Kontinua dezenvolve Centros ba Viveiros Permanentes no Viveiros komunitarios, hodi fó apoiu ai-horis ba comunidade (ai-kameli, cedro-vermello, Ai-teka, mogno, pau-rosa/Ai-ná, Bambu, nsst) ne'ebé bele dezenvolve, hodi fornese matérias-primas ba industrias ki'ik no ba karpintarias ba produsaun mobiliários;
- Kuda ai, millaun 1 iha tinan-tinan, iha territóriu tomak;
- Kontinua implementa Polítika no Estratéjia Komersializasaun ba Bambú (ka, Au);
- Kontinua investe iha produsaun no komersializasaun bambú, materiál ida ne'ebé versátil tebes no rentável duni, no mós tamba Au kontribui hodi halakon erozaun/rai-monu ka delokamentu/rai-halai no mós estragus seluk ba rai;
- Promove formasaun teknika no administrativa ba profissionais florestais;
- Kontinua haforsa koordenasaun intersetoriál, liuliu jestaun rekursus naturais. ho forma sustentável. no promove Sistema Nasionál ba Áreas Protejidas no Parkes Nasionais no Konservasaun da Biodiversidade;
- Halo rehabilitasaun ba “área mangál (ai-parapa)” iha liña kosteira Timor-Leste hodi proteje comunidades no biodiversidade kosteira;





- Promosaun jestaun ba área basias idrográfikas, liuhosi sistema jestaun rekursus naturais ne'ebé bazeadu iha nesesidades comunidades nian;
- Kontinua investe iha akizisaun no manutensaun mákinas ne'ebé destinadas ba jestaun florestál.
- Aprova planu sira ba jestaun integrada no sustentável ba Parke Nasionál “Nino Konis Santana”, ba Parke Nasionál “Xanana Gusmão” no ba Jardim Botániku “Francisco Xavier do Amaral”.

#### 4.3. Petróleu ho Rekursus Minerais

Pilár ida mós ba dezvoltimentu ekonómiku futuru Timor-Leste nian, mak setór Petróleu ho Rekursus Minerais, ne'ebé sei garante katak rikeza (ka rikusoin) husi rekursus naturais sei utiliza hodi konstrói (ka harii) Nasaun no proporsiona progresu no bein-estár ba povu timor tomak.

Vizaun Nasionál, ne'ebé temi iha Planu Estratéjiku Dezvoltimentu (2011-2030), mak ida ne'ebé dehan katak infraestrutura ne'ebé nesesária (ka presiza tebetebes) ba dezvoltimentu Petrolíferu, tenke implementa iha Kosta Sul, hodi bele kria dividendus ekonómikus, ne'ebé diretus ba populasaun tomak, liuhosi atividades indústria petrolífera ho kriaun postus de traballu koneksus (ka, ne'ebé iha ligasaun ba malu), no mós liuhosi dezvoltimentu infraestruturas de apoiu ba Kosta Sul Timor-Leste.

Dezvoltimentu ida ne'e, ne'ebé temi ho naran Projetu Tasi Mane, hanesan programa plurianuál ida ho vizaun atu kria polus (ka sentrus) industriais rua, ne'ebé konsidera hanesan espiña dorsál (ka, suporte prinsipál) ba indústria petrolífera Timor-Leste nian.

Ba kurtu-prazu, atu konkretiza vizaun ida ne'e, Governu sei kontinua haka'as-an iha negosioens ho empresas ne'ebé envolve iha prosesu *Greater Sunrise* nian, hanesan prevee tiha ona iha Tratadu kona-ba delimitasaun fronteiras marítimas entre Timor-Leste ho Austrália, hodi konkretiza rejime espiál ba Kampu *Greater Sunrise*, no assegura gazodutu (kadoras) husi *Greater Sunrise* mai Timor-Leste.

Projetu Tasi Mane ne'e sei kontribui la'ós de'it ba dezvoltimentu kosta sul ein-jerál, no liuliu ba indústria petrolífera, maibé mos sei abranje (ka kobre) impaktus ekonómikus, diretus no indiretos, lubun boot ida, iha nível Nasionál, rejionál no lokál, hodi fó benefísius ne'ebé mai husi explorasaun rekursus naturais Timor-Leste nian.





Projetu ida ne'e sei aumenta Produthu Internu Brutu (PIB) Nasionál ho lukrus husi exportasaun, no mós sei kria oportunidades ba empregu durante konstrusaun ho operasaun infraestruturas ne'ebé koneksas (ka ligadas), aleinde funsiona hanesan katalizador no dinamizador ida ba dezvoltimentu Kosta Sul. PRevee katak sei hamosu to'o 10.000 postus de traballu diretus, husi projetu Tasi Mane, no liu 50.000 postus de traballu indiretus sei bele kria ho transformasaun setór petrolíferu, husi faze atuál hanesan halo de'it extrasau, ba faze avansada liu ho ona industrializasaun ho kriasaun valór akresentadu (katak sei hamosu tan benefisius seluk no reseitas).

Aleinde ne'e, Projetu Tasi Mane ne'e sei fó benefisius indiretus, hodi influénsia dezempeñu ekonómiku ne'ebé boot liu ba País, hanesan rezultadu husi dinamizasaun setores industriais seluk. Investimentu ne'ebé partisipantes, iha projetu ne'e, halo, no husi traballadores, husi Governu no husi benefisiários privadus, sei produz "efeitus multiplikadores" (ka barak tebes), tanba atividades ekonómikas ne'ebé asosia ho projetu ne'e sei fó impaktu ba ekonomia ein-gerál, ne'ebé sei mai husi akizisaun ba beins no servisu sira adisionais, husi traballadores, no mós husi empresas, ne'ebé direta ka indiretamente, envolve-an iha projetu.

Investimentu iha ativas fízikus ne'ebé produtivus (hanesan instalasoens ba produsaun enerjia elétrika, estradas ho aeroportus) ho ativas sociais (hanesan ezemplu, konstrusaun pólus (ka sentrus) foun, tantu urbanus no mós ba ensinu no hadi'a servisu sira edukasaun ho saúde), sei bele mos benefisia ekonomia liuhosi masimizasaun iha produtividade husi fatores ekonómikus oioin. Impaktu significativu ida mós, husi projetu ne'e, mak hanesan oportunidades ne'ebé sei mosu ba negócios lokais. Oportunidades hirak ne'e, inklui subkontrataun ba servisu sira hanesan restaurasaun, enjeñaria, seguransa, fornimentu kombustível, servisu sira jestaun, profesionais ho tékniku no nesesidade produthu agríkola sira.

TIMOR GAP sei kontinua hala'o mandatu husi Governu, atu jere no administra projetu Tasi Mane. Empreza Públika ida ne'e sei apoia kriasaun indústrias de suporte, no apoia dezvoltimentus rekursus umanus nesesários ba operasionálizasaun ne'ebé efisiente husi setór petrolíferu. PRevee katak konstrusaun infraestruturas bázikas hirak ne'e, bele impulSIONA (ka dudu) no insentiva investimentus komersiais iha projetus seluk no áreas ne'ebé inkorpora (ka tama hotu) iha área ne'ebé hetan impaktu husi Tasi Mane. Realidade ida ne'e transforma karáter atuál setór petrolíferu Timor-Leste nian, ne'ebé ho dimensaun (ka karakter) extrativa de'it, hodi permite nia evolusaun ba setór petrolíferu ida ne'ebé ho valor akresentadu boot, no ho karíz (ka natureza) industriál no diversifikadu liu, inklui dezvoltimentu refinaria ida ho pólu indústria petrokímika, no fábrica Gás Naturál Likefeitu ("GNL").





Govurnu Timor-Leste, nu'udar proponente no promotor ba projetu integradu Tasi Mane, sei partisipa iha finansimentu ba projetus balun, no mós iha infraestruturas bázikas, hanesan ezemplu, aeroportu ho baze lojístika Suai. Projetus seluk iha Tasi Mane sei konstroe no dezenvolve ho baze iha rejime 'project finance' no ho formas investimentu privadu seluk tan no investimentu mistu.

Nune'e, Governu sei kontinua dezenvolve estudus ho planus investimentu, hodi konsidera envolventes (ka buat) hotu-hotu ne'ebé presiza ba realizasaun projetu ne'e, inklui estudus kona-ba impaktu ambiental, atu bele minimiza impaktus negativus iha meiu ambiente no umanu.

Projetu Tasi Mane ne'e konstituídu (ka kompostu) husi pólus dezvoltimentu hanesan tuir mai:

#### 4.3.1. Dezvoltimentu Baze Lojístika ida iha Suai

Sei konstroe no operasionaliza baze lojístika ida iha Suai, nia fatin mak iha Kamenasa, Munisípiu Covalima, ne'ebé sei inklui konstrusaun instalasoens lojístikas no marítimas. Baze ida ne'e sei serve atu apoia atividades petrolíferas tomak, ne'ebé hala'o iha Área Eskluziva Timor-Leste nian no iha áreas adjasentes iha Tasi Timor, no mós atividades ekonómikas jerais, komersiais no industriais seluk tan.

Baze Lojístika iha Suai ne'e sei serve mos hanesan pontu entrada ida ba jestaun kadeia (ka rede) abastesimentu (ka forneshimentu) atividades husi agrupamentus industriais rua seluk, hanesan, refinaria ho kompleksu petrokímiku ida ho fábrica GNL ida.

Baze lojístika ida ne'e sei abranje mos:

- Instalasoens terrestres – edifísius ba operasoens nian, armazéns kobertus, mini bazes terrestres, parke armazenajen kombustível nian, depózitus armazenajen bee nian, sistema jestaun ba rezíduus ka lixu, zonas estasionamentu, instalasoens rekreativas no komunitárias, entre buat seluk;
- Instalasoens marítimas - ponte-kais tolu mak hanesan ponte-kais prinsipál, ponte-kais ba ró-barkasas no rampa (ka fatin) ba embarkasoens dezembarke nian, ne'ebé apoia ho postu atrakasaun ba rebokadores, postu akostajen (ka sadere nian) ba embarkasoens de pasajeirus ho kebramar (ka muru boot) ne'ebé liga ba Kosta, hodi sátan no fahe laloran, hodi portu ida ne'e bele kalmu (ka hakmatek), seguru no protejidu ba instalasoens iha rai-laran.

Projetu ida ne'e sei iha impaktu sosiál boot tebetebes, tamba sei sai hanesan plataforma impulsionadora ida, hodi loke oportunitades de traballu, jera/kria postus de traballu atus-ba-atus,





hodi apoia dezenvolvimentu ekonómiku Nasionál, no hadi'a maka'as kompeténsias maun-de-obra lokál, iha áreas hanesan fabriku besi-asu, konstrusaun sivíl, konstrusaun marítima, enjeñaria mekánika no elétrika, entre buat seluk. PRevee mos katak indústrias naun-petrolíferas seluk, hanesan peska komersiál, bele mos benefisia ho instalasoens marítimas hirak ne'e.

Halo tiha ona estudus kona-ba impaktu ambientál ho mós hala'o ona konsultas públikas, relaciona ho projetu ne'e, no mós hetan ona lisensa ambientál, iha 2013 no hafoin renova fali iha 2015.

#### 4.3.2. Dezenvolvimentu Refinaria Petrolífera ho Kompleksu Petrokímiku ida

Pólu dezenvolvimentu Daruak ba Projetu Tasi Mane, kompostu husi Refinaria Petróleu no Kompleksu Petrokímiku, ne'ebé lokaliza iha kosta sul. Instalasoens hirak ne'e mak sei konverte (ka transforma) Mina-rai kondensadu, ne'ebé mai husi Tasi Timor, ba kombustíveis oioin no ba produtus petrolíferus refinadus seluk. PRevee mos katak projetu ne'e sei halo Timor-Leste sai autosuficiente, relacionadu ho fornesimentu gasolina, ne'ebé la iha xumbu, ho diezel, ho marjen (ka espasu) atu satisfaz (ka responde ba) aumentu iha prokura doméstika, iha futuru.

Kompleksu refinaria ne'e, sei iha área boot ida ho ektares 250 liu. Instalasaun prinsipál refinaria ne'e nian, konsiste husi unidade prosesamentu ida no unidades apoiu, hanesan unidades ba utilidades, unidade ba tratamentu rezíduos, rezervatórius ba matéria prima nian no produtus petrolíferus, rezervatório bee ba kombate inséndius no aterru ba jestaun rezíduos sólíduus (ka maran). Kompleksu ne'e sei iha instalasoens apoiu, hanesan armazéns, edifísiu operasoens, edifísiu administrasaun, laboratóriu, gabinete seguransa no kombate inséndius ho refeitóriu (ka han-fatin). Bee, ne'ebé hodi halo operasoens refinaria, sei kanaliza husi bee-matan ne'ebé dok 10 km husi refinaria.

Iha etapa inisiál faze dezenvolvimentu ida ne'e, sei estabelese refinaria ida ba produsaun kombustíveis, tantu ba konsumu doméstiku (diezel, gasolina, GPL ho Nafta), nune'e mós ba exportasaun. Pólu refinaria sei konkretiza, liuhosi parseria komersiál, ne'ebé TIMOR GAP mak sei dezempeña papel prinsipál, hanesan dinamizadór ba dezenvolvimentu projetu ne'e.

Estudus de viabilidade kona-ba projetu ida ne'e dezenvolve tiha ona, nune'e mós estudus kona-ba impaktu ambientál, no realiza mos ona konsultas públikas. Oras ne'e daudaun, hein hela lisensa ambientál, atu hahú projetu.





#### **4.3.3. Dezenvolvimentu Fábrica Gás Naturál Likefeitu**

Governu sei kontinua haka'as-an atu dezenvolve gás, ne'ebé mai husi kampu Greater Sunrise, liuhosi konstrusaun gazodutu (ka kadoras gás nian) ne'ebé liuhusi tasi okos to'o iha kosta Sul Timor-Leste, no konstrusaun no operasaun fábrica Gás Naturál Likefeitu (GNL) ida, hodi hala'o prosesamentu.

Agrupamentu ida ne'e sei inkorpora kompleksu fábrica GNL nian, inklui instalasoens marítimas ne'ebé asociadas (ka koneksas), nune'e mós ho áreas urbanas foun. Aeroportu ne'ebé eziste ona iha Kosta Sul sei reabilita atu bele iha kapasidade atu opera (ka hala'o) dezlokamentus "fly-in-fly-out" (FIFO) ba traballadores ne'ebé servisu ba operadores GNL, hodi serve mos hanesan aeroportu rejionál sira.

#### **4.3.4. Dezenvolvimentu Zona Kosteira Sul**

Sei konstroe no/ka operasionáliza infraestruturas ne'ebé nesesárias, hodi suporta indústriá petrolífera, halo ligasaun entre agrupamentus ka pólus petrolíferus ne'e. Ida ne'e sei inklui:

- Sidades foun, hodi aloja ka simu traballadores setór nian no hodi realoja rezidentes lokais;
- Autoestrada ida ho propózitu liga agrupamentus ne'ebé temi ona no apoia kreximentu indústriá petrolífera iha kosta sul tomak, hodi permite dezenvolvimentu ekonómiku jerál no hadi'a populasoens tomak nia moris. Autoestrada ida ne'e inklui mos konstrusaun pontes prinsipais lubuk ida no Portu multifunsiunál ida iha Suai, hodi apoia baze lojístika ida ne'eba;
- Aeroportu Suai nian, ne'ebé halo hotu ona, ba operasoens seguras aeronaves lijeiras (ka ki'ik) ho elikópterus nian, hodi apoia atividades petrolíferas. Aeroportu ida ne'e sei reforsa transporte pasajeirus no merkadorias, inklui terminál ida ho instalasoens alfândegas ho imigrasaun nian, kuartél ba bombeirus, heliportu ida ho mós instalasoens servisu sira aéreus ba ambulánsia.

Nafatin iha setór ida ne'e, Governu sei:

- Kontinua forma kuadrus profisionais no téknikus no fó bolsas estudu ba áreas espezializadas, ne'ebé iha ligasaun ho setór petrolíferu, mineiru no jeolójiku;
- Kontinua kapasita comunidades iha Munisípiu sira, ne'ebé envolvidas diretamente iha Projetu Tasi Mane ne'e;





- Dezenvolve mekanizmu ida kona-ba uzu gás naturál iha atividades ekonómikas país nian;
- Halo reestruturasun ba Kompañia Mineira Timor-Leste S.A', ne'ebé sei tau-matan ba intereses Estadu nian, iha atividades esplorasun rekursus minerais país nian;
- Aumenta atividades estudu, peskiza ho promosaun ne'ebé halo nafatin iha rai-laran no rai-liur, atu bele maximiza investimentu iha setór petrolíferu no mós iha setór mineiru;
- Garante konformidade (ka kumprimentu) ba Transparénsia husi Indústrias Extrativas (ITIE), hodi kontinua hato'o relatórius nesesárius;
- Asegura sinerjias ho kooperasaun internasionál, iha ámbitu setór rekursus enerjétikus;
- Kontinua traballus de peskiza no desenvolvimentu de petróleu no gás, iha áreas terrestres no marítimas (ka tasi laran) Timor-Leste nian, liuhosi TIMOR GAP ho ninia parseirus, ka investidores interesadus seluk tan;
- Asegura katak reseitas ne'ebé mai husi esplorasun petróleu ho gás naturál bele kontribui ba industrializasaun país no ba desenvolvimentu atividades ekonómikas nasionais seluk, no aumentu iha exportasoens;
- Dezenvolve lejizlasaun adisionál no regulamentasaun kona-ba jestaun ne'ebé efisiente no transparente, iha atividades tomak ne'ebé relasiona ho esplorasun rekursus petrolíferus ho minerais iha Timor-Leste, inklui:
  - a. Revizaun ba Lei kona-ba Atividades Petrolíferas ho lejizlasaun komplementár seluk;
  - b. Reeve no regulamenta Kódigu Mineiru, hodi permite hala'o operasoens mineiras, ho lejizlasaun no regulamentasaun komplementar;
  - c. Aprova no implementa lejizlasaun nesesária atu asegura implementasaun ba dispozisoens ne'ebé prevee ona iha Tratadu ba Fronteiras Marítimas entre Timor-Leste ho Austrália;
  - d. Estabelese Fundu Minerál ida, atu asegura administrasaun ne'ebé di'ak liu ba reseitas ne'ebé hetan husi atividades minerais iha País;
  - e. Aprova lejizlasaun no regulamentasaun ne'ebé presiza hodi permite atividade kaptura no armazenamentu karbonu nian.







#### 4.3.5. Dezenvolvimentu Estudus Jeolójikus no husi Setór Minerais

Hanesan iha setór Petróleu, setór minerais mós rekoñesidu hanesan pilár importante ida ba ekonomia Timor-Leste nian iha Planu Estratéjiku Dezenvolvimentu Nasionál 2011-2030. Bainhira dezenvolve ho di'ak, setór minerais bele kontribui maka'as ba kria saun empregu no ba dezenvolvimentu ekonómiku nasional, tanba maioria atividade sira dezenvolvimentu minerais sei akontese iha territóriu nasional. Dezenvolvimentu ida ne'ebé prudente no sustentável ambientalmente ba setór minerais sei lori retornu boot ba Estadu Timor-Leste, hodi kontribui ba reseitas Estadu nian.

Iha setór minerais, Governu sei:

- Revee no reestrutura setór ho objetivu hodi aumenta ninia efisiénsia no efikásia;
- Dezenvolve atividade sira peskiza no promosaun nian ba blokus explorasaun rekursus minerais;
- Promove potenciál husi rekursus minerais iha rejiaun no iha área sira ne'ebé identifika ona hamutuk ho entidades governamentais relevantes;
- Hadi'a koñesimentu tekniku kona-ba rekursus minerais, atu asegura viabilidade ba investimentu iha rekursus minerais;
- Estimula no hametin investigasaun sientífika iha área geosiénsias no técnicas espesifikas, ba identifikasaun rekursus petrolíferus, gás, minerais no riskus jeolójikus ne'ebé iha iha territóriu.

#### 4.4. Turizmu

Turizmu, hanesan motor importante ba dezenvolvimentu atividades ekonómikas, hodi kontribui mos ba salvaguarda ka defeza do patrimóniu natural no kultural Timor-Leste nian.

Ho beleza (ka nia furak) natural ne'ebé la kompara ho seluk, ho istória ida ne'ebé rika tebetebes no patrimóniu kultural ida úniku, Timor-Leste iha kondisoens tomak atu dezenvolve ninia setór turístiku orijinal duni, ne'ebé envolve liuliu nia povu rasik no kria empresas ho oportunidades empregu ne'ebé diversifikadas.

Governu sei, ho forma planeada no organizada, dezenvolve estratéjia ida ba turizmu iha rejiaun, no la buka kompete ho turizmu boot iha Sudeste Aiátiku, mas bele kria sinerjias ho localidades





seluk iha rejiaun, hanesan Flores, Molucas no Kupang, atu dezenvolve pakotes turístikus ne'ebé bele atrai vizitantes husi Indonézia, husi Austrália no husi paizes seluk iha Ázia ho Pasífiku.

Bele mos aposta iha turizmu ne'ebé bazeia ba lasus istórikus no kulturais komuns, inklui denominador komun husi lian portugueza, hodi promove inisiativas iha ámbitu paizes CPLP. Maibé, no tanba konsidera mos pozisaun estratéjika Timor-Leste nian iha quadru ASEAN, presiza mos loke dalan ba relasoens istórikas no kulturais sekulares ne'ebé liga povus luzo-aziátikus iha rejiaun, hanesan Melaka, Sri Lanka, Macau, Bangucoque, Goa, entre seluk. Governu, nun'e, sei aposta iha promosaun inisiativas inovadoras, hodi halo Timor-Leste sai sentru kulturál ho pontu enkontru entre povus ne'e, inkluzive liuhosi realizasaun 2ª Konferénsia Komunikades Luzo-Aziátikas iha Timor Leste.

Timor-nia turizmu konta ho vantajens kompetitivas, hanesan tuir mai:

- i. Hanesan país katóliku ida iha rejiaun, ne'ebé pratika rituais katólikus ne'ebé bele serve hanesan atrativu ba turistas katólikus husi rejiaun;
- ii. Hanesan país ida ho istória únika no resente (ka, sei foun hela), ho fatin simbólikus barak atu vizita;
- iii. Iha potenciál boot tebes atu dezenvolve turizmu foho nian no proporsiona atividades desportivas no aventura nian, ne'ebé serve hanesan atrativu ba kamada ida importante husi turistas;
- iv. Iha kosta ne'ebé naruk ho praias ne'ebé furak no nakonu ho biodiversidade, ne'ebé iha potenciál boot ba dezenvolvimentu desportus, aventura no atividades marítimas, inklui 'snorkeling' ho mergullu (ka luku);
- v. País ida ne'ebé halo mós parte ba Inisiativa Triángulu Korál, hodi proteje abundánsia ho diversidade vida mariña iha bee laran Timor-Leste nian, ho atensaun espeisial ba área hale'u illa Ataúro, ohin-loron rekoñesida hanesan lokál subakuátiku ho biodiversidade boot liu hotu iha mundu;
- vi. Iha ninia gastronomia únika ne'ebé iha expansaun (ka, buka aumenta liután) kahur ho tradisoens gastronómikas seluk;
- vii. Mantein komunikades ansestrais (ka, husi tempu bei'ala sira), ne'ebé sei iha ninia ambiente naturál, ne'ebé ema bele vizita no estuda, husi perspectiva turístika, ka antropolójika no akadémika, buat ne'ebé sei bele kontribui mos ba konsolidasaun identidade Nasionál, ne'ebé reflète iha propostas no iha produtus turístikus ne'ebé aprezena;





- viii. Nia paizajen, ne'ebé seidak explora no kondisoens naturais ne'ebé sei prezerva didi'ak ninia meu ambiente, ne'e hanesan katalizador importante ida ba dezenvolvimentu turizmu komunitáriu no ekolójiku;
- ix. Timor-Leste sei iha hela nia prosesu adezaun plena ba ASEAN, ne'ebé sei permite aumenta nia esforsus ba promosaun iha merkadus ne'ebé besik;
- x. Lokalizada mos iha pozisaun estratéjika ida (destinu tropikal no iha rejiaun aziátika ne'ebé populasau barak liu iha mundu);
- xi. Timor-Leste iha índise ki'ik loos, entre nasaun seluk iha mundu, kona-ba kriminalidade.

Nune'e, iha merkadu global ida ne'ebé buka ofertas turísticas ne'ebé foun no auténtikas, Timor Leste bele hatúr nia-an ho kompetitividade boot, liuliu iha rejiaun, haree ba nia diferensa. Maibé, nesesáriu atu dezenvolve estratéjia efikás ida ba atrasaun turística, ne'ebé promosaun ho marketing sai fundamentais hodi hatudu kompetitividade ne'e.

Iha abordajen dahuluk, sei investe iha promosaun ba tipus turizmu hanesan:

- Turizmu Komunitáriu no Ekolójiku;
- Turizmu Aventura (inklui montañizmu (ka, sa'e foho), mergullu (ka, luku) no snorkeling ho tan desportus radikais seluk);
- Turizmu Relijiozu;
- Turizmu Istóriku, Kulturál no Etnográfiku;
- Turizmu Lazer no Balneár (ka hariis iha tasi);
- Turizmu Termál (iha fatin bee-manas).

Iha ámbitu ida ne'e, Governu hakarak alkansa metas, hanesan tuir mai, no implementa asoens hanesan:

- Promove Turizmu mariñu ne'ebé sustentável no ekoturizmu Timor-Leste nian, inklui revizaun no implementasaun husi aspetu lojístiku, regulamentár, kona-ba infraestrutura, konsersaun no protesaun mariña, entre sira seluk, tuir Polítika ba Ekonomia Azul Timor-Leste nian;





- Aumenta númeru turistas iha país, ba potenciál másimu ne'ebé sustentável, hodi nune'e aumenta reseitas internas;
- Implementa Polítika Nasionál ba Turizmu, hodi asegura kreximentu ne'ebé efetivu, efisiente no sustentável husi setór turizmu;
- Finaliza no implementa planu asaun ida ne'ebé pormenorizadu ho nia medida no asaun espesífika sira tomak ba promosaun kona-ba dezvoltamentu do turizmu;
- Reeve rejime jurídiku kona-ba jogus;
- Kriasaun Marina Dili, liuhosi implementasaun Projetu “Marina Square” iha Bidau Lcidere no Projetu Frente Marítima Dili (Av. Dos Coqueiros), atu nune'e fatin iha tasiibun sai espasu di'ak, lazer no diverssaun ba populausaun tomak no ba turistas ne'ebé mai vizita Timor-Leste;
- Reabilita orla marítima (Tasiibun) Dili, entre Avenida Portugal (Av. Dos Coqueiros) to'o iha marina Dili foun;
- Kooperera ho Ministériu de Administrasaun Estatal no Ministériu das Obras Públikas hodi halo requalifikasaun ba jardins no espasu verde iha comunidades de populausaun;
- Kontinua hadi'a no implementa lejislasaun no regulamentus kona-ba setór turizmu;
- Reforma kondisoens ho servisu sira ne'ebé fó iha Aeroportu Internasionál Presidente Nicolau Lobatu, hodi garante katak simu di'ak duni turistas, ho servisu sira profissionais no ho qualidade, hodi nune'e hadi'a “primeiras impresoens” bainhira ema tama iha país;
- Estabelese Sentru Formasaun Turizmu no Otelaria iha Díli (PED);
- Rekoñese Merkadu Tais, iha sentru Díli, hanesan pontu turístiku prinsipál ida ne'ebé ema vizita barak liu, hodi dignifika espasu fatin ne'e no valoriza komersiantes nia servisu, hodi envolve sira iha projesaun kona-ba edifísiu ida ne'ebé furak hodi simu ema, ne'ebé enkuadra duni iha nia misaun, ho ekipamentus apoiu ne'ebé di'ak, kafetaria, no área muzeológika no interpretasaun kona-ba manufatura Tais;
- Kontinua asegura formasaun téknika iha área turizmu iha país tomak, ne'ebé orienta ba tipus atividades turísticas oioin (turizmu relijiozu, turizmu komunitáriu no ekolójiku, turizmu de aventura, etc.);
- Hadi'a sinalizasaun no materiais promosaun turística nian, iha país laran, para bele atrai no orienta turistas;





- Harii no dinamiza Parkes Jestaun ba Lafaek, hodi aumenta seguransa iha praias (ka tasi-ibun) no mós prezerva espésie no promove atrasaun turístika husi animál ida ne'ebé sai hanesan representasaun formál simbólika identidade timor-nian;
- Kontinua dezenvolve pakotes turístikus abranjentes, tuir Zonas Turístikas Orientál, Sentrál no Osidental;
- Fomenta diálogu interministeriál permanente, tanba Turizmu sei dependente ba konjuntu kondisoens iha nível seguransa, saúde, obras públikas, ambiente, desportu, kultura, entre buat seluk, ne'ebé konjuga hamutuk hodi buka forma oinsá promove país no ban-hira simu vizitantes;
- Hadi'a koordenasaun no reforsa parserias ho setór privadu iha dezenvolvimentu infraestruturas no ofertas turístikas;
- Expande ka habelar Sentrus de Informasoens Turístikas, ba Munisípiu sira hotu (PED 2015);
- Alarga Programa kona-ba Turizmu Komunitáriu ba Munisípiu sira hotu;
- Haree di'ak fali, hadi'a no dinamiza website [www.timorleste.tl](http://www.timorleste.tl) ho materiais de promosaun nian kona-ba Timor-Leste no garante nia divulgasaun máxima, iha rejiaun no iha mundu;
- Kontinua realiza estudus de viabilidade hodi implementa projetus de turizmu istóriku nian, inklui formasaun ba guias turísticos;
- Kontinua implementa eventus turístikus anuais, nasionais no internasionais, hanesan desfile Karnavál, regata (ka halai-taru ró) entre Darwin-Díli, Tour de Timor ho Karavana Artístika, Festivál Dansas no Muzikas tradisionais no Festivál Gastronomía;
- Reforsa mekanizmu koordenasaun intersectoriál hodi halo promosaun no dezenvolvimentu sector turizmu nian.

#### 4.5. Komérsiu

Formulasaun de polítikas komersiais sei permite eskoamentu produsus husi setór primáriu no sekundáriu nian, iha nível Nasionál ho internasionál, tanba aumentu iha exportasaun produsus bele jera (ka kria) rikezas ba indústria no, konsekuentemente (katak, ho ida ne'e), ninia kreximentu.





Govurnu sei kontinua implementa medidas hodi regula atividades komersiais no aprova polítikas ba expansaun de merkadus, inklui divulgasaun de produsus ho valor ekonómiku akresentadu, liuhosi estratéjias de merkadu ho relasoens públikas ne'ebé bele promove Timor-Leste ho ninia produsus iha rejiaun no iha mundu.

Iha ámbitu ida ne'e, Govurnu sei:

- Fortalese ka hametin papel do setór privadu komersial;
- Reforsa Sentru Lojístiku Nasionál;
- Haree di'ak fali no expande (ka habelar) projetus de konstrusaun de armazéns ba tránzitu merkadorias iha zona fronteira terrestre;
- Harii merkadus munisipais ho qualidade;
- Dezenvolve mekanizmus ba sertifikasaun, promosaun, divulgasaun, marketing no distribuisaun fízika produsus nasionais;
- Finaliza prosesu adezaun, hanesan membru plenu ba Organizasaun Mundiál Komérsiu no ASEAN;
- Harii sentrus komersiais, ne'ebé bele apoia zonas de dezentvolvimentu rejionál, tuir Kuadru Nasionál de Planeamentu;
- Investe iha formasaun no kapasitasaun iha setór privadu, atu bele hadi'a kompetitividade Nasionál e internasionál;
- Aumenta asoens iha inspesaun no fiskalizaun de atividades komersiais;
- Reforsa kapasidade da Autoridade de Inspesaun no Fiskalizaun ba Atividade Ekonómika, Sanitária no Alimentár (AIFESA), ba kontrolu kona-ba qualidade, kondisoens transporte no salubridade de jénerus alimentares no fatin produsaun no komersializasaun, inklui introdusaun “livro de reklamasaun” iha estabelesimentus komersiais, sei hanesan projetu-pilotu, atu bele avalia se iha sentidu atu halo avaliasaun kona-ba ninia aplikasaun real;
- Implementa no hadi'a kuadru legál, relaciona ho atividades komersiais;
- Reforsa no kapasita Institutu Qualidade Timor-Leste nian;
- Halo estudu viabilidade sira ne'ebé presiza atu estabelese Free Trade Zones (Zona Komérsiu Livre);
- Estabelese Portál Informasaun Komérsiu nian.





#### 4.6. Indústria

Vizaun kona-ba Timor-Leste ho ekonomia ida ne'ebé moderna no diversifikada sei depende ba investimentu ne'ebé halo iha kreximentu de indústrias prinsipais: agrikultura, turizmu ho petróleu, tanba iha vantajens boot iha nível indústria sira ne'e, haree ba rekursus naturais ne'ebé iha, lokalizasaun jeográfika no perfil ekonómiku.

Maibé, Timor-Leste iha kondisoens tomak atu dezenvolve indústrias subsidiárias seluk ba dezvoltimentu de setores primários de produsaun.

Agroindústria, ne'ebé signifika transformasaun na'an, latisínus (ka produsus husi susu-been), ikan ho produsus agrícolas ba fali subprodus ho exelénsia, ho natureza biolójika, bele hamosu marka referénsia ho poténsia de exportasaun ba merkadus seletus (ka espesiais) ho presu ne'ebé aas liu.

Timor-Leste sei aposta iha transformasaun matéria-prima ba embalamentu de produsus, mobiliáriu, konstrusaun sivil, entre buat seluk, hodi multiplika ka aumenta oportunidades transformasaun rekursus naturais oioin, ba abastesimentu lokál, reduz nesesidade husi importasaun, hodi ba ona exportasaun produsus orijinais ho valor akresentadu.

Ho dezvoltimentu setór agríkola, sei mosu mos kondisoens ba produsaun sereais ne'ebé boot liu, ortofrutíkola no pekuária, ho tipu hanesan semi-intensiva no, liuliu, extensiva. Se ita asosia (ka liga) kreximentu ne'e ho promosaun agroindústria, ida ne'e bele lori ita ba dezvoltimentu sustentável país ne'e nian, tanba ita bele poténsia (ka loke dalan ba) dezvoltimentu espontáneu iha merkadus komersiais lokais no bele mos halo nia distribuisaun iha nível Nasionál, hodi otimiza rekursus endójeneus (ka internus), proteje meu-ambiente hodi respeita kapasidade auto-rejenerasaun ekosistema nian.

Lihosi kreximentu setór industriál tuir planu ne'ebé iha, Governu bele promove objetivus hirak ne'e:

- Aumenta oferta beins de konsumu esensiais ba bein-estár komunidades lokais nian;
- Kria oportunidades ba empregu;
- Impulsiona (ka dudu ba oin) no valoriza dezvoltimentu do setór primáriu: agrikultura, peskas, pekuária no florestas;
- Dezenvolve pequenas ho médias empresas, aproveita rekursus umanus no materiais lokais;
- Inkrementa (ka dezenvolve) papel do setór privadu no dezvoltimentu rural;





- Kontribui ba redusaun beins importadus, liuhosi aumentu produsaun de beins nasionais ho kualidade;
- Prezerva meiu-ambiente, garante katak áreas industriais bele minimiza impaktus aat iha ambiente no iha abastesimentu ba bee, rekolla rezíduos sólíduos ho Sistema de esgotus ne'ebé adekuadus ba rezíduos industriais.

Nune'e, Governu sei aposta iha indústriá hanesan motor determinante ida, ba dezvoltimentu ekonómiku Nasionál, ne'ebé iha nia baze iha dezvoltimentu rurál, liuhosi asaun prinsipál sira, hanesan tuir mai:

- Finaliza Política Nasionál kona-ba Dezvoltimentu da Indústriá ho baze iha Kuadru Nasionál de Planeamentu, hodi determina prioridades de produsaun, tuir rekursus disponíveis (ka ne'ebé iha), inklui selesaun de produsus prioritáriu ba konsumu internu no ba exportasaun;
- Halo revizaun ba kuadru legál, iha ámbitu propriedade industriál, lisensiamentu industriál, inklui kestoens relasiona ho lokalizasaun unidades no parkes industriais, atu garante prezervasaun ambiental;
- Kontinua apoia atribuisaun ba kréditu públiku ba indústriá ki'ik sira;
- Apoia instalasaun de unidades de produsaun industriál, hanesan agroindústrias no promove sentrus ba inkubadoras industriais;
- Promove kriasaun no dezvoltimentu de parkes industriais, liuhusi koordenasaun ho ministériu sira ne'ebé relevante;
- Estabelese Parke Industriál iha Tíbar (estudu viabilidade kona-ba Parke Industriál Tíbar, atu garante armazenamentu produsus importasaun/exportasaun no mós produsus lokais hodi substitui produsus importadus, estudu ne'e iha tiha ona);
- Implementa kadastru kona-ba propriedade industrial;
- Dezvolva formasaun empreeziál no téknika ba mikro, pekenas no médiás empreezas no indústrias, hodi envolve mós setór bankáriu;
- Introdús teknolojias foun iha setór primáriu no sekundáriu ba dezvoltimentu da agroindústriá;







- Dezenvolve kampañas ba agrikultores no produtures agríkolos kona-ba tranzisaun atividades primárias ba atividades industriais, hodi garante sira-nia envolvimentu no motivaun;
- Dezenvolve parserias ho setór privadu, Nasionál no internasionál, ba kooperasaun iha setór ne'e, no mós ba transferénsia de koñesimentus sientífikus no téknikus;
- Koordena ho entidades governamentais relevantes, hanesan Ministériu da Edukasaun, kona-ba introdusaun de kurríkulus ba produsaun agroindustriál, hanesan iha nível Ensinu Sekundáriu Tékniku-Vokasional;
- Kontinua investe iha projetus industriais ki'ik, hanesan ba produsaun masin, mina-nuu, sabaun, espesiaris ho bee iha botir, entre buat seluk;
- Operasionáliza, reforsa no expande (ka habelar) indústriia de resiklajen ba plástiku iha Timor--Leste;
- Reforsa produsaun ho implementasaun lejislasaun ne'ebé konsidera protesaun ambientál iha ámbitu kreximentu do setór industrial;
- Halo revizaun ba rejime jurídiku GESPIN (Jestaun Parkes Industriais) S.A. nian.

#### 4.7. Setór Privadu

*Tuir Sensus 2022, Timor-Leste iha besik 48,7% husi populasaun ho idade tinan 20 ba kraik. Ida ne'e signífika katak, iha tinan 5 to'o tinan 10 tuir mai, sei tama iha merkadu de traballu jovens, rihun ba rihun, ho aspirasaun atu prepara sira-nia moris ida ne'ebé dignu no halo parte iha ekonomia ida justa ne'ebé valoriza sira-nia servisu. Iha konjuntura ida ne'e, setór privadu, independentemente (katak, la haree ba) nia vokasaun no dimensaun, sei sai hanesan motor prinsipál iha ita-nia ekonomia Nasionál, ne'ebé garante kriaun de empregu, nune'e, sai fator boot hodi halakon kiak no hadi'a kapitál sosiál ba nasaun.*

Ekonomia privada ida saudável, ne'ebé bele hamrik ho di'ak ho prestasaun de kontas ne'ebé rigorosa (ka tenke di'ak), sei fó ba país, la ós de'it elementus estatistikus hodi orienta ba jestaun Nasionál, kontributu boot hosi reseita fiskál, ne'ebé determinante atu sustenta orsamentu jerál do Estadu, nune'e mós fó solusaun ba problemas sosiais iha Timor-Leste.

Diversífika ekonomia sai objetivu prinsipál ba Governu ida ne'e, ne'ebé nesesáriu atu kria kondisoens fiskais no burokrátikas, ne'ebé permite (ka halo) investidores, nasionais ka





internasionais, iha vontade atu aposta (ka mai investe) iha ita-nia Rai. Nune'e mós, Polítikas transversais hotu-hotu, ne'ebé haree ba desenvolvimentu ba kapitál sosiál, ba desenvolvimentu infraestruturas no mós ba desenvolvimentu iha setór governasaun nian, polítikas ne'e la'o hamutuk mak impulsiona (ka dudu) desenvolvimentu ekonómiku no kria kondisoens ba empriendedorismu.

Nafatin iha kontestu ida ne'e, desenvolvimentu ba Kuadru Nasionál de Planeamentu, ho objetivu atu kria Pólus de Desenvolvimentu no Zonas Ekonómikas Espesiais, sai fundamentál hodi harii "áreas empresariais" ka "zonas industriais" iha País, tuir spesifisidades (ida-idak nian) no potencialidades iha rejiaun ida-idak, no hosi ne'e, bele dada setór privadu no kria emprego ne'ebé sustentável:

- Hadi'a polítikas de empriendedorismu Nasionál, ne'ebé inklui valorizasaun no edukasaun ba empriendedorismu, reduz tiha obstákulus no fó apoiu ba empreendedorismu, ne'ebé abranje mós asesu ba iha internet no ba "know-how";
- Kria Sentru hodi fó Apoiu ba Empriendorismu, ba prestasaun de servisu sira hodi suporta no apoiu ba negósius foun;
- Desenvolve estudus ba atribuisaun de insentivus ba setór privadu, liuliu apoiu ba kriaun no kreximentu ba empresas ki'ik;
- Desenvolve estudus no reforma kuadru legál iha setór finanseiru (revoga regulamentasaun UNTAET nian ne'ebé sei vigora hela, previne abuzus finanseirus, nsst);
- Elabora estudus de investimentu no planu de negósius, ho objetivu harii Banku de Investimentu ida iha Timor-Leste, hanesan parseiru estratéjiku ba Estadu, iha promosaun ba investimentus públikus, ne'ebé sei aumenta empriendedorismu no, husi ne'e, empresas nasionais no internasionais bele mosu tan;
- Halo estudus kona-ba regulasaun ba seguros no promove desenvolvimentu iha setór ida ne'e, hodi permite hamosu seguradoras nasionais;
- Reforsa instituisoens ne'ebé responsáveis ba produsaun da estatística Nasionál ne'ebé rigorosa, hodi informa setór privadu Nasionál no internasionál;
- Atualiza, iha tinan rua-rua, "Guia do Investidor";
- Haboot no reforsa kapasidades husi Institutu de Apoiu ba Desenvolvimentu Empreziariál (IADE);





- Reforsa no kapasita servisu sira husi Ajénsia ba Promosaun Investimentu no Exportasaun Timor-leste nian (TradInvest);
- Halo reforma husi Servisu Rejistu no Verifikasaun Empreziál (SERVE) nian;
- Promove Kriasaun no dezvoltimentu de kooperativas, liuliu iha áreas rurais, ne'ebé halo parte integrante ba pakote dezvoltimentu da ekonomia rural, hodi kapasita empriedorismu no insentiva empresas ki'ik iha setors produtivus, liuliu iha áreas agrikultura, peska no pekuária, nune'e atu kria ambiente ne'ebé di'ak ba kriasaun kooperativas no fó apoiu ba expansaun de kooperativas ne'ebé iha tiha ona, ho forma sustentavel;
- Insentiva no apoia kriasaun de mikro no médias empresas, ho atensaun espesial ba dezvoltimentu iha áreas rurais, liuhosi programas de kapasitasaun, assesu ba kreditu no kriasaun de merkadu;
- Kontinua dezvoltolve programa "Inkubadora de Negósius", hodi nune'e permite assesu ba finansiametu de negósius, tuir kriterius no prioridade ne'ebé define ona husi Governu;
- Hametin investimentu ne'ebé kontínuo no reforsa iha formasaun profesionál, ne'ebé transversál ba atividades estratéjikas Nasaun nian, atu nune'e dezvoltolve karteira Nasionál ba profesionais kualifikadus ne'ebé suporta insiativa privada;
- Kontinua dezvoltolve no partisipa iha inisiativas, eventus no konferéncias internasionais ba promosaun parserias estratéjikas entre empresas timoroan no empresas internasionais;
- Hadi'a komunikasaun no hadi'a parserias estratéjikas entre setór públiku no privadu, hodi halo aliñamentu ba prioridades, atu nune'e setór privadu bele sai parseiru estratéjiku ida di'ak-liu ba Governu;
- Halo reavaliasaun ba atividade sira Banku Nasionál de Comercio de Timor-Leste nian;
- Kontinua koopera ho Kámara do Komérsiu no Indústria de Timor Leste;
- Reativa TIA-GT (Timor-Leste, Indonézia & Austrália Growth Triangle) hodi fó apoiu atu konstitui plataforma ba dezvoltimentu ekonómiku sub-rejionál ne'ebé integradu no ba formalizasaun estratéjia ba kreximentu iha triángulu ne'e, ida ne'ebé sei poténsia (ka dudu maka'as) investimentu privadu iha rai laran, liuhosi esforsu no kooperasaun ne'ebé kria ba empresas/indústrias, cooperativa no Kámaras de Komérsiu no Indústria husi Países tolu ne'e, liuliu hodi halo atuaun iha Oekusi Ambeno;





- Kontinua Revee no produz lejizlasaun foun, atu bele promove dezentvolvimentu iha setór privadu, ne'ebé efisiente, transparente no sustentável;
- Hadi'a sistemas no prosedimentus, ne'ebé armoniza ba malu no simples, inklui mós disponibilizasaun de formulárius no dokumentus, ne'ebé fásil atu lé no iha 'linguas-de-traballo' oin-oin, ne'ebé haree dehan nesesárius duni ba relasaun komersiál entre ita-nia Estadu ho investidores.

#### 4.8. Empregu

Mudansas estruturais ne'ebé hakarak implementa iha ekonomia sei fó oportunidades de empregu ba timoroan. Bainhira ekonomia ne'e aumenta daudaun no bainhira bele transforma daudaun ona setór agríkola no setór privadu, hodi dudu produtividade ne'ebé bot liu ona, hanesan mós bainhira investmentu iha edukasaun no saúde harii daudauk forsa-de-traballu ida ne'ebé kualifikada ona, Timoroan sira sei kontribui maka'as liután ba kreximentu de ekonomia.

Bainhira ekonomia ne'e dezentvolve, maka setór de servisu sira sei aumenta no aumentu ida ne'e korresponde ba oportunidades boot liu ba kriasaun de empregu, ho perspetiva (ka hanoin) espesiál ba feto sira.

Polítika Governu nian ba setór de empregu, bele haree iha ninia programa, tamba investmentus iha setores de dezentvolvimentu oioin, mak sei kontribui ba forsa-de-traballu ne'ebé saudável liu no produtiva, forsa-de-traballu ne'ebé edukada liu no kualifikada no, ho diversifikasaun iha produsaun Nasionál, sei mosu oportunidades barak ba kriasaun de empregu.

Governu sei:

- Haree fali (ka Revee), aprova no implementa Estratéjia Nasionál de Empregu nian 2017-2030, ne'ebé hakarak aumenta prokura iha merkadu de traballu, hadi'a oferta merkadu de traballu no kontinua hametin instituisoens de merkadu-de-traballo;
- Promove kriasaun de empregu ba jovens, ba adultus no ba feto sira, hodi asegura sempre prinsípiu de igualdade ba oportunidades, iha kestaun jéneru;
- Kria mekanizmus hodi kombat servisu prekáriu (ka la permanente), inklui liuhusi monitorizasaun ba empresas no entidades empregadoras (ka ne'ebé fó servisu), hanesan mós garante implementasaun ba regulamentus laborais no eskema ba protesau social;





- Aumenta tan númeru de traballadores timoroan, ne'ebé bá servisu iha estranjeiru, reforsa tan protokolus de koperasaun no hadi'a monitorizasaun ba prosesu sira ne'e no akompañamentu ba traballadores;
- Estabelese Sentru de Empregu no Orientasaun Profisionál iha Munisípiu ida-idak (PED 2020);
- Regula Lei do Trabalhador (no halo revizaun, karik presiza), reforsa mekanizmus de diálogo hodi aumenta produtividade, no propoin regulamentasaun ba servisu doméstiku (servisu iha uma laran);
- Hadi'a mekanizmus kona-ba rezolusaun de konflitus ne'ebé mosu iha servisu, inklui liuhusi mekanizmus ba mediasaun no konsiliaaun;
- Aumenta kualifikasaun de traballadores, liuliu ba jovens, ho objetivu atu aumenta kompetividade sira nian iha merkadu de traballu internasionál;
- Disponibiliza programa ida akonsellamentu profisionál nian ba joven estudante finalista sira, liuliu liuhusi espozisoens kona-ba karreira profisionál, atu realiza iha Munisípiu hotu-hotu;
- Aumenta Programa Empregu Temporáriu (ba tempu badak), liuhusi estabelese parseria ho Nasaun amiga sira.

#### 4.9. Kooperativas

Kooperativas, liuliu kooperativas agríkolos, iha importánsia estratéjika ba dezvoltimentu Nasionál. Harii kooperativas ne'e hanesan forma ida atu enkoraja kreximentu setór privadu iha zonas rurais no estimula (ka insentiva) partisipasaun ativa iha sistema ekonómiku Nasionál.

Governu sei kontinua investe iha formasaun de rekursus umanus no kapasidade institusionál, iha nível kooperativas no providénsia ferramentas no ekipamentus, matérias-primas no konsesoens pekuniárias (ka finanseiras) ne'ebé permite hadi'a nia infraestruturas no aumenta kualidade husi nia produs, ho hanoin halo expansaun de merkadus no aumentu iha atividades de komérsiu.

Inkrementa (ka dezvoltolve) no sosializa ideias ho projetus ne'ebé bele iha, ba famílias ho comunidades, ne'e hanesan mos forma ida hodi kria kondisoens ba dezvoltimentu kooperativa no ekonomia familiár sira.

Buat sira ne'e balun, mak hanesan:





- i. Produsaun Bani-Been: Timor-Leste produz rasik bani-been ho lilin ne'ebé bele aproveita ba dezvoltimentu kooperativas, ne'ebé hadi'a ekonomia familiár. Aposta ida ne'ebé organiza didi'ak iha produsaun bani-been, ho apoiu husi kooperativa, bele hanesan mos kontribuisaun importante ida ba ekonomia familiár;
- ii. Produsaun Paun: investe iha sementeiras husi sekeiru, katak fini ba rai-maran, liuliu ba trigu no 'shorgum', no mós ba sevada ho senteiu ba produsaun fariña paun nian, bele hanesan estratéjia importante ida ho benefísiu diretu ba famílias ho comunidades. Apoia produsaun sereais no téknikas moajen (ka dulas nian), ho ninia kooperativas panifikasaun (ka halo/tunu paun), (ka, tuir mai, nia industrializasaun);
- iii. Produsaun laktisínus (katak, husi susu-been): investimentu iha pekuária, liuliu ba kriaun de gadu, bele insentiva produtores atu transforma susu-been karau-vaka, karau timor no bibi nian ba susu-been, 'iogurtes' ka produktu seluk tan, hodi kontribui hadi'a ekonomia familiár;
- iv. Produsaun mina nuu no produktu sira ne'ebé mai husi nuu;
- v. Produsaun masin no "noz de vela" (*candlenut*).

Governu, iha área ida ne'e, sei kontinua:

- Presta (ka fó) apoiu no konsesoens públikas ba kooperativas, ne'ebé hala'o atividades setór privadu iha áreas oioin;
- Insentiva movimentus kooperativus, asociativus no mutualistas atu bele garante partisipasaun komunitária no ajuda dinámika ne'ebé mosu iha terseiru setór (ka setór datolu), iha luta hasoru dezigualdades sociais no ekonómikas;
- Insentiva respostas ne'ebé organizadas, husi sociedade sivil, ba nesidades sociais, liuhosi konsesaun de beins no prestasaun de servisu sira, no utilizasaun sosiál ba exedentes ne'ebé hetan;
- Fasilita asesu de crédito ba kooperativas;
- Revee sistemas kona-ba asesu ba crédito ba kooperativas de crédito, inklui simplifikasaun iha prosesus ne'e;
- Promove intercámbiu entre kooperativas;





- Insentiva fornimentu de matérias-primas ne'ebé produz liu hosi kooperativas ba indústriá setór ida-idak, no ba distribuisaun ka sosa direta ba konsumidores;
- Propoin no konstrói no reabilita Sentru de Armazenamentu local, conforme nesesidades de produsaun hosi kooperativas no tuir nesesidades ne'ebé iha;
- Insentiva fornimentu de bens alimentares no sira seluk ne'ebé produz hosi kooperativas, ba merenda escolar;
- Koordena ho Centro Nacional de Lojística (CNL) no setór privadu ba akizisaun produsaun hosi kooperativas;
- Promove kapasitasaun ba kooperativas, liu hosi formasaun téknika oioin atu kooperativas bele jere rasik ho efisiénsia no efikásia;
- Revee kuadru legál kona-ba Kooperativa sira, ne'ebé foin aprova;
- Promove rekrutamentu no fó formasaun ba jestór foun sira ne'ebé iha kbiit atu jere kooperativa sira ho efisiénsia no efikásia.

#### 4.10. Ambiente

Tuir Konstituisaun da Repúblika, ema hotu-hotu iha direitu ba ambiente vida umana, ne'ebé sadiu no ekolojikamente ekilibradu, no mós iha devér atu proteje no hadi'a ba jerasoens vindouras (ka aban-bainrua nian). Estadu rekoñese katak preziza prezerva no fó valor ba rekursus naturais. Estadu tenke promove asoens ba defeza do meu-ambiente no salvaguarda desenvolvimentu sustentável ba ekonomia.

Povu timor iha ligasaun ne'ebé forte ho meu-ambiente, ne'ebé hadulas nia, la'ós de'it tanba kestoens relasiona ho sobrevivénsia (ka tahan moris) maibé mos tanba razões kulturais ho antropolójikas. Maibé, aleinde kauzas naturais, hanesan udan, esplorasau ne'ebé dezekilibrada, ka mezmú destruisaun meu-ambiente, ne'ebé, durante ne'e, provoka erozaun beibeik ba rai, inklui hahalok hanesan tá demais ai no sobu ai-laran boot sira, sunu rai no la iha planeamentu ho monitorizasaun ba atividades agríkolás no konstrusaun infraestruturas.

Erozaun (ka rai monu) no dezlizamentus (ka rai halai), mak kauza degradasaun ba rai no estraga mos kaptasaun bee, hodi hamenus kuantidade no qualidade bee husi rai-okos no ameasa vida selvajen ho rekursus alimentares. Husi sikun seluk, ábitus (ka lisan) sosioekonómikus hanesan uza ai-maran hodi te'in no poluisaun (ka hafo'er atmosfera) tanba emisoens (ka suar) husi karreta ho





motorizadas no sunu ai-laran, buat sira ne'e hotu mak kontribui hodi aumenta doensas respiratórias (ka moras dada-iis nian).

Nune'e mós, alterasoens klimátikas ne'ebé halo nível tasi sa'e aas no hamosu kondisoens meteorolójikas ne'ebé aat tebetebes, hodi provoka inundasoens, inseguransa alimentar, alterasaun iha kompozisaun kímika ho temperatura tasi ne'ebé afeta resifes korál (ka fatuk ahu-ruin) iha Tasi, buat sira ne'e hotu mak sai hanesan dezafiu ambientál sériu ida, ne'ebé Timor-Leste tenke fó resposta no kria mekanizmus de prevensaun.

Bele dehan katak ne'e hanesan dezafiu ida tan ba Timor-Leste, haree ba ninia faze embrionária (foin hahú) iha dezvoltimentu, ne'ebé presiza tebes duni kreximentu de indústrias de suporte (ka hodi fó apoiu) ba kreximentu ekonómiku. Maibé, bele subliña mos katak kontribuisaun Timor-Leste ba problema alterasoens klimátikas, ne'e ki'ik tebes duni, tanba Timor-Leste país ida ne'ebé ladún hasai 'dióksidu de karbonu', la hanesan ho nasoens emerjentes no dezvoltidas.

Importante mos atu refere iha ne'e katak defeza ho konsersaun do meu ambiente, inklui promosaun ba biodiversidade, sai hanesan kontributu importante ba dezvoltimentu indústriia ida ho potenciál maka'as, katak, kreximentu setór turístiku.

Tanba ne'e, Governu sei kontinua ho objetivus prioritáriu ba área ambientál, hanesan tuir mai:

- Haree di'ak fali no reforsa kuadru institusionál no legál ambiente nian, kona-ba uzu sustentável de rekursus naturais, inklui planeamentu ne'ebé di'ak liu, ho monitorizasaun iha setores transversais ba dezvoltimentu país nian, hodi prevene deteriorasaun (ka degradasaun) ambientál no hadi'a jestaun ambientál país ne'e nian;
- Promove kampanhas sensibilizasaun nian kona-ba kestoens ambientais no desenvolve konteúdu ho asoens, ne'ebé permite edukasaun ambientál ida ne'ebé jeneralizada, ba labarik sira, jovens, adultus ho comunidades, liuliu kona-ba prezersaun ambiente;
- Hadi'a koordenasau intersetoriál, atu nune'e bele inklui preokupasoens ambientais iha programas de dezvoltimentu País, inklui áreas agrikultura no peskas, dezvoltimentu de infraestruturas, turizmu ho esplorasau rekursus enerjétikus;
- Kapasita no hadi'a instituisoens no organizmus ne'ebé responsáveis ba jestaun, monitorizasaun no fiskalizasaun kona-ba kestoens ambientais, ho prioridade ba localidades (ka fatin) no áreas de intervensaun, ne'ebé ho risku boot liu ba degradasaun ambiental;
- Reforsa parserias nasionais no internasionais ba jestaun ambientál ne'ebé di'ak liu.







Tanba ne'e, Governu propoen atu dezenvolve asoens, hanesan tuir mai:

- Implementa rejime jurídiku kona-ba jestaun, protesaun ho konsersasaun ambientál, inklui estratéjias ho planus asaun ne'ebé aprova tiha ona, inklui lejizlasaun kona-ba biodiversidade Nasionál, protesaun animais selvajens ka fuik, nsst;
- Kontinua akompaña no subskreve akordus, programas no mekanizmus internasionais, ne'ebé relaciona ho jestaun no konsersasaun ambiente no alterasoens klimátikas, inklui nia tradusaun iha lejizlasaun Nasionál no implementasaun medidas no normas, ne'ebé adota tiha ona (diminuisaun emisaun HCFC, Konvensaun Viena kona-ba ozono, Konvensaun InterNasionál UNFCCC, UNCCD, UNCBD, Akordu Paris, no sst);
- Introduz (ka hatama) programas foun ho kampañas kona-ba redusaun sunu rai no sunu ai-laran, durante época (ka tempu) rai-maran, inklui substitui (ka troka) neineik ábitu uza ai-maran hanesan fonte enerjia;
- Dezenvolve programa kona-ba rekolla no tratamentu rezíduus sólíduus no líkidus (ka maran no bén) iha país tomak, ho prioridade ba área Díli;
- Kontinua asegura implementasaun do Prémio ba Suku Saudável no dezenvolve Prémio “Habali Ambiente” ba entidades komersiais, industriais no privadus, atu promove prinsipiu poluidor-pagador, konsersasaun ba biodiversidade, redusaun ba emisaun karbonu ka medida ne'ebé ho objetivu hadi'a ambiente;
- Dezenvolve no implementa regulamentus kona-ba kontrolu poluisaun ar, ruídu (ka tarutu) no rai, ho mós poluisaun atmosférica (ka lalehan) tanba gazes (ka suar fó'er) ne'ebé sai husi veikulus;
- Kontinua investe iha kapasidade rekursus umanus iha área kontrolu ambientál, inklui uzu de metodolojias foun ho testes ambientais;
- Estabelese laboratóriu ambientál ida, hodi halo testes ambientais ho ninia inspesaun, monotorizasaun no fiskalizasaun rasik;
- Produz estatísticas ambientais kona-ba Timor-Leste no asegura nia divulgasaun, tantu ba Ezekutivu hodi bele foti desizaun, hanesan mos ba koñesimentu públiku ein-jerál;
- Implementa Estratéjia Nasionál ba mitigasaun ka redusaun lixu (ka fó'er) husi tasi;
- Implementa Estratéjia ho Planu de Asaun kona-ba Biodiversidade Nasionál;





- Servisu hamutuk ho CPLP no ASEAN, iha kompromisu atu dezenvolve “Estratêjia kona-ba Oseanus”, buat ne’ebé transversál ba áreas hanesan ambiente no ekonomia;
- Kontinua investe iha rede boot ida ba parkes nasionais, terrestres no mariñus, ne’ebé bele proteje amostras representativas de biodiversidade país nian;
- Insentiva koñesimentu ne’ebé boot liu, kona-ba protesaun ambientál no princípios ambientais, iha kurríkulus iha ensinu formál, no mós promove kampañas ho asoens liuhusi ensinu naun-formal;
- Dezenvolve Sistema Nasionál kona-ba Áreas Protejidas no Parkes Nasionais no Konservasaun Biodiversidade;
- Dezenvolve koordenaun entre entidade governamentál ho responsabilidade ba setór ambientál no entidade governamentál ne’ebé ho responsabilidade kona-ba setór turizmu, hodi kria programas kona-ba protesaun ekosistemas espesífikus, hanesan tartarugas (ka lenuk), no korais (ka ahu-ruin), etc.;
- Implementa “Polítika Zero Plástiku” iha territóriu tomak no dezenvolve programas ne’ebé efikazes, hodi kombate plástiku, hodi halo nia substituisaun bainhira bele, inklui sensibilizasaun kona-ba perigu uza plástiku, liuliu tanba degradasaun (ka estraga) tasi Timor, no mós oinsá dezenvolve indústria resiklajen ba plástiku;
- Kontinua halo identifikaun no levantamentu ba dadus kona-ba rikeza da biodiversidade, inklui mapeamentu do ekosistema hosi biodiversidade oin-oin iha Rai leten, Tasi Laran, fatin bokon sira no ekosistema seluk ne’ebé iha risku boot;
- Promove no reforsa prátika kulturál ne’ebé di’ak kona-ba protesaun ambientál, halo konservasaun ba natureza, protesaun ba fatin patrimóniu ho biodiversidade ne’ebé relevante;
- Promove setór ambientál iha Timor-Leste tuir Polítika ba Ekonomia Azul Timor-Leste nian, inklui promosaun kampaña sira kona-ba kestaun ambientál espesífika sira ne’ebé afeta tasi, tanba tasi hetan hela presaun antrópica (presaun husi atividade ema nian) makaas, no ninia konsekuénsia, liuliu konsekuénsia sira ne’ebé relaciona ho poluisaun, alterasaun klimátika no peska ne’ebé demais ka agresiva.





## 5. KONTINUA HO KONSOLIDASAUN GOVERNATIVA

*“Timor-Leste, nasaun ida ne’ebé sei iha rendimentos ki’ik, ho setór privado ne’ebé foin hahú desenvolve-an ho mós diversifikasaun ekonómika ne’ebé limitada, ekonomia ne’ebé konsentradu liu iha produsaun agríkola. Maibé ita-nia nasaun iha oportunidades ekonómikas no iha potenciál boot, atu sai Nasaun ida ho rendimentus médius”.*

Maski progressus barak maka hetan ona iha área ekonomia, Timor-Leste tenke continua investe iha planeamentu estratéjiku hodi la’o ba ekonomia ida moderna no diversifikada. Estratéjia, simples no lós, atu promove diversifikasaun ekonómika no hamenus dependénsia ba reseitas mina-rai, maka atu poténsia (ka fó kbiit) ba Setores produtivos hanesan indústrias 4 importantes - agrikultura, turizmu, petróleo no minerais no manufactureira, liu husi estudus atu aproveita rekursos naturais ne’ebé iha, mais-valias husi pozisaun jeográfika no husi perfil populasaun nian.

Nu’udar fator no rezultadu husi hanoin no buka atu dezenvolve objetivu ne’e, mak kriaun de empregu no promosaun do empreendedorismo, ne’e duni Governu tenke kria kondisoens ba jovens, enkuantu promove mos setór privado, tamba rekursus rua ne’e mak sei aumenta produtividade Nasionál no kria oportunidades ba kreximentu ekonómiku ne’ebé sustentável.

Governu Timor-Leste nian sei transforma rikusoin naturais, iha rai-laran ka iha tasi-laran, ba Seguransa alimentar, ba saúde, ba produtividade no ba oportunidades de kriaun de empregu. Nune’e mós sei transforma idrokarbonetos (ka mina-rai ne’ebé todan) ba oportunidades de desenvolvimentu de infraestruturas, oportunidades ba setór privadu no ba kriaun de empregu. Aleinde ne’e, sei transforma mós rikeza ne’ebé iha nia emar, nu’udar timoroan, transforma paizajen natural no ninia kultura ímpar (ka únika) ba empreendedorismu no ba aumentu de rendimentus iha País tomak.

Atu halo ida ne’e, esensiál mos atu dezenvolve Kuadru Nasionál de Planeamento ida kona-ba Polos (ka Sentrus) de Desenvolvimento, iha rejioens balun iha ita-nia Rain, ne’ebé sei define karakteristikas rasik iha rejiaun ida-idak no potenciál ba kreximentu husi setór ida-idak no subsetores, tuir rekursus disponíveis (ka iha) iha fatin-fatin, atu implementa asoens no estratéjias kona-ba kreximentu sustentável no ba desenvolvimentu ekuitativu iha País tomak, tuir mote ne’ebé hateten katak *“se natureza rika duni, povo labele sai kiak”.*

Tan ne’e, prosesu ba Desentralizasaun Administrativa krusiál duni atu, iha Munisípiu ida-idak, sira-nia sidadauns rasik mak sei esforsa-an atu koñese potencialidades ne’ebé ezistentes, atu





diskute no planeia ho objetividade oinsá sira impulsiona atividades ekonómikas iha kada Rejiaun País ne'e nian.

## 5.2. Polítika Makroekonómika

Objetivo ida iha polítika makroekonómika husi IX Governu, maka atu kria kampu de serviço ba ema hotu, liuliu ba jovens no moris di'ak ba povo tomak. Nune'e, Governu nia alvo maka atu kria kampo-de-servisu foun no atu redús taxa dezempregu, redús taxa kiak mínima ba 10%, durante tinan lima oin mai.

Atu atinje objetivos hirak ne'e, polítika makroekonómika sei potencia dezvoltimentu ekonómiku ho kreximentu ne'ebé boot, inkluzivu no sustentável, ba diversifikasaun ekonomia liuhusi dezvoltimentu setores produtivos (agrikultura, turizmu, petróleo no minerais, no indústria manufactureira), promosaun ba investimentu husi setór privado no hametin sustentabilidade fiskál no desenvolve indústria financeira.

Durante tinan lima oin mai, Governu hakarak atinje média kreximentu ekonómiku liu 5% no taxa inflasaun ida ne'ebé tuir saida maka define ona iha Planu Estratéjiku Dezvoltimentu 2011-2030, ho kontribuisaun boot husi setór privadu iha setores produtivos. Governu sei kria kondisoens ba investimento, aumenta investimentu husi setór privado, no minimu 10% kada tinan, hodi kontribui atu diversifika ekonomia, aumenta baze ba imposto, hodi nune'e bele viabiliza objetivo kona-ba sustentabilidade fiskál, no kontribui ba dezvoltimentu ne'ebé inkluzivu no sustentável.

Governu sei desenvolve uluk infraestruturas, rekursos umanos no hametin instituisoens públikas, nu'udar pré-kondisaun atu viabiliza implementasaun polítika makroekonómika, hodi atinje ninia objetivos. Nu'udar pré-kondisaun atu estimula dezvoltimento iha setores seluk, Governu sei kontinua desenvolve infraestruturas ho objetivo atu suporta kreximento ekonómiku no atu hametin produtividade, no konektividade.

## 5.2. Setór Financeiru

Setór financeiru iha Timor-Leste sei limitada hela ba setór bankáriu no seidak iha merkadu financeiru. Merkadu financeiru fasilita osan naksulik husi ema sira ne'ebé iha osan liu (surplus) ba sira ne'ebé presiza osan, liuhusi mekanizmu diretu no indiretu. Merkado financeiru ida luan no transparente, mak fasilita investimentu iha setores produtivos no dudu kreximentu ekonómiku. Governu sei servisu hamutuk ho entidades relevantes, liuliu ho Banco Centrá Timor-Leste (BCTL)





atu promove dezentvolvimentu setór finanseiru, liuhusi kria ambiente favorável hodi fasilita atividades komersiais husi sector bankáriu, instituisoens de seguros, instituisoens ba mikro kréditu no merkadu finanseiro iha Timor-Leste.

Polítika de dezentvolvimentu ba setór finanseiru ne'e sei kontribui ba mudansa iha estrutura ekonomia nian, ne'ebé sei depende maka'as ba despesas públicas (*public sector driven economy*) ba ekonomia ida ne'ebé sustentável, tanba sustenta ho atividades husi setór privado nian (*private sector driven economy*).

Iha âmbito ida ne'e, Governu mós sei:

- Revee rejime legál setór finanseiru nian, no revoga lejizlasaun dezatuizada ne'ebé to'ogora vigora hela;
- Kria rejime finanseiru koerente ho kuadru legál no institusionál, hodi evita prátika sira ne'ebé ladi'ak iha setór finanseiru;
- Promove estabelecimento ba rejime jerál ida atu fó garantias reais (ka loos) kona-ba sasán móvel no imóvel, no mós rejisto ba ativu sira (beins ka rikusoin) no estabelese jestaun koordinada ida, ho intervensaun husi Ministériu competente sira hotu;
- Halo estudus kona-ba dezentvolvimentu setór seguros (ka 'asuransi'), ne'ebé esensial ba dezentvolvimentu husi investimentu setór privadu nian;
- Estabelese rejime ida atu introdús padraun kontabilidade ho objetivu atu fasilita asesu ba kréditu no insentiva melloria husi ekonomia formál;
- Promove kriaun husi título tezouru (*T-Bonds, T-Bills, T-Notes*), atu diversifika fontes finansiamentu despeza pública nian no maksimiza kapitál (likidés) hodi promove dezentvolvimentu nasional.

### 5.2.1. Banku de Dezentvolvimentu de Timor-Leste (BDTL)

Dezentvolvimentu do setór privado iha Timor-Leste la-la'og ba oin, liuliu tanba bazeia de'it ba projetu sira Estadu nian no laiha asesu ba kréditu no ba finansiamentu ho durasun tempu naruk ho juros ne'ebé assessíveis. Empresas presiza kréditu hodi investe. Presiza aumenta asesu ba kréditu iha Timor-Leste hodi hadi'a ka halo hotéis, atu fasilita retallistas bele sosa sasán oin-oin no barak liután, fasilita empresas konstrusaun sivil bele sosa ekipamentus atu harii uma no eskritóriu sira. Maski bankus komersiais hahú iha aumentu likidez nian iha merkadu, maibé kréditu ba setór





privado nafatin menus husi 15%, husi total ativos (*ratio* depóztitu/empréstimu). Bankus, ne'ebé funsiona iha Timor-Leste, fó de'it kréditu ba organizasaun internasionál sira no ba empresas husi sira-nia rain no ba de'it setores ne'ebé depende maka'as ba kontratu ho Governu no ba investimentu públiku.

Governu sei estabesele Banco de Desenvolvimento de Timor-Leste (BDTL), hodi bele fó asesu ba finansiametu ho longo-prazu (ka tempo-naruk) ho taxa de juros ne'ebé asesível. Banku ida ne'e sei fó oportunidade ba empresas timor hodi hamriik, emprega ema barak, harii infraestruturas no, nune'e, kontribui ba diversifikasaun ekonómika. Banku ida ne'e sei foka liu ba hatán demandas ba kréditu iha áreas estratéjikas Nasaun-nian, ne'ebé iha relasaun ho kreximentu setór privadu nian no ba dezenvolvimentu merkadu finanseiru. Estadu maka sei sai na'in ba Banku ida ne'e, ho kontribuisaun kapitál timor-nian. Banku ida ne'e sei iha diretivas ba investimento klaras no rigorozas, ho operasoens administrativas no komersiál ne'ebé independentes ho padraun ba boa-governasaun ne'ebé aas.

### 5.2.2. Banco Nacional de Comércio de Timor-Leste (BNCTL)

Asesu ba kréditu kontinua kria problemas ba empresas ki'ik no ba Timoroan sira, inclui sira ne'ebé hela iha áreas rurais. Falta de kréditu mak impede empresas ki'ik atu bele aumenta sira-nia kbiit, limita Timoroan sira-nia kapasidade atu kria empresas no, tamba ne'e, impede kreximentu ekonomia. BNCTL tenke haluan ninia servisu, iha munisípiu sira no mós iha postos administrativus, liuhusi servisu banku móvel. Governu sei kontinua fó apoio ba BNCTL no ba ninia alargamento atu servi ita-nia populasaun tomak, liuhusi prestasaun de servisu sira bankáriu no kréditus, hodi fó asesu ba servisu sira finanseirus ba Timoroan sira no ba empresas mikro, ki'ik no médias, tanto iha áreas urbanas no mós iha áreas rurais. Governu sei kontinua fó apoio ba servisu Banco Centrál, Banku Komersiál no Banku Dezenvolvimentu nian, hodi fasilita sistema bankáriu ida abranjente no asesível ba ema hotu, inklui iha projetu hanesan *mobile phone banking*, inkluzo finanseira, *internet banking* no pagamentu eletróniku sira.

### 5.2.3. Mikro no Uniaun de Kréditu

Esforços atu haburas ekonomia Nasionál ne'ebé sustentável, sei halo liuhusi fó insentivus atu kria mikro-empresas no, di'ak liu, empresas familiares.

Iha tiha ona instituisoens mikro no uniaun de kréditu lubuk ida, ne'ebé fó ona servisu de kréditu ba populasaun barak. Governu sei kontinua tulun instituisoens hirak ne'e, hodi habelar liután sira-





nia servisu no fasilita populasaun hodi hetan kréditu, liuliu ba emprezas micro no ki'ik, iha áreas rurais.

### **5.3. Finansas Públikas**

Finansas Públikas maka fator importante ida ba prosesu dezvoltimento iha Timor-Leste. Nune'e, Governu sei kontinua hadi'a no hametin política fiskál no jestaun finansas públicas ne'ebé iha transparénsia, responsabilidade, efisiénsia, efikásia no sustentabilidade nu'udar prioridade prinsipál ida, ne'ebé Governu sei implementa durante ninia mandato.

Melloria husi política fiskál no jestaun finansas públicas sei halo liuhusi “Reforma ba Gestão de Finanças Públicas”, hodi hametin jestaun no promosaun ba implementasaun kona-ba melloria ba rekolla impostu no taxa sira, iha mobilizasaun no jestaun dívida pública nian no rekursu esternu sira nian, iha jestaun Fundu Petrolíferu, iha melloria ba planeamentu orsamentál, ezekusaun orsamentál, descentralizasaun finanseira, jestaun Fundu Públiku sira nian (inklui Fundu Reserva Seguransa Sosial), no iha jestaun patrimóniu Estadu nian, inklui partisipasaun sosial Estadu nian iha empreza sira.

#### **5.3.1. Reforma de Jestaun de Finansas Públikas**

Reforma Fiskál, ne'ebé implementa iha mandato VI Governu, sei troka ho “Reforma Jestaun das Finanças Públicas” ne'ebé Governu IX nian sei implementa. Iha área ne'e, Governu iha kompromisu atu halo reforma ida ne'ebé kompreensiva iha área finansas públicas, hodi aumenta reseitas ba Estadu, hodi hametin no promove transparénsia no responsabilidade iha política fiskál no jestaun finanseira. Reforma Jestaun das Finanças Públicas sei hametin estratégia fiskál, fortalese mobilizasaun rekursu sira, promove implementasaun husi Orsamentasaun bazeia ba Programa sira, racionaliza despeza pública no aumenta responsabilidade no transparénsia, no promove mos descentralizasaun finanseira.

Reforma iha jestaun de finansas públicas sei hala'o liuhusi definisaun ba estratégia fiskál, diversifikasaun rekursus esternus nian, melloria implementasaun Orsamentu bazeia ba Programa sira, racionalizasaun despeza pública sira, aumentu responsabilizasaun no transparénsia, hodi hametin descentralizasaun finanseira.





### **5.3.2. Reforma kona-ba Impostu no Taxa sira**

Iha área tributária, Reforma Jestaun das Finanças Públicas buka atu halo diversifikasaun reseitas nian, hodi permite ba Governu hetan to'o 15% iha reseitas doméstikas, husi total ida Produto Interno Bruto (PIB), iha 2028. Ida ne'e e importante tebes, hodi permite ita hakore-an husi dependência ba reseitas husi Fundo Mina-rai. Atu atinje objetivo ida ne'e, Governu sei kontinua hadi'a administrasaun, rekursus umanos, sistema no infraestruturas husi Autoridade Tributária no Autoridade Aduaneira, halo revizaun ba Lei Tributária no atu introduz lei kona-ba "Imposto de Valor Acrescentado (IVA).

Iha parte seluk, Governu hakarak aumenta mak reseitas, liuhusi efisiénsia no efikásia boot liu iha kobrancia fiskál, maibé mantein karga fiskál ida neutra no kompetitiva iha rejiaun, liuhosi identifika no regula reseita potencial sira ne'ebé iha no hadi'a kapasidade instituisoens públicas nian, ne'ebé ninia obkjetivu mak atu halo rekolla reseita fiskál no la fiskál, husi nível Nasionál to'o munisípiu sira.

Objetivu prinsipál ida mak aumentu no diversifikasaun reseitas, tanba ne'e Governu sei asegura instalasaun plena husi órgaun, servisu no pessoál sira Autoridade Tributária, Autoridade Aduaneira no entidade pública sira seluk nian ne'ebé responsável ba rekolla reseita fiskál no la fiskál.

### **5.3.3. Efisiénsia no Efikásia iha Despeza Pública**

Iha tinan 5 ikus ne'e, la iha rigór total iha transparénsia no efisiénsia kona-ba ezekusaun reforma jestaun iha finanças públicas nian.

Nune'e, IX Governu sei halo mudansas ne'ebé nesesárias no krusiais tebes. atu bele assgura katak despesas públicas bele hala'o ho forma ne'ebé efetiva, efikás, transparente, no katak sé maka halo despeza sira ne'e responsabiliza duni ba sira. Ba ne'e, Governu sei kontinua hametin descentalizaun finanseira ba instituisoens públicas no ba Autoridades rejionais no munisipais, hodi reforsa kapasidade iha instituisoens públicas, hanesan: Ajénsia de Dezenvolvimentu Nasionál (ADN), Sekretariadu dos Grandes Projetos no Komisaun Nasionál de Aprovizionamento (CNA), hodi prepara, prosesa no halo supervizaun ho rigor ba projetos, atu atualiza no aplika sistema informátiko-finanseiru no transparénsia ba entidades públicas hotuhotu, inklui RAEOA no ZEESM, hodi halo interligasaun ba sistema informátiku, ne'ebé instituisoens relevantes, iha setór públiku, utiliza daudaun, ho Sistema informátiku finanseiru, nune'e mós atu reeve no hadi'a Lei do Orçamento no Gestão Financeira no Rejime Aprovizionamentu no Kontratu Públiku sira nian,







hodi gradualmente transforma sistema kontabilidade Estadu nian, husi “*cash basis system*” ba “*accruál basis system*” no kontinua implementa no hadi’a política “orsamentasaun bazeia ba programa”.

Sei implementa mós rejime karreira nian ne’ebé bazeia ba avaliasaun dezempeñu husi profissionais iha jestaun finansas públikas, hodi hametin rekursos umanos iha área das finansas, hodi assegura katak rekursus financeirus públikus hetan jestaun ne’ebé rigoroza duni, hodi bele finansia prosesu konstrusaun Estadu no Nasaun. Esforsu ida ne’e iha mós objetivu atu hala’o preparasaun téknika no profissionál ba Rekursus Umanus, ne’ebé sei prezisa ba Desentralizasaun Administrativa.

#### 5.3.4. Orsamentu Bazeia ba Programa

Verifika mós, iha tinan 5 ikus ne’e, katak VIII Governu la consegue hatudu iha duni programa atu desenvolve País, hodi hamosu ‘pakotes’ oioin ba despezas ne’ebé irrelevantes tebes, ne’ebé lori itania Estadu tam aba despezas supérfluas ho inúteis (katak, la vale buat ida), ne’ebé sai nu’udar indísiu ba korrupsaun.

Rekursu públiku sira limitadu, tanba ne’e, despezas públikas tenke fó impacto boot, hodi garante efisiénsia no efikásia husi gastu públiku, no kontribui ba bein komún. Nune’e, Governu ida ne’e kompromete-an atu kaer fila fali política kona-ba “orsamento bazeia ba programa”, política ida ne’ebé instituisoens públikas hotu-hotu, husi Nasionál to’o munisípiu sira, sei hatuir.

Nune’e, Governu sei implementa kompromisu ida ne’e, nu’udar componente ida husi Reforma da Jestão de Finanças Públicas, liuhusi kria sistema interligasaun entre orsamento no planeamentu, ne’ebé sei define objetivos, alvos no impactos husi servisu públiku ba populausaun, iha tempo badak, médio no naruk, no mós halo monitorizasaun no avaliasaun ba interligasaun ida ne’e.

#### 5.3.5. Aprovizionamento no Transparénsia iha Finansas Públicas

Componente importante ida husi Reforma ba Jestão das Finanças Públicas maka prosesu de aprovizionamento públiku. Atu hadi’a prátika balun ne’ebé halo iha tinan lima ikus ne’e, Governu sei implementa, iha mandatu ida ne’e, revizaunida ba Rejime Aprovizionamento no Kontratu Públiku sira, no sei hadi’a kapasidade husi instituisaun pública sira hodi halo aprovizionamentu.

Sei Revee no atualiza Lei no regras aprovizionamento nian, hodi assegura katak prosesu de aprovizionamentu públiku. iha nível Nasionál, rejionál no munisipál, sei hala’o ho efikásia no transparénsia no laiha diskriminasaun, atu fasilita desenvolvimentu setór privadu nian, liuliu setór





privado lokál. Presiza duni halo revizoens hirak ne'e, atu bele halo ajustamentu fazeadu ba leis no regras de aprovizionamento ho prosesu ne'ebé envolvente.

Governu mós iha compromisso boot atu kontinua promove transparénsia no responsabilizasaun iha finansas públikas, liuhusi asoens tuir mai:

- Kontinua dezenvolve Jestão de Finanças Publicas electrónica no promove transparénsia liuhusi Portál de Transparénsia Orsamentu nian, Portál Aprovisionamento Eletróniku, Portál de Transparénsia ba Ajuda externa no Portál ba Resultados husi Governu;
- Halo koordenação ho entidades relevantes atu bele hala'o auditoria regulár ba despesas públikas;
- Kontinua hametin kooperação ho Cámara de Contas, hodi promove transparénsia no responsabilizasaun kona-ba despesas públikas;
- Hakbiit órgaos inspesaun nian, liuliu Inspesaun Jerál do Estado, atu bele aumenta no hadi'a inspesoens no auditorias ba entidades públikas, ho forma responsável no independente.

### **5.3.6. Dívida Pública**

Governu sei kontinua halo jestaun di'ak ba osan ne'ebé simu ona nu'udar empréstimu no ba osan e ne'ebé sei tama, liuhusi empréstimu, iha futuro oin mai. Osan ne'ebé atu empresta husi instituisoens financeiras ka husi merkadu financeiru, sei utiliza de'it atu finansia investmentus iha setores dezenvolvimentu produtivos, no sei la boot liu kapasidade Governu-nian atu selu iha futuro. Nune'e, Governu sei kontinua ho política empréstimu hodi hetan osan barato (funan empréstimu nian tenke menus husi 3%) atu finansia projetos infraestruturas, ne'ebé sei fó returnus ekonómiku, mas financeiru no sosiál ne'ebé boot, hodi estimula dezenvolvimento no facilita prosesu diversifikasaun de ekonomia.

Nune'e, presiza fó atensaun boot ba fatór hodi hadi'a kapasidade iha instituisoens públicas relevantes, hodi superviziona no assegura qualidade ba investimento.

Atu diversifika fontes finansiamentu Orsamentu Jerál Estado nian, Governu sei aprova Rejime Títulu Tezouru (*T-Bonds*, *T-Bills*, *T-Notes*). Hodi konkretiza ida-ne'e, presiza halo alterasaun ida ba Lei Dívida Pública nian, hodi permite finansiamentu ba despeza Orsamentu Jerál Estado nian liuhusi títulu tezouru sira ne'e.





### 5.3.7. Parcerias Públiku-Privadas (PPP)

Modalidade PPP sei kontinua hala'ó, iha prosesu diversifikasaun despezas atu finansia investmentus importantes. Governu sei identifika projetos husi setores ne'ebé iha poténsia boot atu hamosu efeitos multiplikadores oioin. Iha kontestu ida ne'e, Governu presiza atu kontinua hadi'a liután leis no regras, no mós kapasidades husi Unidade PPP Ministériu Finanzas nian, hodi halo nafatin akompañamentu no jestaun ne'ebé di'ak ba investimento porto Tibar, maske konstrusaun remata ona. Nune'e mós, tenke aumenta kbiit Unidade PPP nian, atu identifika projetos estratéjkus, liuhusi negosiasaun ho setór privadu, no halo jestaun portfólio PPP nian ho rigór.

### 5.3.8. Participasaun Setór Públiku iha Investimento Privado (Partisipasaun ekuitativa - *Equity Participation*)

Timor-Leste konsidera hanesan Nasaun ida ho risku boot ba investimento privado. Atu hetan diversifikasaun finanseira (husi reseitas no despezas), no atu promove investimento no kria emprego, Governu sei promove programas partisipasaun ekuitativa “*equity participation*” ka partisipasaun iha “ações” ba iha investmentus husi setór privado.

Oras ne'e daudaun Timor-Leste iha Fundo Mina-rai ne'ebé investe daudauk iha merkadu internasionál, ho retorno médio anuál 4%. Nune'e, Governu hakarak katak iha ninia política investmentu, Fundo Mina-rai bele konsidera investmentu ne'ebé realiza husi empreza sira iha asoens ne'ebé sira iha. Ho nune'e, kompra asoens setór privadu nian sei determina husi investmentu sira ne'ebé sei halo iha Timor-Leste, no bainhira investmentu iha retornu finanseiru no ekonómiku ne'ebé aas.

Atu viabiliza compromisso ida ne'e, Governu sei hametin kapasidade emprezas estatais ne'ebé iha, hodi orienta sira nia atividade atu promove investmentu iha Timor-Leste no avalia efeito finanseiru no ekonómiku sira ba Estadu, liuhusi promosaun estabelesimento no atividades emprezas estatais ba setores produtivos, no estabelese “Timor-Leste Investment Corporation (TLIC)” no kapitaliza kompañias estatais hanesan Timor GAP, bazeia ba sira-nia plano negósus. Nune'e, Governu sei aprova Rejime ba Setór Emprezariál Estadu nian, hodi hadi'a akompañamentu ba empreza estatál nian sira, no atu promove partisipasaun Estadu nian iha investmentu privadu no atu kontribui ba retornu finanseiru no ekonómiku.

Mekanizmu ba diversifikasaun finanseira, liuhusi “Equity Participation”, sei implementa husi Governu, tamba sei estimula investimento husi setór privado, promove dezvoltimentu de





infraestruturas, no sei kontribui ba diversifikasaun ekonomia, ba kriasaun emprego, hodi hatama reseitas ba Estadu.

### **5.3.9. Investimentu sira Timor-Leste nian (Timor-Leste Investment Corporation (TLIC))**

Governu sei estabese TLIC, hodi hala'o knaar nu'udar kompañia estatál ba investimento. TLIC sei hetan kapitalizasaun husi Governu, atu halo investimento komersiál independente sira, ne'ebé sei hamosu retornu finanseiro boot, ka sei permite efeitos multiplikativos barak ba desenvolvimento socioekonómiku, liuliu representa mais-valia ida ein termus ekonómikus, profesionais no sosiais ba populasaun Timor-Leste nian. Sei fó prioridade, uluk liu, ba investimento iha rai-laran no/ka iha nasoens seluk iha ne'ebé hela comunidade timoroan boot. Nu'udar kompañia estatál ba investimento, TLIC mos bele halo kapitalizasaun ba kompañias estatais seluk, nu'udar parte ida husi ninia atividades komersiais. Em princípio, desizaun ba investimento ne'ebé TLIC halo, tenke bazeia ba prinsípius no objetivus komersiais no/ka ekonómikus no sosiais.

### **5.3.10. Jestaun ba Fundo Mina-rai**

Governu sei kontinua servisu hamutuk ho Parlamento Nacional no Banco Central de Timor-Leste (BCTL), hodi mantein jestaun di'ak ba Fundo Mina-rai, ne'ebé sai nu'udar úniku rekursu finanseiru ba Timor-Leste. Kompromisu ida ne'e sei reflète husi polítika Governu nian atu mantein governasaun ne'ebé di'ak ho transparénsia, sustentabilidade no investimento prudente ba Fundo Mina-rai.

Sei hametin sistema “*checks and balances*”, atu assegura katak utilizaun husi Fundo Mina-rai, ba nesidades Estadu-nian, iha nafatin autorizasaun husi Parlamento Nacional. Iha parte seluk, Fundo Mina-rai sei kontinua investe ho rigor no prudensia, iha merkado finanseiro (títulos, ações) no iha operasaun pretrolífera sira, hodi fó retorno ne'ebé boot, tuir lei haruka. Aleinde ne'e, sei hametin sustentabilidade ba Fundo, liuhusi orsamentasaun no despezas públikas ne'ebé rasonais, efikazes no eficientes, atu halo jestaun di'ak ba “cash flow” Tezouru nian.

### **5.3.11. Jestaun Fundo Seguransa Sosiál**

Governu hakarak kria bazes ne'ebé di'ak ba protesasaun sosiál ba sidadauns tomak. Nune'e, sei hametin programa assisténsia sosiál, liuhusi halo ajustamento ba nível assisténsia finanseira tuir





nesesidade, ne'ebé iha hela, no halo jestaun di'ak ba Fundo de Seguransa Sosiál hodi assegura nia sustentabilidade.

Seguransa Sosiál, sai nu'udar kompromisu Governu-nian atu hametin dezvoltimentu inkluzivu. Nune'e, Governu sei servisu hamutuk ho Institutu Seguransa Sosiál (INSS) no Fundo Reserva Seguransa Sosiál, no sei estabelese Komité Investimentu ba Fundo Reserva Seguransa Sosiál, no Fiskál Úniku, ho objetivu atu garante sustentabilidade no transparénsia ba Fundo ne'e, no assegura direito ne'ebé benefisiárius iha, ba tempo naruk.

### **5.3.12. Jestaun ba Património do Estado**

Processo konstrusaun do Estado, ne'ebé parado tiha iha tinan 5 ikus ne'e, hamosu nu'udar rezultadu ne'ebé bele haree ba aumento iha património Estado nian, iha bens móveis no imóveis iha nível Nasionál, rejionál no iha munisípius. Nune'e, Governu ida ne'e hakarak halo jestaun di'ak liután ba património Estado nian hirak ne'e. Atu halo jestaun ida di'ak ba património do Estado, política Governu nian maka atu harii instituisaun ida dedikada de'it ba koordenasaun ho instituisoens públikas relevantes, hodi halo inventariaisaun no jestaun ba patrimóniu hotu-hotu, móveis no imóveis. Jestaun ba património do Estado inklui estabelese Sentrá Baze de dados kona-ba património do Estado tomak, ne'ebé sei define, regularmente, valores no depresiasaun ba património ne'e, no halo jestaun di'ak ba utilizasaun ka ba aluga património sira ne'e.





## **6. BOA GOVERNASAUN NO KOMBATE HASORU KORRUPSAUN**

Boa governasaun ho setór públiku profisionál, competente no efisiente, maka sai nu'udar kondisoens ne'ebé bázikas ba prestasaun de servisu sira públikus no ba implementasaun polítikas no asoens ne'ebé hakerek ona iha Planu Estratéjiku Dezenvolvimentu no iha Programa do Governu. Atu aumenta konfiansa ba governasaun, tenke nesariamente hasa'e dezempeñu iha setór públiku, liuliu tamba setór públiku maka sai prinsipál motor ba kreximentu ekonómiku Nasionál, no husi ninia inísiu kedas.

Hala'o auditorias no harii mekanizmus ne'ebé efikazes atu garante transparénsia iha instituisoens públikas públikas no ba responsabilizasaun ne'ebé la ka'et ho nia asoens, mak sai hanesan garantia boot ida ba boa governasaun. Boa governasaun mós, iha nia papel rasik, sei kontribui hodi prevene korrupsaun iha níveis hotu-hotu iha sociedade laran.

Governu sei promove, hanesan temi ona, prinsípius transparénsia nian, responsabilizasaun, integridade no lideransa, liuhusi mekanizmus ba jestaun de riskus, responsabilidade ne'ebé bazeia ba resultados, no mós ba sistemas reklamasaun nian no, liuliu, ba uzu ne'ebé adekuaudu (ka lós) ba fundus públikus.

Governu, atu promove boa governasaun no combate korrupsaun, sei dezenvolve asaun hirak tuirmai ne'e:

- Halo avaliasaun dezempeñu hodi hadi'a atuaun husi órgauns inspesaun nian, liuliu Inspesaun-Jerál do Estado, hodi realiza auditorias ba entidades públikas, ho forma responsável no independente;
- Halo avaliasaun dezempeñu hodi hadi'a atuaun husi Komisaun Anti-Korrupsaun, no promove inisiativas kona-ba prevensaun ba korrupsaun, inklui kampañas de edukasaun sívika;
- Halo avaliasaun dezempeñu hodi hadi'a atuaun husi Komisaun da Funsau Públika ho objetivu atu kontinua promove kultura ba jestaun kona-ba dezempeñu no ba rekrutamentu no mós ba progresaun karreira, ho baze iha méritu;
- Halo avaliasaun dezempeñu hodi hadi'a atuaun husi Cámara de Kontas;
- Revee diploma oioin no aprova Kódigu de Konduta ba Membrus Governu (PED);





- Uza teknolojia informasaun moderna nian, iha funsaun públika, hodi apoia koezaun iha Governu no iniciativas iha Governu Eletróniku (PED 2020);
- Haree fali Lei ne'ebé eziste ona no aumenta medida sira preventiva no kombate ba korrupsaun;
- Estabelese planus espesífikus de asaun, hodi kombate korrupsaun, tuir setores no instituisoens de ne'ebé define;
- Hala'o kampañas antikorrupsaun, tantu iha nível Administrasaun Públika, no mós iha eskolas no ba públiku em jerál, hanesan forma preventiva no edukasionál ba jerasoens futuras;
- Promove sistemas ba reklamasaun no ba rona populasaun, hodi promove formuláriu de reklamasaun no implementasaun ba kestionáriu (ka, perguntas) ba públiku;
- Dezenvolve baze de dadus kona-ba instituisoens públikas no privadas, ne'ebé envolve ona iha korrupsaun, hodi halo monitorizasaun ne'ebé efetiva;
- Kontinua implementa polítika lejislativa ida, hodi haree ba kualidade lejislasaun nian, ninia simplisidade no ninia sistematizasaun no mós kona-ba asesu ba lejislasoens ne'e;
- Hadi'a asesu no koñesimentu kona-ba lejislasaun Nasionál, liuhusi hadi'a publikasaun no liuhusi husi distribuisaun, ne'ebé tenke beibeik, ba koletáneas (ka kompilasaun) ne'ebé organizada tuir setores, hanesan mós ninia disponibilizasaun bilinge (iha lian rua) no ninia divulgasaun 'online';
- Reforsa instituisoens ne'ebé responsáveis ba produsaun estatísticas nasionais, hodi bele informa di'ak liután kona-ba tomadas de desizaun, atu desizoens ne'e hasai ka halo ho baze ba informasoens ne'ebé rigorozas, hodi permite monitoriza no avalia dezempeñu ne'ebé réal, husi setór de públiku iha prestasaun servisu públikus no mós bele hetan retratu réal Nasaun-nian;
- Hadi'a komunikasaun interna iha Governu, tantu entre organizmus governmentais hanesan mós iha ida-idak nian, hodi hamenus informalidade ba prosesus ne'ebé afeta ba transferénsia de koñesimentus no prestasaun de kontas. Reforsa iha komunikasaun sei kontribui mós hodi hamenus duplikasaun ba atividades, funsoens no responsabilidades ba programa ida de'it, hodi eventualmente halakon responsabilizasaun;





- Implementa inisiativas ne'ebé kontribui ba kultura de dezempeñu no responsabilizasaun, tuir estrutura hierárkika no atribuisaun kona-ba responsabilidades, ne'ebé institucionálizada ona;
- Haree fali Lei Pensaun Vitalísia, atu nune'e rejime ida ne'e sei integra iha Rejime de Seguransa Sosiál Kontributivu, kona-ba pensoens ba membrus foun iha Órgauns de Soberania.

### **6.1. Administrasaun Públika**

Hadi'a efikásia, efisiénsia no profisionalizmu Administrasaun Públika nian, iha prestasaun de servisu sira públikus ne'ebé di'ak liu, ne'e fator ida krusiál ba iha implementasaun polítika no programa de desenvolvimentu ne'ebé lori ba redusaun kiak no, nu'udar resultado, ba progresu no moris di'ak populasaun nian.

Ho razaun ida ne'e, reforma ba administrasaun públika, hodi tama ba modernizasaun no ba iha seguransa implementasaun medidas ba boa governasaun, kontinua sai prinsipál objetivu Governu nian. Ho ida ne'e, hadi'a lideransa, jestaun no kapasidade dezempeñu, transparénsia no responsabilizasaun, sei kontribui ba prestasaun servisu sira públikus ne'ebé di'ak, ho rezultadu ba iha moris di'ak no progresu populasoens-nian, no iha aumentu de konfiansa iha instituisoens Estadu.

Governu sei kontinua dezenvolve esforsus hodi garante kontinuidade ba reformas no programas ne'ebé la'o daudaun, hodi asegura nafatin promosaun iha efisiénsia, efikásia, transparénsia, produtividade no igualdade de jéneru, iha setór públiku.

Iha ámbitu ida ne'e, IX Governu sei:

- Estabelese Ajénsia Nasionál ba Reforma no Modernização iha Administrasaun Públika, ne'ebé sei sai Responsável ba revizaun no koordenaun interministeriál ba implementasaun ba Guia de Reforma no Modernisaun iha Administrasaun Públika;
- Kria mekanismus de koordenaun no kooperasaun entre Ajénsia Nasionál ba Reforma no Modernizasaun Administrasaun Públika, Komisaun Funsau Públika, Institutu Nasionál de Administrasaun Públika no departamentos governamentais seluk, atu identifika metas ne'ebé prioritárias, lejizlasaun ne'ebé nesesária no asoens ne'ebé atu ezejuta ba melloria progressiva iha organizasaun no funsionamentu da Administrasaun Públika, para hasa'e







qualifikasoens recursos umanos iha Administrações Públicas no ba melloria iha qualidade kona-ba prestasaun de bens e servisu sira públikus ba sidadauns;

- Halo revizaun no implementa Política de Fortalesimentu Institusionál, inklui revizaun ba matriz organizasionál instituisoens nian;
- Aprova no implementa kuadru jurídku ba Organizasaun da Administrasaun Públika, tuir Política de Fortalesimentu Institusionál no Guia de Reforma no Modernizasaun da Administrasaun Públika;
- Halo uniformizasaun ba sistemas, prosesus no prosedimentus kona-ba funsionamentu Administrasaun Públika nian, liuliu kona-ba desempeñu iha servisu sira bai-bain, husi departamentus governamentais;
- Kontinua hala'o diagnóstikus kona-ba forsa de traballu iha instuisoens públikas, hodi ajusta no hadi'a kuadru pesoál iha organizasaun ida-idak, no hodi implementa mós é regras no prosedimentu ne'ebé padronizadus, inklui mós kontratus de traballu;
- Reforsa mekanismus ne'ebé permite rekrutamentu ho baze iha méritu, progressaun iha karreira, liuhosi rezultadus kona-ba dezempeñu no méritu, insentivus ba produtividade no ba oportunidades iha formasaun no dezvoltamentu institusionál ba rekursus umanus hotu-hotu iha setór públiku;
- Aprova programa Nasionál ida ba formasaun rekursus umanus iha Administrasaun Lokál do Estadu, hodi hadi'a prestasaun de bens e servisu sira públikus iha lokal;
- Reeve, aprova no implementa Planu Estratéjiku husi Komisaun da Funsau Públika, hodi garante armonizasaun husi Planu ne'e ho Guia de Reforma no Modernizasaun iha Administrasaun Públika ho Política Nasionál de Fortalesimento Institusionál;
- Tau iha Institutu Nasionál de Administrasaun Públika kondisoens ne'ebé nesesárias ba dezempeñu iha sira-nia funsau, liuliu iha ambiente organizasionál, lojística no finanseiru, inklui mós nia informatizasaun, hodi asegura nia afirmasaun nu'udar Centru de Formasaun Profisionál de Administrasaun Públika;
- Reforsa kontrolu no jestaun administrativa, finanseira no patrimoniál Estadu nian, liuhosi Inspesau Jerál do Estadu, ho revizaun ba estatutu juridiku IJE nian no aprovasaun ho implementasaun lei de sistema ba kontrolu internu iha Administrasaun Públika.





## 6.2. Desentralizasaun

Modernizasaun Administrasaun Públika no hasae ninia efikásia no efisiénsia tenke inklui ninia desentralizasaun no deskonsentrasaun. Transferénsia atribuisaun, kompeténsia no responsabilidade ba órgaun lokál no munisipál sira, hodi kapasita sira no kria kondisoens atu sira bele fó servisu ne'ebé ho kualidade, nu'udar aspetu fundamentál ida hosi prosesu dexentralizasaun.

Ida-ne'e, aleinde hasa'e partisipasaun demokrasia, sei kontribui mós ba dezenvolvimentu setór privadu iha nivel nasionál no rurál, atu ita hotu kontribui ba ninia dezenvolvimentu rasik no, iha ikus liu, ba dezenvolvimentu integradu no sustentavel Nasaun ne'e nian.

Sei nafatin diskute Ordenamentu Territóriu no Kuadru Nasionál Planeamentu nian iha perspetiva komplementár no integrada nian ida, konsidera mós Polítika Desentralizasaun Administrativa no Autonomia Lokál, atu nune'e, bele garante dezenvolvimentu sustentavel, ekilíbradu no ekuitativu Nasaun ne'e nian.

Iha ámbitu ida-ne'e, Governu sei:

- Promove aprovasaun husi Parlamentu Nasionál ba alterasaun ida ba Lei Divizaun Administrativa Territóriu nian, hodi halakon munisípiu Ataúru;
- Promove aprovasaun husi Parlamentu Nasionál kona-ba Lei ne'ebé regula estatutu, vínkulu, karreira no remunerasaun ba traballadór sira iha Munisípiu, lei reguladora ba patrimóniu Munisípiu sira nian, no Lei sira ba instituisaun, iha konkretu, munisípiu sira;
- Aprova regulamentasaun Lei n. 23/ 2021, loron 10 fulan-novembru, Lei Podér Lokál no Desentralizasaun Administrativa, husi Lei n. 22/ 2021, loron 4 fulan-novembru, Lei Eleitoral Munisipál, no Lei n.16/ 2023, loron 31 fulan-maiu, Lei Finansas Munisipál sira;
- Halo alterasaun lejizlativa sira ba kuadru jurídiku organizasaun no funksionamentu Autoridade Munisipál no Administrasaun Munisipál sira nian, atu kontinua estratéjia desentralizasaun administrativa ne'ebé sai hanesan baze ba aprovasaun Dekretu-Lei n. 3/2016, loron 16 fulan-marsu, ho konsiderasaun ba kuadru normativu reguladór Podér Lokál nian, liuliu atu kria kuadru jurídiku ida ne'ebé favoravel atu identifika rekursu umanu sira husi administrasaun sentrál ne'ebé tenke transfere ba servisu sira administrasaun lokál nian;
- Revee no aprova Planu sira b ba Dezenvolvimentu Munisipál husi munisípiu sira, tuir Planu Estratéjiku Dezenvolvimentu no Programa Governu nian, ne'ebé sai nu'udar





referénsia atu elabora Planu Asaun Anuál, Planu Investimentu Munisipál no Orsamentu Munisipál sira;

- Aprova no implementa diploma ministeriál nian sira hamutuk ba ezekusaun lokál husi programa governamentál nian sira ne'ebé delega ona iha órgaun Administrativa Lokál nian;
- Aprova no implementa Despaxu ministeriál konjuntu sira ne'ebé aprova programa sira formasaun ba funsionáriu Administrasaun Lokál nian ba implementasaun programa governamentál sira ne'ebé ninia ezekusaun fó kompeténsia ba Autoridade no Administrasaun Munisipál sira;
- Reforsa alokasaun fundu iha orsamentu munisipál sira, ho objetivu atu iha meiu finanseiru ne'ebé presiza ba aumentu kuantidade no kualidade beins no servisu públiku sira, ne'ebé presta ona liuhusi servisu Administrasaun Lokál nian;
- Halo levantamentu ba nesesidade Administrasaun Lokál nian kona-ba rekursus umanus;
- Dezenvolve no implementa programa sira ba formasaun profisionál, kapasitasaun no rekualifikasaun profisionál rekursus umanus Administrasaun Lokál nian;
- Aprova no implementa programa ida ba rekrutamentu no reafetasaun ba rekursus umanus husi AdministrasoensPúblikas, hodi asegura distribuisaun ida ne'ebé ekuitativa, ho funsaun tuir nesesidade iha kada servisu, husi administrasaun no autoridade munisipál;
- Aprova no implementa programa ida hodi avalia kondisoens ne'ebé eziste iha kada munisípiu hodi harii órgaun reprezentativu Podér Lokál nian;
- Organiza tuir faze eleisaun ba órgaun reprezentativu Podér Lokál nian durante mandatu, hodi haree ba kondisaun ne'ebé loloos iha kada munisípiu;
- Aprova no implementa Política Nasionál ba Dezenvolvimentu Lokál, tuir ho Planu Estratéjiku Dezenvolvimentu;
- Revee enkuadramentu jurídiku ba Planeamentu Dezenvolvimentu Integradu Munisipál, hodi simplifika prosedimentu ba programasaun no ezekusaun investimentu públiku nian, ne'ebé finansia liuhusi programa ida-ne'e, no hodi reforsa kompeténsia sira órgaun Administrasaun Lokál nian iha implementasaun ne'e rasik;
- Revee enkuadramentu jurídiku ba Programa Nasionál Dezenvolvimentu Suku, ho sentidu atu hametin partisipasaun órgaun Suku iha prosedimentu programasaun, ezekusaun,





supervizaun no avaliasaun ba qualidade projetu sira ne'ebé finansia liuhusi programa ida-ne'e, nune'e mós ba finansiamentu asaun kapasitasaun no formasaun ba lider komunitáriu sira;

- Aprova no implementa kadru jurídku Planeamentu Dezenvolvimentu Komunitáriu nian, hodi asegura finansiamentu ezekusaun Planu sira Dezenvolvimentu Komunitáriu nian liuhusi Programa Nasionál Dezenvolvimentu Sukus;
- Regulamenta aplikasaun ba Lei Suku, hodi operacionaliza ezersísiu kompeténsia ne'ebé, iha lei ida-ne'e, harii ba organizasaun komunitária no hodi fasilita koordenasaun entre Suku sira, Administrasaun Estadu no autarkia munisipál sira;
- Regulamenta selebrasaun ba kontratu interadministrativu entre Administrasaun Estadu, autarkia munisipál no Suku sira, ho nune'e atu viabiliza possibilidade hodi aumenta prestasaun beins no servisu liuhusi Suku, tuir kapasidade loloos organizasaun komunitária ida-idak nian;
- Revee no ezekuta Programa Nasionál ida ba Kapasitasaun Lideransa Komunitária sira;
- Define no ezekuta estratéjia nasional ida ba kapasitasaun servisu Autoridade no Administrasaun Munisipál nian sira ho objetivu atu hadi'a prestasaun ba beins no servisu públiku sira, iha área toponímia no organizasaun urbana, iha nivel lokál.

### **6.3. Administrasaun Eleitorál**

Prosesu rekonsiliaun nasional no konstrusaun ba ita-nia Estadu Direitu Demokrátiku hetan benefísiu, iha medida ne'ebé boot, husi kapasidade ita-nia nasaun nian atu organiza no lori efeitu ba realizasaun eleisaun ne'ebé livre no demokrátika.

Nune'e mós iha nivel nasional, iha konfiansa ba ita-nia sistema eleitorál, no ita-nia Estadu rekoñese ona husi Komunitade Internasionál hanesan demokrasia ida ne'ebé loloos. Faktu ida-ne'e hatudu husi solisitasaun ne'ebé halo ona durante tinan hirak ikus ne'e, ne'ebé diriye ba ita-nia Estadu atu fó apoiu tékniku ba organizasaun no hala'o eleisaun iha Estadu sira-seluk, liuliu iha Repúblika Giné-Bissau, iha Repúblika Demokrátika S. Tome e Príncipe no iha Repúblika Sentru-Afrikana.

Maibé, tenke asegura no reforsa nafatin, qualidade no kapasidade husi ita-nia Administrasaun Eleitorál la'ós de'it liuhusi apoia atu realiza atividade sira formasaun no kualifikasaun ba ita-nia





téknika eleitorál sira, maibé mós liuhusi revizaun no atualizasaun ba ita-nia lejjzlasaun eleitorál, atu nune'e bele klarifika aspetu sira ne'ebé bele sai kontroversu liu ka difisil atu aplika, nune'e mós liuhusi ninia atualizasaun, atu nune'e bele mantein ninia kapasidade hodi hatán ba dezafiu kontemporánea sira ne'ebé koloka ba ita-nia sistema eleitorál.

Iha âmbito ida-ne'e, Governu sei:

- Promove organizaun no hala'o Kursu ida ba Jestaun no Administrasaun Eleitorál, ho objetivu atu reforsa kapasidade téknika ba profisionál sira husi órgaun Administrasaun Eleitorál;
- Prosede atualizasaun jerál ida ba Baze Dadus Resenseamentu Eleitorál nian, hodi halakon situasoens ne'ebé ho múltipla inskrisaun ba eleitór sira no inskrisaun ba eleitór sira ne'ebé mate ona;
- Reforsa transparénsia administrasaun eleitorál nian iha âmbito prosesu no aktu eleitorál sira;
- Promove aprovasaun husi Parlamentu Nasionál, Kódigu Eleitorál ida ne'ebé kondensa, iha diploma legál ida de'it, norma jurídika hotu-hotu ne'ebé ajusta iha organizaun no realizasaun eleisaun ba Prezidente Repúblika no deputadu sira ba Parlamentu Nasionál.

#### **6.4. Ordenamentu Territóriu nian**

Parte hosi estratéjia de desenvolvimentu, iha kapitál sosiál, sei relaciona ho kapasidade Governu atu defini prosesu organizaun ba espasu ne'ebé populasaun hela ba, hodi bele okupa, bele utiliza no transforma ba ambiente di'ak ida, tuir sira-nia potencialidade.

Tanba ne'e, prioridade Governu ida ne'e nian mak atu implementa Lei de Bazes de Ordenamentu do Território. Atu halo ida-ne'e, Governu sei reeve, karik presiza, lejjzlasaun ne'ebé regulamenta Lei de Bases no Planu Nasionál de Ordenamentu Territóriu nian, ne'ebé foin aprova, hodi articula dokumentu sira ne'e ho vizaun estratéjika ne'ebé define iha dokumentu ne'e, hodi prevee jestaun territóriu ho forma ida ne'ebé ekilibrada no estratéjika, utilizasaun ba espasu iha desenvolvimentu atividades umanas (ka emar-nian), ho forma sustentável, hodi konsidera aspetus ekonómikus, sosiais, kulturais, polítikus no ambientais.

Lei de Bases prevé ezisténsia tipu rua kona-ba instrumentus ba planeamentu territorial: husi âmbito Nasionál no âmbito munispál. Ninia aprovasaun permite define, lolós, prinsípius orientadores no obejtivos hosi Administrasaun, identifika interesek públikus oioin ho dimensaun





territoriál, utiliza instrumentus kona-ba planeamentu territoriál, nu'udar meu ba Administrasaun Públika, nune'e mós defini tipulojia no objetivus ne'ebé tenke la'o tuir, iha tempu médiu no naruk.

Iha ámbitu setór ekonómiku, no ba nia susesu no kreximentu sustentável, Governu sei desenvolve planu setoriál sira, atu implementa Pólus de Desenvolvimentu no Zonas Espeziais de Ekonomia Sosiál de Merkadu, iha rejiaun oioin nasaun nian, bazeia ba karakterístika rejiaun ida-idak, no tuir rekursus lokais ne'ebé karik iha, hodi implementa asoens no estratéjias ba kreximentu sustentável.

Governu sei propoin:

- Analiza no reeve, karik presiza, lejlzasaun no planu sira ne'ebé aprova ona kona-ba ordenamentu territóriu nian;
- Elabora kuadru institusionál no legál ne'ebé presiza atu implementa hotu Lei de Bases Ordenamentu do Territóriu Nasionál, no planu Nasionál de ordenamentu do territóriu, planu setoriál ba Ordenamentu do territóriu, planu diretor ba sidades boot sira, planu diretor ba munisípiu sira no planu urbanístiku ho nia divizaun (loteamentu);
- Elabora planu de urbanizasaun rural, hodi fó ba populasaun asesu rodoviário, Bee no Saneamentu, Eskolas, Klínikas de saúde nian, asesu ba merkadu no eletrisidade (PED 2022);
- Promove elaborasaun no implementasaun ba planus de ezelesaun urbanístika, ho objetivu atu revitaliza sistemátika iha sidades urbanas, tuir fazes no integradu, ho koordenasaun entre setores ne'ebé iha impaktu ba utilizasaun rai;
- Implementa Política Nasionál ba Mobilidade Urbana, hodi desenvolve transportes terrestres no hodi garante desenvolvimentu ne'ebé sustentável no iha protesun ne'ebé adekuada ba meu-ambiente. Política ida ne'e iha objetivu atu munisípiu sira elabora no apresenta ida-idak nia planu mobilidade urbana rasik, ba planeamentu no kreximentu sidade ho forma ordenada, hodi fó prioridade ba meius transporte la motorizadus no ba servisu sira transporte públiku koletivu;
- Reeve Planu de Ordenamentu do Territóriu iha Illa Ataúro, hodi enkuadra iha lejlzasaun ne'ebé aprova ona, ho objetivu atu lori desenvolvimentu ekonómiku no sosiál ba illa ne'ebá;
- Kontinua implementa diplomas kona-ba toponímia ba sidade Dili, rejime jurídiku ba toponímia no halo numerasaun polísia nian, iha nível munisipál.





## 6.5. Dezenvolvimentu Rural

Transformasaun sosiál no ekonómika iha zonas rurais, hodi promove kualidade moris ba timoroan hotu, to'o sira ne'ebé hela iha área remota sira no asesu difísil, no ba sira ne'ebé presiza tebes, sai nu'udar prinsipál objetivu Governu ida ne'e nian.

Atu kumpre objetivus hirak ne'e, Governu sei halo ho forma ne'ebé koordinada no iha nível intersetoriál, ne'ebé implika katak polítikas hotu no investmentus setoriais sei haree ba dezenvolvimentu rurál ho forma transversál. Iha Nasaun ki'ik hanesan Timor-Leste, ezisténsia hosi asimetria rejionál no dezigualdade sosiál no ekonómika ne'e inkoerénsia ida ne'ebé representa lakon bot iha oportunidades.

Kriasaun empregus lokais mak sai forma di'ak liu atu hasa'e nivel moris no bein-estar populasaun rurál nian. Nune'e, fundamentál duni atu investe iha kreximentu setór provadu iha áreas rurais, inklui ho apoio ba empresas ki'ik no médis no ba kooperativas, hodi haburas sira-nia partisipasaun iha kreximentu ekonómiku rurál.

Governu sei continua dezenvolve kuadru Nasionál de planeamentu, ne'ebé tau em konsiderasaun espesifisidades lokais (ka, fatin ida-idak nian) no setores de dezenvolvimentu ne'ebé potenciais, hodi hare ba karaterístikas lokais no práttikas tradisionias, no mós asesu ne'ebé iha ba infraestruturas bázikas, ekonómikas no sosiais no asesu ba merkadu.

Iha ámbitu ida ne'e, maka sai nu'udar asaun prinsipál sira ba dezenvolvimentu rurál, hanesan tuir mai:

- Implementa Kuadru Nasionál de Planeamentu, hodi enfrenta dezafius iha kada rejiaun no permite kreximentu sustentável no dezenvolvimento ekonómiku ekuitativu iha País tomak;
- Harii, reabilita no dezenvolve infraestruturas bázikas, ekonómikas no sosiais, liuhusi konsulta ho planeamentu no envolvimentu diretu komunidades nian;
- Hadi'a kuadru legál no regulador ne'ebé permite dezenvolvimentu ba inisiativas no projetus, to'o nível komunidades rurais;
- Dezenvolve estudus kona-ba kriasaun ambiente ida apropriadu ba investmentu iha áreas rurais, liuliu implementasaun ba sistemas mirkokréditu no formas empréstimu sira seluk, promosaun kooperativas ka negósiu familiar, ho prioridade ba produsaun agríkola no ba kriasaun de merkadu, no mós ba produtus ne'ebé prosesa;





- Promove kapasitasaun institusionál no formasaun profisionál ba negósiu familiar, kooperativas no emprezas ki'ik no média iha zonas rurais;
- Hadi'a planeamentu ba atividade agríkola no ba jestaun Rai no ba rekursus naturais, inklui hala'o estudus kona-ba vantajen komparativa iha kada rejiaun no asesu ba infraestruturas no ba merkadus;
- Kontinua promove dezvoltimentu setór privadu nian, iha áreas rurais, inklui liuhosi eskema insentivus no benefísius fiskais ba dezvoltimentu setór primáriu, ba projetus transformasaun produsus setór privadu nian ba bens komersiais, dezvoltimentu teknolojias tradisionais hodi hare ba turizmu no ba merkadus;
- Kontinua promove prosesu desentralizasaun no governu lokál ba iha emansipasaun polítika, sosiál no ekonómika iha localidades rurais;
- Desenvolve parseries de kooperasaun internasionál entre emprezas agríkolos, hodi hadi'a áreas hirak tur mai ne'e: estudus kona-ba merkadu, estratéjias ba komersializasaun, avaliasaun no planeamentu ba emprezas, formasaun no assisténsia téknika, teknolojia no dezvoltimentu produsus no mekanizmus de finansiamentu;
- Kontinua apoiu ba emprezas rurais ho matérias-primas no ekipamentus, hodi haburas sira-nia mikro-negósius.

## **6.6. Rejiaun Administrativa Espesial Oekusi Ambeno no Zona Espesial ba Ekonomia Sosiál Merkadu**

Rejiaun Administrativa Espesial de Oekusi-Ambeno (RAEOA), estabelese duni atu fasilita sinerjia ne'ebé di'ak-liu entre instituisoens Estadu nian iha Rejian ida ne'eba, ho hanoin katak sei permite governasaun ida efikas liu, ajuda hamenus ki'ak no dudu bem-estár ekonómiku ba populasaun tomak. To'o iha tempo ne'ebé lós, iha futuru, konseitu "RAEOA" sei inklui Ataúro, to'o kondisoens infraestruturais no téknikas desenvolve tiha ona, hodi nune'e illa de Ataúro bele separa-an autonomamente husi RAEOA.

Infelizmente, tinan 10 liu tiha, hare de'it maka konstrusaun Estrada iha Pante Makassar no, pior liu tan, tentativa atu partidariza Rejiaun ida ne'eba, hodi desvia tiha atensaun populasaun-nian ba sentidu lolós kona-ba ZEESM, enkuantu estradas iha Oekusi-Ambeno tomak laran aat liu tanba beibeik ho kondisoens asesu ne'ebé difíseis.







Zonas Espesiais ba Ekonomia Sosiál de Merkadu Timor-Leste (ZEESM TL) sai nu'udar programa ida ba dezenvolvimentu Nasionál, ho objetivu atu estabelese zonas espesiais ba komérsiu ho ninia karáter sosiál, ne'ebé sei permite kreximentu ekonomia sosiál ba merkadu, katak ema ho populasaun husi rejiaun ne'e maka sei simu benefísius, diretus no indiretus, boot no barak liu.

Haree ba polítika tós, ne'ebé hala'o iha Oekusi-Ambeno, no ba tempu naruk demais ona iha ne'ebé la kumpre tuir prosedimentus ne'ebé orienta Estadu tomak, iha kontektu Administrasaun Públika no boa governasaun, prosedimentus ne'ebé instituisoens governamentais hotu-hotu halo tuir no kumpre, maka Governu ida ne'e haree katak iha urjénsia atu altera quadru jurídiku atuál ne'ebé prevalese iha Rejiaun ida ne'eba.

Saida mak hamosu desepsaun boot, maka, liu tiha ona tinan lubuk ida kedas, seidauk mosu planeamentu ida ne'ebé define no assegura espíritu no objetivu boot, bainhira kria Zonas Espesiais de Ekonomia Sosiál de Merkadu.

Importante tebes iha separasaun poderes entre RAEOA no ZEESM, hodi kapasita sociedade no populasaun lokál sira atu intervein, espresa sira-nia hakarak no sira-nia espetativa, hodi asegura espíritu no objetivu ikus ba kriasaun Zonas Espesiais ba Ekonomia Sosiál de Merkadu.

Partisipasaun efetiva husi sociedade no husi comunidades iha prosesu dezenvolvimentu, ne'ebé hala'o iha ninia rejiaun laran, mak sai nu'udar fator determinante hodi haree, sukat no tetu kona-ba benefísius ne'ebé sei mosu ba sira-nia vida, ba kreximentu sosio-ekonómiku no kulturál, responsável, transparente no sustentável.

Nune'e, Governu sei kontinua investe iha estrutura rejionál governasaun ne'e, liuhusi polítikas inovadoras no aposta ba paradigma foun ida ne'e, ba dezenvolvimentu ne'ebé nia baze iha ekonomia sosiál de merkadu, maibé sei hala'o medidas tuir mai ne'e:

- Rever Lei nu. 3/2014, lora 18 fulan-juño ne'ebé kria RAEOA no ZEESM;
- Separa servisu sira ne'ebé pertense ba ZEESM husi funsoens Autoridade Administrativa Rejionál nian;
- Estabelese Autoridade foun iha Rejiaun Oé-Cusse Ambeno, liuhusi reestruturasaun totál ba pesoál administrativu no tékniku, hodi jere mós atividade sira dezenvolvimentu fíziku no tékniku illa Ataúru nian;
- Integra servisu sira de finansas iha Rejiaun ne'e ba Sistema Nasionál "FreeBalance";
- Hadi'a sistemas de kontrolu no fiskalizaun, liuliu kona-ba grandes projetus, ne'ebé tenke sujeitos ba fiskalizaun husi Kámara Kontas;





- Hadi'a sistemas aprovizionamentu, hodi garante kumprimentu ba rejime sentrál aprovizionamentu nian;
- Halo kedas auditoria ba RAEOA no ZEESM.

### 6.7. Governu Eletróniku

Governu Eletróniku ka Administrasaun Públika Eletrónika, permite informa no divulga servisu sira, ne'ebé presta tiha ona, no haklekan, ba populasau em jerál, informasoens ne'ebé Governu hasai, hodi uza teknolojia Informasaun no Komunikasaun, hodi asegura boa governasaun, transparénsia ne'ebé bot liu iha prosesus no polítikas públikas, no, au mesmu tempu, bele hakbesik ema ba órgauns governamentais, nune'e, bele iha sira-nia partisipasaun bot-liu iha desizoens ne'ebé governantes foti ka hasai.

Governu sei aposta iha desenvolvimentu iha Teknolojia de Informasaun no Komunikasaun, hodi implementa Política Nasionál kona-ba Teknolojia de Informasaun no Komunikasaun, nune'e bele kria daudaun kondisoens ne'ebé prezisa atu Ajénsia Teknolojias Informasaun no Komunikasaun, bele konkretiza nia misaun atu jere rede informátika Governu-nian no mós entidades públikas seluk nian, hodi hala'o modernizasaun ba Estadu no hadi'a fursionamentu no prestasaun servisu sira iha instituisoens públikas.

Parte fundamentál hosi estratéjia ne'e, maka modernizasaun administrativa, hodi desenvolve mais-valia husi Governu Eletróniku, inklui estabelesimentu plataforma ba konektividade no asesu ba internet, iha instuisoens Estadu no Governu.

Nune'e, Governu sei nafatin desenvolve esforsus atu aprosima sidadauns ba iha administrasaun públika, liuhusi desenvolve setór informátiku no teknolójiku ne'ebé permite, iha futuro, sistema moderno no efikás iha governasaun eletrónika.

Ba ida ne'e, Governu sei:

- Hala'o estudus atu estabelese jestaun rede informátika governu nian no entidades públikas seluk;
- Implementa Política Nasionál ba Teknolojias de Informasaun no Komunikasaun;
- Adota teknolojia de informasaun ne'ebé moderna, iha funsaun públika, atu apoia koezaun iha Governu no apoia inisiativas ba Governu Eletróniku (PED 2020);





- Hadi'a no atualiza, ho forma kontinuada, Portál Eletróniku Governu nian, liuliu informasaun kona-ba Rai laran no atividades governu nian, inklui ligasaun ho entidades governamentais no públikas hotu;
- Fomenta ezisténsia portais eletrónikus, ho qualidade, ba entidades governamentais hotu;
- Promove plataforma interativa ida ho entidades governamentais, ne'ebé hetan sentralizasaun uluk iha Portál do Governu, husi ne'ebé Governu loke espasu ida atu rona, halo debate no organiza informasoens ne'ebé relevantes ba opiniaun públika;
- Hahú konversasoens ho órgauns de soberania sira seluk, atu kria espasu ida ba diálogu entre órgauns ne'e, liuhusi plataforma tenolójika nian;
- Halo levantamentu no promove koordenasau interministeriál kona-ba componente Governu eletróniku ho servisu sira no formuláriu, ne'ebé tenke disponíveis 'online' iha futuru;
- Kontinua dezenvolve Jestaun de Finansas Públikas eletrónika no Modelo Transparénsia iha Timor-Leste, liuhusi portais eletrónikus, ne'ebé permite iha konsulta kona-ba operasoens Estadu-nian, inklui mós Portál de Transparénsia kona-ba Orsamentu, Portál de Aprovizionamentu Eletróniku, Portál de Transparénsia de Ajudas no Portál kona-ba Rezultadus Governu-nian;
- Implementa gradualmente servisu sira de pagamentu 'online' ba Estadu;
- Kontinua investe iha kriaun de baze-de-dadus eletrónikus (para além de baze de dadus Funsau Públika nian).

## 6.8. Justisa

Promove Estadu de Direitu no garante igualdade iha asesu justisa ba ema hotu, sai nafatin dezafiu boot ba Timor-Leste, ne'ebé lori aspetus kompleksus tebes. Tan ne'e, konsolidasaun iha setór justisa sai hanesan baze importante no fundamentál ba konstrusaun pás no konstrusaun do Estadu. Nomós, fator krusiál ida atu transmiti konfiansa no atrai investimentu, ba dezenvolvimentu ekonomia nian. Ita enfrenta dezafius barak ne'ebé, atu koalio badak de'it, mosu husi kuadrus legais ne'ebé defisientes (ka, frakus) no la adekuadas ba ita nia realidade, kona-ba infraestruturas ne'ebé la suficiente no kona-ba difikuldade iha kapasitasaun no kualifikasaun ita-nia rekursus umanus, ne'e hotu hanesan kondisoens fundamentais atu permite ema hotu hetan asesu ba justisa.





Ita iha kontestu istóriku ida, ne'ebé esplika didi'ak dezafius balun iha setór ida ne'e, hodi destaka katak parte balun hosi profesionais iha setór justisa la iha domíniu iha sistema legál, sistema ne'ebé inspiradu husi modelu portugés, nune'e mós, la iha domíniu plenu (ka di'ak) iha língua portugueza, nu'udar kondisaun esensial tebes atu interpreta no aplika leis. Situaun ida ne'e kria dependénsia total no absurda ba dokumentu jurídiku sira, ne'ebé jurista husi rai-li'ur maka hakerek, ne'ebé, dala barak, la interpreta realidade, hodi halo de'it rekursu ba linguajen jurídika, h lian portugés, ne'ebé atór justisa timoroan sira la hatene, ho lori sira, dala barak, atu hola desizaun ne'ebé laloos.

Frajilidade iha sistema justisa bele kria problemas boot ba prosesu 'konstrusaun do Estadu' ne'e rasik no mós ba desenvolvimentu ekonómiku no sosial Nasaun nian. Sei laiha konfiansa ba investimentu ekonómiku, bainhira laiha sistema judisial ne'ebé asegura kumprimentu ba Lei. No bainhira laiha investimentu, sei laiha servisu no, se laiha servisu, sei laiha pás. Nune'e, maka tema ida ne'e tenke aborda, tuir duni respeito ne'ebé nesesáriu ba instituisoens no tuir respeito ba separasaun poderes, maibé mós ho urjénsia no seriedade.

Ho nune'e, Governu ida ne'e iha objetivu atu hahú reforma ne'ebé klean, iha instituisaun ida ne'e, hodi hatene katak reforma ne'e sei lori tempu, tamba ninia kompleksidade. Ami fiar katak kooperasaun institusionál, iha prosesu ida ne'ebé inkluzivu, no iha apropriasaun hosi sira ne'ebé iha knaar atu foti desizoens nasionais, sei bele kontribui ba solusaun ba dezafiu ida ne'e, ka, ba iha konsolidasaun sistema de Justisa ida efikás, iha ne'ebé prosesus, iha ne'ebé justisa sei aplika, sai prosesus ne'ebé lalais, ekilibradus, bele fó konfiansa, independentes no justus duni.

Hanesan parte ida mós husi nia objetivus prinsipais, maka Governu sei:

- Konsolida pás no demokrasia, hodi garante direitus, deveres, liberdades no garantias fundamentais ba sidadauns tomak;
- Introduz reforma ida ne'ebé kle'an, iha setór justisa;
- Hadi'a efisiénsia, efikásia, servisu lalais no dijitalizasaun, iha ezersísio no iha administrasaun justisa nian;
- Promove setór judisiáriu ida ne'ebé profisionál, competente, independente no transparente;
- Harii kuadru ida ba rekursus umanus, iha setór justisa, ne'ebé competente, independente, profisionál no esperiente;
- Garante independénsia husi tribunais iha ninia relasaun ho órgauns soberania sira seluk;





- Promove no respeita direitus ba sidadauns hotu-hotu, liuliu sidadauns ne'ebé iha nesiedade espesial sira, inklui haluan assistensia juridika ba sidadauns ne'ebé vulneraveis no desprotejidus no sira ne'ebé iha nesiedade espesial sira, liuliu kona-ba asesu no kompriensaun sistema justisa nian rasik;
- Promove konfiansa ba Sistema justisa, tantu husi povu tomak no mós husi sidadauns estranjeirus, ne'ebé inklui investidores.

Atu realiza objetivus ne'ebé temi iha leten, Governu sei implementa, tuir tematikas setór nian ne'ebé oioin:

**a. Iha planu dezvoltimento institusional, sei konsolida administrasaun justisa, liuhusi melloria iha kapasidade institusional no koordensaun. Ba ida ne'e, sei:**

- Revee no atualiza Planu Estratéjiku do Setór de Justisa nian (2011-2030), hodi hala'o reforma ida ke lalais iha setór justisa;
- Sei haree fila fali (ka Revee) liñas koordensaun no planeamentu integradu, no estabese Komisaun Técnica atu halo revizaun ba PESJ no insentiva diálogo ho stakeholders Setór Justisa nian, kona-ba políticas no resultados husi implementasaun;
- Hala'o reforma ba Centro de Formação Jurídica no Judisiária - CFJJ, nu'udar Sentru de excelensia ida ba atores judisiários no armoniza baze legal kona-ba recrutamentu majistradus no defensores públikus nian;
- Hadi'a koordensaun iha setór ida ne'e, hodi asegura katak ninia instituisoens hetan perspetiva ne'ebé klara atu oinsá sira interaje no komplementa malu;
- Deskonsentra servisu sira justisa no kria mekanizmus efetivus ne'ebé bele facilita asesu ba justisa husi populasaun tomak.

**b. Reforma ba kadru legal, sei hala'o husi konsolidasaun no armonizasaun ba kadrus legais tomak iha Sistema Justisa no área Direitu. Nune'e, sei:**

- Revee konjuntu de leis no kódigos estruturantes, ne'ebé aprova no implementa ona iha setór de justisa, hodi haree ba saida maka sei falta no hadi'a tiha regulamentasoens, bainhira presiza;
- Kompleta kadru legal iha Sistema judisial no hala'o revizaun ba leis ne'ebé iha hela;





- Revee rekomendasoens husi Proposta kona-ba Polítika Públika no Estratéjia ba Reforma Lejislativa no ba Setór de Justisa, ne'ebé prepara tiha ona husi Komisaun ba Reforma Lejislativa no ba Setór de Justisa, atu define planu de implementasaun ida ba reforma estruturál iha Administrasaun da Justisa;
  - Revee Lei Organizaun Judisiária;
  - Revee Lei Kámara Kontas;
  - Revee, karik presiza, Estatutu Majistradus Judisiais, Estatutu Ministériu Públiku no Estatutu Defensoria Públika ne'ebé foin aprova;
  - Implementa Lei de Terras e Propriedades no finaliza levantamentu kadastrál no rejistu ba bens imóveis;
  - Kompleta tiha pakote Lei de Terras no revee Rejistu Predial;
  - Propoin aprovasaun lejislasaun nian ne'ebé ajuda hadi'a rejime de jestaun de bens imóveis Estadu nian no arendamentu bens imóveis do Estadu ba partikulares;
  - Propoin no aprova Rejime Jurídiku Dadus Pesoais;
  - Reforsa Polítika kona-ba Lian iha Setór Justisa, liuhusi implementasaun no reforsu husi Rejime de Utilizaun kona-ba Línguas Ofisiais iha setór justisa, hodi adopta modelu bilingue (ka lian rua) iha elaborasaun atus normativus, iha prosesus judisiais no iha prosedimentus administrativus ba servisu sira justisa-nian;
  - Introduz regulamentasaun ne'ebé presiza ba aplikasaun obrigatória ba lian rua (portugés no tetun) iha setór justisa;
  - Propoin kriaun Orden Advogadus.
- c. **Dezenvolvimentu Rekursus umanus nian iha área Justisa, krusiál tebes ba Setór ida ne'e, ho nia knaar ne'ebé fundamentál tebes iha prosesu harii Estadu. Nune'e, sei presiza:**
- Define polítika no planu estratéjiku ida ba formasaun iha kuadru rekursus umanus ba setór justisa nian, tanba ne'e krusiál ba melloria no konsolidasaun setór, ho medidas ba kurtu, médiu no longu prazu, hodi konsidera didi'ak aspetus fundamentais ne'ebé, to'o agora, difikulta hela área justisa;





- Asegura revizaun ba prosesus rekrutamentu, formasaun no hatama rekursus umanus iha setór justisa;
- Kontinua dezenvolve planus no hala'ó formasaun rekursus umanus, hodi haree ba iha futuru, ho médiu no longu prazu, bele estabelese instituisoens hotu-hotu ne'ebé previstas ona iha Konstituisaun no Lei;
- Insentiva formasaun kontínua ba auditores iha Kámara de Kontas no ba juízes iha Tribunál Superiór Administrativu, Fiskál no Kontas;
- Asegura formasaun ne'ebé kontínua no formasaun komplementár ba Defensores Públikus no mós estabelese Ordem dos Advogados, ne'ebé la haree ba organizasoens oin-oin advogados nian;
- Garante formasaun ba funcionáriu públikus, ofisiais de justisa, téknikus de apoiu administrativu iha setór justisa;
- Implementa formasaun ba Notáriu, Konservadores do Rejistu no Notariadu;
- Apoia formasaun ba téknikus kadastrais no reforsa funcionamentu Komisaun de Terras;
- Investe iha Centro de Formasaun Jurídika no Judisiária no hadi'a kapasidades iha Sentru ne'e, atu bele kontinua fó kapasitasaun no formasaun ba profesionais iha setór justisa;
- Prepara kurrikulu atu hanorin no haree mós atu reforma kuadrus ba formadores ka dosentes iha CFJJ;
- Kontinua formasaun ba majistradus, defensores públikus no advogadus privadus iha CFJJ;
- Reforsa kapasidade Defensores Públikus nian no kria kondisoens ba advogadus privadus, profesionais no kompetentes, hodi hadi'a assisténsia jurídika, ne'ebé tenke efetiva no ho qualidade;
- Promove kapasitasaun Atores Judisiais timoroan sira;
- Promove no kapasita funsaun Inspetor Judisiál nian;
- Reforsa kuadru de juízes ho número sufisiente, atu preenxe órgauns judisiáriu ne'ebé iha no hirak ne'ebé sei estabelese, no rekruta no forma pessoál atu kaer funsoens administrasaun nian, hodi liberta juízes husi servisu sira sira ne'e;
- Forma Ofisiais de Justisa atu bele kaer ka hala'ó didi'ak sira-nia servisu;





- Formasaun akadémika kona-ba reintegrasaun sosiál, ho matéria legál no treinamentu ba guardas prisionais, no mós formasaun especializada ba guardas prisionais iha Sentru Reabilitasaun juvenil;
- Revee tiha kritérius kona-ba rekrutamentu ba juízes internasionais, hodi iha melloria iha sira-nia funsaun assessoríal nian, no formasaun no mentoria, atu nune'e bele iha transferénsia de koñesimentu lolós no mós atu juízes nasionais bele kompriende di'ak liu kona-ba servisu asesoria nian;

**d. Nesesidade atu fó infraestruturas ne'ebé adequadas ba Setór ida ne'e, boot tebetebes. Nune'e, sei:**

- Investe iha kapasidade instituisoens setór de justisa nian, atu bele kumpre didi'ak sira-nia mandatu, inklui infraestruturas de apoiu, ekipamentus no informatizasaun;
- Harii edifisiu ba Supremu Tribunál Justisa nian.
- Finaliza konstrusaun edifisiu ba delegasaun Defensoria Públika nian, iha munisípiu sira;
- Harii residénsia ba guardas prisionais;
- Reabilita edifisius Defensoria Públika nian, edifisius Rejistu Sivíl no Konservatórias no edifisius Terras e Propriedades, iha munisípiu sira;
- Harii Centro Reabilitasaun Juvenil;
- Moderniza setór justisa, inklui infraestruturas, ekipamentus no ferramentas, no mós prosesuais;
- Aprova no instala Sistema IT, ne'ebé sei permite dijitalizasaun husi prosesu sira ho rede ne'ebé bele kobre munisípiu hotu-hotu, atu aumenta rapidés no simplifikasaun prosesuál.

**e. Relasiona ho asesu ba justisa, sei fomenta aprosimasaun husi justisa ba sidadauns no, atu ida ne'e akontese, sei:**

- Asegura kapasidade servisu sira prisionais nian, hodi garante seguransa no melloria iha instalasoens prisionais, kumprimentu ba normas internasionais no ba reintegrasaun prizioneirus nian iha comunidades, liuhuso estabelesimentu ba Sentrus Reintegrasaun;







- Hadi'a kapasidade servisu sira de rejistu no notariadu, hodi garante seguransa ba komérsiu jurídiku no asegu katak atus ezekuta duni ho lalais no bele iha asesu ba sidadauns;
- Hadi'a efikásia iha jestaun ba kadastru de Terras no património imobiliáriu Estadu nian;
- Kontinua implementa prosesu atu haluan emisaun billetes de identidade ba munisípiu sira hotu, no kontinua investe iha emisaun Pasaporte Eletróniku Timor-Leste nian;
- Kria no desenvolve sistema emisaun Kartaun Identifikasaun Úniku ba sidadaun hotu-hotu ne'ebé atinje ona maioridade;
- Expande programa Klínika de Asesu ba Justisa, liuhusi koordenasaun ho programa Janela Únika husi setór ekonomia nian, hodi abranje munisípiu sira hotu;
- Revee mapa setór justisa nian no implementa medidas atu bele garante, iha futuru, presença judisiál, ho qualidade no profesionálismu, iha munisípiu sira hotu;
- Hala'o kampañas boot atu divulga Sistema de justisa, leis no direitos fundamentais sidadauns nian, hodi kria konfiansa ba Sistema de justisa no asegu kompreensaun ne'ebé di'ak kona-ba 'justisa ba ema hotu';
- Kontinua disemina (ka halo sosialisasaun) ba leis, dekretus-leis no diplomas legais atu aumenta koñesimentu husi sidadauns.

**f. Ikus liu, matéria ida ne'ebé transversál ba instituisoens tomak iha Setór de Justisa, maka boa governasaun, tamba só ho ida ne'e, maka bele mosu dezempeñu di'ak iha justisa, ne'ebé sei benefisia ema hotu. Ba ida ne'e, sei presiza:**

- Mellora (ka hadi'a) kapasidade Órgaus de supervizaun, kontrolu no dixiplina iha Sistema justisa, hodi asegu independénsia boot liu no mós ninia efikásia no efisiénsia (Konsellu Superiores no Kámara Kontas);
- Reforsa Konsellu de Koordenasaun Setór de Justisa nian, hodi fortifika funsionamentu Konsellu Superiór de Majistradus Judisiais, Ministériu Públiku, Defensoria Públika no estabese Konsellu Superiór Kámara Kontas nian;
- Garante aperfeisoamentu ba sistemas de jestaun no prosedimentus nian, iha planeamentu, orsamentasaun, jestaun finanseira, aprovizionamentu, lojística no rekursus umanus, inklui estabese sistemas koordenadus ba jestaun kazus prosesuais nian;





- Hadi'a koordenasaun iha setór justisa rasik no entre setór ne'e ho órgauns seluk, liuliu órgauns ne'ebé relevantes ba hadi'a setór de justisa;
- Reforsa servisu sira iha Konsellu de Koordenasaun Setór Justisa, hodi armoniza tiha baze legál ida no fó oportunidades ba 'stakeholders' sira atu partisipa iha reunioens Konsellu de Koordenasaun nian;
- Kontinua reforsa implementasaun ba sistemas de jestaun, dijitalizasaun prosesuál no prosedimentus, inklui Sistema ba jestaun kazus prosesuais;
- Aperfeisoa (ka hadi'a di'ak liután) mekanizmus kona-ba kooperasaun internasionál, ne'ebé tenke aliña prioridades iha sira-nia programas ho estratéjias no prioridades País nian;
- Kontinua promove kooperasaun ho paízes CPLP no ASEAN nian no ho organizaun internasionál sira seluk-tan, iha área de justisa, nu'udar parseirus importantes ba desenvolvimentu ba setór de justisa.

#### **6.8.1. Reforma ba Polísia Sientífika Investigasaun Kriminál**

- Reforma no kapasita Polísia Sientífika Investigasaun Kriminál, ne'ebé ba oin sei tutela husi Komandu PNTL, ho objetivu atu hametin nina kapasidade ba asoens kona-ba prevensaun, detesaun no investigasaun;
- Investe iha laboratóriu no ekipamentus sientífikus no kriminais;
- Reforsa formasaun iha área investigasaun kriminál, liuhosi kooperasaun bilaterál ho Eskola Polísia Judisiária husi Portugal;
- Reforma, moderniza no aperfeisoa kapasidade husi Polísia Sientífika ida ne'e.

#### **6.9. Defeza no Seguransa**

Dezenvolvimento iha Instituisoens de Defeza no Seguransa, ne'ebé transparentes, eficientes, kompetentes no profisionais, sai fundamentál ba manutensaun da demokrasia no ba konsolidasaun da estabilidade no pás, iha nível nasional no internasionál.

Nune'e, iha duni esforsu di'ak ida, depoi-de krize 2005-2007, atu assegura setór de Defeza no Seguransa ida ne'ebé forte, ho abordajen ida ne'ebé tau iha konsiderasaun sirkunstáncias Nasaun





nian, liuliu hosi nia pasadu konfliktu ne'ebé naruk no foin liu, ho Estadu ne'ebé foin harii no ninia frajilidade.

Dezafiu iha rekonstrusaun, inklui preparasaun rekursus umanus, dezvoltimentu kuadru legál ida ne'ebé sólidu no konsistente ho "idiosinkrasias" ka diferensas ka spesifisidades lokais no disponibilizasaun ekipamentus no infraestruturas, ne'ebé nesarias ba Instituisoens Seguransa nasional nian, hetan abordajen graduál hosi Governus ne'ebé kaer ukun.

Governu sei, ho ida ne'e, kontinua konsolida progresus ne'ebé alkansa ona, sei buka korrije sistemas no imperfeisoens iha setór ida ne'e, no sei dezvoltolve estratéjias foun ne'ebé permite konsolidasaun iha setór Defeza no Seguransa, ne'ebé modernu no profesionál.

Ho objetivus hirak ne'e, inklui reforsu iha koordenasaun no kooperasaun di'ak entre Forsas de Defeza (F-FDTL) no Forsas de Seguransa, hodi asegura klareza no empenhu, tuir responsabilidade ida-idak nian no misoens ida-idak nian ne'ebé distintas ka keta-ketak.

Governu mós sei kria Konsellu de Seguransa Nasionál, ne'ebé sai nu'udar Órgaun Konsultivu ba Governu, hodi bele akonsella no apoia iha tomada de desizoens superiores, no mós hodi halo elaborasaun ba polítika no lejizlasaun ne'ebé inklui matéria de Defeza no Seguransa nian.

### 6.9.1. Defeza

Forsas Armadas de Timor-Leste, FALINTIL – Forças de Defesa de Timor-Leste (F-FDTL), ne'ebé forma hosi sidadauns nasionais de'it, tuir konstituisaun, responsabiliza ba iha defeza militar. Nia misaun prinsipál ne'e fokus liu atu garante independéncia nasional, integridade territorial no liberdade no mós seguransa ba populaun konta agresaun ka ameasa esterna, tuir respeito ba orden konstitusionál.

Aleinde nia misaun prinsipál, F-FDTL bele partisipa iha misoens de apoiu seluk ba autoridades sivilis, iha kuadru sistema ne'ebé integradu iha Seguransa Nasionál, haktuir termus da Lei Seguransa Nasionál, nune'e mós iha apoiu ba polítika esterna Estadu nian, iha operasoens de apoiu ba pás no umanitárias.

Hanesan mós ho Forsas de Seguransa, Forsas de Defeza laiha no labele tama partidu no tenke obedece de'it ba Órgauns de Soberania kompetentes, no tenke hadook-an hosi intervensaun polítika saida de'it.

Iha dezvoltimentu setór de Defeza, Estadu Timor reafirma nia postura estratéjika iha defeza, ne'ebé iha respeito ba Estadu de Direitu, hodi kontinua diplomasia no disuazaun, hanesan forma





ida hodi prevene no rezolve konfliktus ruma, maibé, mantein nafatin katak bele uza forsa tuir Karta Nasoens Unidas nian bainhira nesesáriu duni atu garante independénsia nasionál.

Abordajen ida ne'e implika atu investe iha Forsas de Defeza hodi hetan kapasidade atu defende Nasaun hosi ameasas esternas, nune'e mós aptas atu kontribui ba esforsus iha kooperasaun rejionál no internasionál, inklui iha prezervasaun pás no estabilidade nasionál no internasionál.

Iha kontestu ida ne'e, dezvoltimentu ba defeza sei tau atensaun ba iha leitura kontemporánea kona-ba kontestu jeoestrátjiku internasionál sékulu XXI nian, nakonu ho riskus foun no ameasas – sei konfuzas, multidimensionais no ho karater liuliu internu, hodi halo fraku liu baliza entre defeza no seguransa. Ezije mós, nune'e, leitura di'ak ida ba ambiente de seguransa iha sékulu XXI, atu halo fali avaliasaun ba papel no funsaun ba instituisaun defeza Estadu Timor noni nia pozisaun iha relasaun esterna iha area ida ne'e, liuliu kona-ba seguransa kooperativa no ninia partisipasaun iha asaun koletiva umanitária no pás sira nian iha ámbitu Organizasaun Nasoes Unidas no foruns internasionais seluk.

Atu konsolida metin liu tan planeamentu estrátjiku ba defeza no militar, ne'ebé nia dokumentu ne'e fundamentál ba dezvoltimentu iha kapasidade esensial F-FDTL nian, hodi hala'o sira nia misaun, no hodi fó orientasaun ba siklu planeamentu forsas, defeza sei fó continuidade ba elaborasaun edifisiu estruturante ba planeamentu estrátjiku defeza no militar nian. Konseitu Estrátjiku ba Defeza no Seguransa Nasionál sei hametin edifisiu estruturante planeamentu estrátjiku nian hodi konsolida Diretiva Ministeriál ba Planeamentu no Defeza Militar, reeve no implementa Konseitu Estrátjiku Militar, Misaun F-FDTL, Sistema no Dispozitivu Forsas nian, Lei Programasaun Militar nian no dekretu-lei kona-ba aprovizionamentu militar, hodi moderniza no profesionaliza F-FDTL. Ho vizaun ida ne'e, planeamentu Forsas serve atu halo planeamentu estrátjiku ne'ebé bazeadu iha avaliasaun nesesidade ba defeza nasionál conforme risku no ameasa ne'ebé identifika ona, tuir Doutrina Defeza Militar RDTL nian.

Governu mós sei asume estrátjia ne'ebé sei efikás liu tan, kona-ba seguransa jeoestrátjika no marítima, ne'ebé konsidera eventus foin lalais ne'e iha parte barak iha mundu tomak, iha ne'ebé aktus terrorismu aumenta, no mós tráfik uumanu no krimes organizadus seluk. Iha parte seluk, konsidera katak pozisaun jeográfika Timor-Leste, ho ninia Zona Ekonómika Ezkluziva ne'ebé luan no nia rikeza iha rekursus naturais iha Tasi laran ne'ebé hale'u teritóriu tomak, inklui rekursus enerjéticos hosi Tasi Timor, sai urjente atu haree oinsá dezvoltolve kapasidade navál atu Timor-Leste iha kondisaun atu proteje no prezerva ninia rekursus no nia Povu no, **liuliu, iha kombat ba peska ilegal.**





Nune'e, Defeza sei konsolida lejzlasaun ne'ebé nesesáriu hodi hadia Sistema Autoridade Marítima Timor-Leste (SAMTL) no Autoridade Marítima Nasionál, no implementa operasionálmente nia funsionamentu hanesan entidade ne'ebé ezerse poder públiku iha espasus marítimus, iha soberania no juridisaun nasional no ho funsaun husi estrutura superiór diresaun nian, administrasaun no koordenasau hosi órgaun no servisu ne'ebé hala'o iha ámbitu SAMTL.

Governu, iha área de defeza, sei buka alkansa objetivus hirak tuir mai:

- Defende soberania nasional, konsolida pás no estabilidade no promove rekonsiliaun no unidade nasional;
- Promove servisu militar, nu'udar devér patriótiku no inkute iha profisionais setór ida ne'e atu sai modelu ezemplár ba sidadania no integridade;
- Envolve F-FDTL iha desenvolvimentu ekonómiku, sosiál no umanu País nian;
- Desenvolve asoens kooperasaun bilaterál no multilaterál, ba promosaun no prezervasaun ba pás no ba estabilidade nasional, rejional no mundiál, iha fortesimentu ba seguransa kooperativa;
- Asegura partisipasaun Forsas Armadas timor-nian iha forsas multinasionais no iha organizasaun internasionál sira, inklui operasoens ba manutensaun de pás no operasoens umanitárias husi Nasoens Unidas;
- Treina no hadia kapasidade Forsas Armadas atu fó apoiu ba populasaun sivil, liuliu iha tempu dezastres naturais no kazus de emerjénsia sira seluk, iha ámbitu sistema integradu de seguransa nasional nian;
- Hasa'e kbiit Komponente Navál ba iha defeza, vijilánsia, kontrolu no fiskalizaun ba atividades marítimas no portuária iha ámbitu Sistema de Autoridade Marítima de Timor-Leste;
- Promove Komponente de Apoiu Aéreo, hodi participa ho forma integrada iha defeza militar país, nune'e mós tau-matan ba espasu aéreo nasional no participa iha misoens umanitarias hodi apoia populasaun sivil;
- Promove edifikasaun ba kapasidade hotu-hotu iha F-FDTL ne'ebé identifika ona iha Konseitu Estratéjiku de Defeza no Seguransa Nasionál;
- Revee no implementa Konseitu Estratéjiku Militar no Lei Programasaun Militar nian;
- Konsolida bazes estruturantes Planeamentu Estratéjiku de Defeza no Militar nian;





- Promove estudu no reflesaun kona-ba obrigatoriedade ba servisu militar;
- Promove partisipasaun feto iha setór Defeza, inklui fó oportunidades iha progresaun karreiras, ne'ebé promove igualdade ba jéneru.

Atu alkansa objetivus hirak ne'e, sei implementa asaun hirak tuirmai:

- Asegura atu setór de Defeza, inklui F-FDTL liuhosi implementasaun ba kultura organizasionál ida, ne'ebé kredível, profisionál no ekipadu ho di'ak, ho kbiit boot no luan atu hala'o misoens oioin, hodi bele partisipa iha esforsu seguransa, estabilidade no dezvoltimentu nasionál (PED 2020);
- Haree fali ka Revee no atualiza “Estudu Estratéjiku Forsa-2020” no defini fali planu ba dezvoltimentu no konsolidasaun ba Forsas Armadas, iha buat ne'ebé prezisa to'o estabese dokumentus estruturante ba Planeamentu Estratéjiku de Defeza no Militar;
- Implementa Konseitu Estratéjiku kona-ba Defeza no Seguransa Nasionál, inklui revizaun no aprovasaun ba nia kuadru legal;
- Revee no implementa Diretiva Ministerial ba Planeamentu no Defeza Militar, Konseitu Estratéjiku Militar, Misoens ba F-FDTL, sistema no dispozitivu forsas nian, Lei ba Programasaun Militar no rejime jurídku aprovizionamentu militar nian hodi konsolida siklu planeamentu estratéjiku defeza nian;
- Kria no implementa lejislasaun espesífika ba infraestrutura militar sira;
- Hadi'a infraestruturas no harii instalasoens foun ba komponentes tomak, inklui bazez territoriais no navais ne'ebé prinsipais;
- Transforma Institutu Nasionál Defeza sai estabesimentu ensinu superior ba Defeza Nasionál no promove Akademia Konjunta ba Forsas Defeza no Forsas no Servisu Seguransa nian ba instituisaun relevante sira hotu;
- Harii Bairros ba família Militares ne'ebé integra ona iha Baze Militar sira, iha lokalidade ne'ebé la hanesan no bainhira de'it prezisa;
- Dezenvolve estudus no planus investimentu ba konstrusaun Hospital Militar ida, ne'ebé dedika ba prestasaun kuidadus saúde ba pesoál militar, polisiál, no veteranus;
- Fornese F-FDTL ho ekipamentu, material no armamentu modernu no ho qualidade, tuir lejislasaun nasionál no internasionál ne'ebé vigora hela;





- Implementa política integrada ba desenvolvimento ba rekursus umanus iha setór Defeza nian;
- Hadi'a prosesus de rekrutamentu militar, bazeia ba méritu;
- Hadi'a sistemas no teknolojia de informasaun no desenvolve sistema de Komandu, Kontrolu, Komunikaun, Komputadores, Siberseguransa, Informasaun no Vijilánsia (C5IRS);
- Hadi'a sistema abastesimentu lojístiku no manutensaun nian liuhosi meius no rekursus F-FDTL nian;
- Halo estudo viabilidade hodi kria unidade industriál ki'ik atu prodús *rações de combate* (hahán kombate nian), fardamentu no munisaun ho kalibre ki'ik (5.56mm no 9mm);
- Aumenta kapasidade ba Komponentes operasionais, terrestre, navál no unidade apoiu nian;
- Abastese ka fó ba componente navál meius ne'ebé adekuadus hodi hala'o ninia misaun;
- Reforsa no kapasita Autoridade Marítima Nasionál, hodi asegura soberania no juridisauun nasional no defeza rekursus marítimus nian;
- Investe iha formasaun ba rekursus umanus, sivíl no militar sira, hodi asegura funcionamentu ne'ebé di'ak ba Autoridade Marítima Nasionál;
- Reforsa desenvolvimento iha Unidades de Forsas Especiais nian;
- Reforsa Komponente Apoiu Aéreo hodi participa ho forma integrada iha defeza militar nasaun nian, nune'e mós patrulla no tau-matan ba espasu aéreu nasional no participa iha misoens umanitarias hodi apoia populusaun sivíl sira;
- Konsolida kooperasaun bilaterál no multilaterál iha área treinu no formasaun, promove parseria estratéjika ho paízes parseirus no kontribui ba desenvolvimento nasional no internasionál;
- Kria oportunidades ba treinu no apoiu lojístiku hodi aumenta partisipasaun elementus F-FDTL iha operasoens ba manutensaun da pás no operasoens umanitárias Nasoens Unidas nian;
- Reforsa kapasidade iha setór de Defeza, iha ámbito unidades de enjeñaria no saúde, hodi fó apoiu ba populasoens, kona-ba formasaun linguística;





- Implementa Sistema de Alerta Nasionál no had'ia kapasidade hodi hatán ba dezastres naturais no emerjensas;
- Promove hamutuk ho Forsa no Servisus de Seguransa, nune'e mós ba protesauñ Sivil, ezersísiu hamutuk iha ámbitu sistema integradu Seguransa Nasionál nian;
- Kontinua dezenvolve medidas no implementa asoens ne'ebé bele lori ba iha prosesu reforma ida ne'ebé justu no dignu, ba Veteranus ne'ebé sei ativu hela iha F-FDTL.

### 6.9.2. Seguransa

Seguransa, nu'udar funsaun ka devér esensial ida mós ba Estadu, sai hanesan kondisaun indispensável ba ezersísiu direitus no liberdades fundamentais sidadauns nian, no prezervasaun estabilidade iha sosiedade laran rasik no funksionamentu normál atividade ekonómika, depende tebetebes ba garantia ida ne'e.

Tuir Konstituisaun, PNTL no servisus de Seguransa iha devér atu defende legalidade demokrátika no garante seguransa interna ba sidadauns, no Polísia no Forsas de Seguransa labele tama ka defende partidu ida, hodi bele atua ho forma ezemplár ka hodi sai nu'udar ezemplu, hatudu respeitu ba ema hotu-hotu.

Nune'e, Governu assume, hanesan prioridade ba nia asaun, kaer polítikas no medidas ne'ebé konkretas hodi kontinua garante katak Timor-Leste País ida ne'ebé seguru duni, hodi reforsa autoridade Estadu-nian, no hodi dezenvolve no konsolida efikásia Forsas no Servisus de Seguransa, no rekoñese mós katak, iha área ida ne'e, investimentu saida de'it sei lori, iha kurtu, médiu no longu prazo, vantajens no benefisios ne'ebé di'ak.

Governu mós sei kontinua implementa plano estratjiku abranjente ida, ne'ebé bele fó resposta ba objetivus estratjikus, husi nia realidade rasik, no loke-an ba kestoens relevantes, hanesan prevensaun de riskus ba estabilidade sosiál, kombate ba kriminalidade, protesauñ sivil no sinistralidade ka asidentes iha estrada. Iha setór seguransa, Governu sei kontinua implementa planu ida abranjente, ba tempu naruk ka longu prazo, hodi asegura katak setór seguransa kumpre nia papel primordiál atu servi povu no garante pás, seguransa no estabilidade.

Governu hakarak alkansa objetivus hirak tuir mai:

- Haree hikas kuadru legál ba instituisoens iha setór de Seguransa Interna no Protesauñ Sivil kona-ba promosaun rekrutamentu o kualifikasaun no, tuir política ne'ebé estabelese ona iha PED 2011-2030 no Konseitu Estratjiku de Defeza no Seguransa Nasionál;







- Dezenvolve kapasidade operasionál husi Instituisoens seguransa interna no protesaun sivíl, hodi hadi'a sira iha kumprimentu misoens ne'ebé simu;
- Intensifika deskonsentrasaun servisu, hodi hakbesik tan ba sidadauns, iha territóriu nasional tomak;
- Kontinua haree atu reforsa Protesaun Sivíl, iha ninia implementasaun lolós tuir lei no iha Área operasionál husi Autoridade Nasionál de Protesaun Sivíl;
- Kontinua hadi'a Servisu de Migrasaun, hodi implementa leis no regulamentus ne'ebé vigora, liuliu Lei (foun) de Migrasaun e Asilu;
- Reforsa kapasidade Unidade Patrullamentu Fronteira, liuhosi konstrusaun ba postu vijilánsia no akizisaun ba ekipamentu sira ne'ebé prezisa;
- Reforsa kapasidade Diresaun Nasionál de Seguransa Rodoviária, atu garante katak iha servisu asesiveis ba sidadauns no atu adopta regras no prosedimentus iha jestaun no prosesu halo autus ba kazu iha Estrada;
- Aperfeioa mekanizmus internus monitorizasaun nian no iha reporte kona-ba kumprimentu ba respeito direitus umanus;
- Kontinua hadi'a Sistema de prevensaun no rezolusaun ba konfliktus komunitarius;
- Reforsa formasaun no espesializasaun iha Rekursus umanus, liu husi programas de estudu ka estájius, ba media no longa durasaun, iha instituisoens hanesan iha Estados-membros CPLP;
- Reforsa kooperasaun bilateral ho Estados-membros CPLP ho ASEAN, iha áreas importantes ba kompetensias espesializadas no iha assisténsia téknika;
- Avalia, Revee no atualiza Plano Estratéjiku de Seguransa Interna nian 2030, atu nune'e bele ajusta ho dezafius atuais ka ohin-loron nian, iha setores de seguransa interna no protesaun sivíl;
- Implementa Konseitu Estratéjiku ba Defeza no Seguransa Nasionál no ba kapasidade ne'ebé identifika ona ba iha Forsas no Servisu de Seguransa nian;
- Aperfeioa prosedimentus no mekanizmus ba planeamentu, orsamentasaun, jestaun finanseira, aprovizionamentu, lojística no rekursus umanus, liu husi implementasaun de leis ne'ebé vigora no adopsaun de regras no prosedimentus uniformes ka hanesan no transparentes, iha kada área ne'ebé temi iha leten;





- Asegura orden no seguransa ema nian no sasán, garante pás no estabilidade no mós harmonia sosiál, hodi prevene no kombat kriminalidade;
- Garante respeitu ba direitus umanus sidadauns hotu nian, ho atuaun forsas de seguransa nian;
- Profesionaliza Forsas no Servisus de Seguransa;
- Moderniza Instituisaun ida ne'e, inklui mós sistemas no prosesus, hodi adopta prosedimentus ne'ebé modernus no efisientes, no mós liu hosi uza teknolojia de informasaun;
- Promove partisipasaun Feto iha Setór de Seguransa, inklui kriasaun de oportunidades ba progressaun de karreiras.

Nune'e, sei dezenvolve asaun hirak tuir mai:

- Asegura atu setór de seguransa, inklui mós Polísia Nasionál de Timor-Leste, bele ona funsiona ho profesionais kualifikadus no responsáveis, ne'ebé hetan apoiu iha infraestruturas no ekipamentus modernus, no haktuir didi'ak regulamentus ne'ebé promove efikásia, responsabilidade no boa governasaun iha Setór ne'e (PED 2020);
- Kontinua implementa Planu Estratéjiku ba Seguransa Interna tinan 2030, bazeia ba sira nia objetivus estratéjikus, liuliu, iha tempu badak ka kurtu prazu, iha implementasaun ba faze daruak, ne'ebé dedika ba “Alargamento no Dezenvolvimentu ba Segurança Interna” (2016-2020);
- Reforma kuadru legál hodi halo modernizasaun no hadi'a atuaun polísia no diresoens sivíl no operasionál nian, haktuir Konseitu Estratéjiku ba Defeza no Seguransa Nasionál no PED 2011-2030;
- Haree fali ka Revee no halo reforma ba kuadru legál atu halo kontrolu efetivu ba iha fronteiras terrestre no marítima;
- Revee no atualiza Reglamentu de Disciplina PNTL nian;
- Kria mekanizmu prevensaun no jestaun de konfliktus atu muda atitudes no mentalidades, promove demokrasia, toleránsia no respeitu ba diferença;
- Reforsa modelu polisiamentu komunitáriu no kapasita forsas polisiais hodi buka rezolve konfliktus, hodi orienta profesionais iha setór ne'e ba modelu polisiamentu ida ne'ebé tau matan ba comunidades;





- Revee Lei kona-ba Artes Marsiais no Armas Brankas, reforsa estatutu da Komisaun Reguladora de Artes Marsias (CRAM) no fó continuidade ba prátika polisiamentu komunitáriu (ho vizibilidade, envolvimentu no profesionalismu);
- Hadi'a tan kapasidade operasionál, iha konsolidasaun seguransa públika;
- Hadi'a di'ak liu kapasidade operasionál hodi halo prevensaun ba kriminalidade no investigasaun kriminal;
- Reforsa koordenaun no kooperasaun entre Polisia Nasionál de Timor-Leste no Polisia Sientífika ba Investigasaun Kriminal, ne'ebé, ba oin, sei depende husi Komandu PNTL;
- Reforsa kapasitasaun institusionál no moderniza infraestruturas, ekipamentus no teknolojias informasaun iha setór, inklui mós tau iha informática sistema rekolla no tratamentu ba informasaun;
- Investe iha kapasitasaun forsas de seguransa kona-ba respeito iha atendimentu ba públiku, hodi asegura atendimentu ne'ebé adekuaudu ba feto no labarik sira no ema sira ne'ebé ho nesesidade espesial;
- Asegura ezisténsia Unidade de Tráfegu no Seguransa Rodoviária ne'ebé formadu ho di'ak no profesionál, iha estradas rai laran tomak, nune'e garante kumprimentu ne'ebé rigorozu iha kódigu estrada (PED 2020);
- Kria Akademia Polisia;
- Asegura qualidade ensinu ba siénsia polisiál hodi hasa'e koñesimentu ajente Polisia nian
- Promove Diresaun Nasionál de Seguransa Rodoviária no hamenus asidentes, nune'e mós aumenta asaun Polisia sira nian, hodi prevene no kontrola, nune'e mós liuhosi promosaun kampañas ne'ebé abranjente iha edukasaun rodoviária;
- Promove edukasaun sívika ba sidadauns hotu, kona-ba utilizasaun via públika no ba regras de tránzitu, iha nível intersetoriál;
- Haree fali no elabora kuadru legál ida ne'ebé bele harmoniza no hadi'a lejjlasaun rodoviária nian no elabora Planu Nasionál kona-ba Prevensaun no Seguransa Rodoviária;
- Proteje no prezerva patromóniu Estadu, tuir objetivus ne'ebé aprovaudu ona;
- Continua dezenvolve kooperasaun internasionál ho parseirus dezenvolvimentu, hodi asegura dezenvolvimentu iha setór;





- Kontinua investe iha infraestruturas, inklui mós edifisiu sivíl, eskuadras no Sentrus formasaun.

### 6.9.3. Servisu Migrasaun

- Regulamenta Lei n.º 11/2017, 24 fulan-maiu, ne'ebé altera ona hosi Lei n.º 10/2021, loron 16 fulan-juñu, kona-ba Migrasaun no Azilu, no elabora 'green list' foun ida;
- Aprova modelos no formuláriu ne'ebé presiza atu implementa Lei Migrasaun no Azilu;
- Regulamenta organizasaun, konteúdu no funsionamentu ba Sistema de Jestaun Fronteiras;
- Implementa rede dijital própria ida ba komunikasoens ba Sistema jestaun de fronteiras, ne'ebé permite ligasaun entre Diresaun Jerál no Delegasoens rejionais no Postos konsulares;
- Estabelese mekanizmu sira hodi implementa fronteiras elektronikus (*E-Gates*) iha postos pinsipais de entrada ka ema tama mai;
- Revee estatutu pessoál Servisu Migrasaun nian, hodi garante iha definisaun klara kona-ba funsoens no karreiras ba funsionarios iha instituisaun ne'e;
- Reforsa servisu konsulár sira hodi halo emisaun ba vistu turizmu sira;
- Konstrói edifisiu próprio ida ba Diresaun Jerál do Servisu de Migrasaun;
- Hadi'a infraestruturas no ekipamentus iha servisu migrasaun iha fronteiras hodi asegura kontrolu ba tama-no-sai sidadauns nasionais no estranjeirus;
- Forma no reforsa kapasidades profisionais servisu migrasaun nian no kontrolu iha fronteiras.

### 6.9.4. Servisu Nasionál de Intelijénsia

- Reforma kuadru legál hosi Servisu Nasionál Intelijénsia no kuadru orgániku pesoál nian ho adekuaudu ba dezempeñu funsaun;
- Aprova no implementa Planu Estratéjiku do Servisu Nasionál de Intelijénsia;
- Promove formasaun de rekursus umanus no kapasitasaun institusionál, iha Servisu Nasionál de Intelijénsia;





- Adopta servisu ho meius ne'ebé adekuadus iha peskiza, rekolla no análize informasaun no dadus, hodi kapasita instituisaun ho ekipamentus no meius teknolójikus ne'ebé nesesáriu, ba dezempeñu ninia funsaun;
- Promove koordenasan no kooperasaun ho Forsas de Defeza no Forsas de Seguransa, atu prevene no hasoru ameasas internas ka esternas;
- Promove kooperasaun internasionál entre Servisu Nasionál de Intelijénsia de Timor-Leste ho entidades konjéneres paízes seluk nian.

#### 6.9.5. Autoridade Nasionál de Protesaun Sivil

- Revee Lei Protesaun Sivil nian, Lei n.º 12/2020, loron 2 fulan-dezemburu hodi reforsa Sistema Nasionál de Protesaun Sivil ho forma integrada ho autoridade munisipál no ho ministériu relevante sira;
- Dezenvolve kareira profesionál ba funsionáriu de Protesaun Sivil no Bombeirus, liuhosi kriasaun karreira rasik;
- Harii edifisiu rasik ba Autoridade Nasionál de Protesaun Sivil, ne'ebé iha ekipamentus nesesáriu ba planeamentu no koordenasan iha atividades protesau sivil no bombeiros nian;
- Kontinua implementasaun ba sistema número úniku emerjénsia nian ida, ba servisu de apoiu husi Polísia, médikus no Bombeirus;
- Estabelese akordu de kooperasaun bilaterál iha area Protesaun Sivil no Bombeirus;
- Dezenvolve programa hodi apoiu ba kapasitasaun rekursus umanus, nune'e mós infraestruturas no ekipamentus ne'ebé prezisa, atu atua iha protesau sivil, inklui mós Korpu de Bombeiros, organizadu no profesionál, atu bele lori sira-nia misaun de servisu ho efisiénsia no responsabilidade (PED 2020);
- Kapasita Autoridade Nasionál de Protesaun Sivil;
- Dezenvolve Servisu Nasionál de Bombeirus;
- Kria mekanizmu de Alerta, atu reaje no aviza molok iha situausan dezastre naturál, no meius adekuadus ba resposta no atuaun.





## 6.10. Relasaes Internasionais no Política Esterna

Timor-Leste, meia-illa ida ne'ebé lokalizada iha Sudeste Asiático, ne'ebé nia seguransa depende ba estabelesimentu relasoens de amizade no kooperasaun sólidas ho paízes hosi fatin-fatin iha mundu, no liuliu, ho paízes viziñus, ho paízess iha rejiaun no paízes ne'ebé Timor Leste partilla lasus istórikus, kulturais no solidariedade hori uluk kedas, hanesan paízes ho língua ofisiál portugueza.

Nomós konsistente ho fundamentus konstituisaun nian, Timor-Leste kaer metin prinsípius kona-ba independénsia nasional, direitu povus nian ba autodeterminasaun, soberania permanente povu-nian kona-ba ninia riku-soi no rekursus naturais, kona-ba protesaun ba direitus umanus, respeito malu iha soberania, integridade teritorial no mós kona-ba igualdade entre Estados no kona-ba labele iha interferénsia iha asuntos internos Estados nian.

Istória independénsia nasional labele hadok-an husi atus diplomátikus, amizade no solidariedade hosi governus no povus iha mundu tomak. Objetivu política externa timorense labele iha dalan seluk, se lae atu kontinua mantein no reforsa relasoens amizade no kooperasaun, hodi promove, iha palku internasionál, rekonsiliaaun, pás, estabilidade, justisa no sistema internasionál, ne'ebé bele permite atu hala'o objetivus hirak ne'e, hodi kontribui hamenus kiak no dezvoltamentu sustentável iha nível mundiál.

Timor-Leste, tenke lori política esterna ida ne'ebé promove kooperasaun bilaterál no multilaterál, hodi loke dalan ba parserias ekonomikas, sosiais no kulturais ho nasoens seluk, lne'ebé esensial tebes atu atraí investimentu no kapasitasaun ba instituisoens no ba rekursus umanus País ne'e nian.

Iha kontestu ida ne'e, IX Governu sei hamosu objetivus hirak tuir mai, iha âmbito relasoens internasionais no política esterna:

- Promove intereses nasionais ne'ebé mai husi kontektu istóruku, jeográfiku, kulturál no estratéjiku país nian, hodi prezerva identidade nasional;
- Harii imajen ida kredível ba país independente no responsável no defende toleránsia, direitus umanus, Estadu de direito democrátiku no Sistema mundiál ho regras klaras no aseites internasionálmente;
- Fortalese relasoens de amizade, kooperasaun no solidariedade ho Estados hotu-hotu, ho baze iha prinsípius konstitusionais kona-ba soberania no independénsia, tuir prinsípiu de 'la iha aliadus, nem inimigus, hotu-hotu mesak amigus de'it' – ida ne'e mak lema husi IX





Governu Konstitusionál, ne'ebé sei orienta Relasoens Internasionais no Polítika Esterna, iha atuál no difísil konjuntura internasionál;

- Finaliza ka hakotu fronteiras terrestres no marítimas permanentes ho Indonesia atu kompleta luta Timor-Leste nian ba soberania plena ba ninia Rai no ninia Tasi;
- Reforsa lasus de amizade no kooperasaun, iha espasu rejionál no eskala globál, ho prioridade ba Rai sira ne'ebé Timor-Leste partilla fronteiras terrestres no marítimas, Austrália no Indonézia, no ho países ne'ebé partilla lasus istórikus, kulturais no língua komum, hanesan CPLP;
- Reforsa solidariedade, kooperasaun no ajenda komun ida ba países frájeis no afetadus ho konfliktu, liuliu atu implementa inisiativas ne'ebé bele lori Rai sira ne'e ba dalan dezvoltimentu no ba konsolidasaun pás no estabilidade, iha âmbito g7+;
- Reforsa relasoens de amizade no kooperasaun bilaterál ho países Sudeste Asiátiku nian no kontinua konsolida representasaun diplomátika iha Países hotu membros ASEAN;
- Hasai nu'udar prioridade adesaun ba ASEAN, hodi dezvoltolve inisiativas ho países-membros da ASEAN atu haree ba reformas nacionais ne'ebé ba hasoru ho diretrizes husi Assosiasaun ne'e, hodi kontinua esforsus hotu-hotu atu Timor-Leste bele sai membro efetivu ho pleno direito iha Organizasaun ne'e;
- Reforsa relasoens internasionais ho illas Pasífiku, inklui partisipasaun nu'udar Observador iha Forum das Illas do Pasífiku, no mós ho Estados husi Illas ki-ki'ik iha Pasífiku, ne'ebé buka hela hala'o sira dezvoltimentu, tanba ho sira Timor-Leste partilla buat barak em komum;
- Hakle'an relasoens istórikas entre Igreja Katólika ho Timor-Leste ba bem komum no atu harii sosiedade ne'ebé promove dignidade ema no fraternidade umana, justisa no pás, liu hosi kooperasaun ho Santa Sé no implementasaun akordu bilaterál ne'ebé assina ona – Konkordata;
- Promove multilateralismu, hanesan objetivu prioritário ba polítika esterna, hare ba kompleksidade konjuntura internasionál. Nune'e, reforso iha envolvimento iha ONU sai mós prioridade, hodi fó valor ba asuntos de interesse ba Timor-Leste no promosaun ba Objetivus de Desenvoltimentu Sustentável, no mós partisipasaun konstrutiva ba reforma Konsello de Seguransa, no mós iha temas hanesan altersaoens klimatikas, assuntos Tasi





nian no sustentabilidade Oseanus nian, Ekonomia Azul, problema de migrasoens no refujiadus, no mós inisiativas ho karater umanitáriu;

- Reforsa relasoens amizade no kooperasaun bilaterál ho paízes amigus ne'ebé sai parseirus importantes ba dezvoltimentu, hanesan Portugal, Austrália, Indonézia, Estados Unidos América, Kuba, Nova Zelândia, Japaun, Korea do Sul, Reinu Unidu, Irlanda no China, no mós ho paízes ne'ebé pertense ba BRICS, CPLP, ASEAN no ninia parseiru diálogu sira (Austrália, Canadá, China, União Europeia, India, Japão, Nova Zelândia, República da Coreia, Federação da Rússia, Reino Unido e Estados Unidos da América), no parseiru esternu sira seluk, no ho país sira hosi Rejiaun Golfo nian;
- Konsolida lasus amizade no kooperasaun ho paízes iha Uniaun Europeia, nune'e mós kontinua aposta iha projetus kooperasaun ne'ebé hetan parseria ho organizasaun ida ne'e;
- Reforsa relasaun internasionál ho nasoens ne'ebé iha kompromisu hodi konsolida sira-nia dezvoltimentu no defende integridade territoriál, hanesan Estadu sira ho Illa Ki'ik iha Pasífiku ne'ebé iha hela dezvoltimentu nia laran, nune'e mós nasoens ne'ebé iha kompromisu hodi uza no kontrola sira-nia rikusoin hodi benefisia sira-nia povu;
- Defende prinsípius fundamentais Movimentu Naun-Aliñadu no Karta das Nasoens Unidas, kona-ba prezersaun no promosaun pás iha mundu, liuhosi diálogu no diplomasia entre Estados, hodi evita uza fali forsa atu rezolve konfliktus;
- Kontinua hametin papel Timor-Leste iha organizasaun rejionál no internasionál sira, hanesan Fórum das Illas do Pasífiku, Fórum Rejionál ASEAN, Diálogu do Pasífiku Sudoeste, Grupu Estados África, Caraíbas no Pasífiku (OEACP), no OEACP-EU, Banku Mundiál, Fundo Monetário Internasionál, Banku Asiático ba Dezvoltimentu, Asian Infrastructure Development Bank, Organizasaun Mundiál ba Komérsiu, Bali Democracy Fórum, Melanesian Spearhead Group, Iniciativa Korál Triangle, TIA-GT (Grupo de Trabalho Timor-Leste. Indonesia ho Austrália) no organizasoes internacionais seluk.
- Reativa partisipasaun Timor-Leste nian iha Forun Makau ho objetivu atu reforsa kooperasaun ekonómika no komersiál entre República Populár Xina ho País Lingua Portugeza sira.







### **6.11. Delimitasaun ba Fronteiras Terrestres no Marítimas**

Delimitasaun fronteiras marítimas no terrestres sai nu'udar prioridade nasionál boot ida, tanba assuntu ne'e trata kona-ba soberania nasionál.

Timor-Leste konsegue duni lori Austrália ba negosiasoens, liu husi Konsiliaun Obrigatória, no iha marsu tinan 2018, Timor-Leste no Austrália assina Tratadu ne'e iha Secretário-Jerál nia oin no, iha loron 30 fulan-agosto tinan 2019, Timor-Leste ratifika Tratadu ne'e.

Atu hetan soberania totál, Timor-Leste tenke finaliza fronteiras terrestres no marítimas ho Indonésia, tuir direito internasionál nu'udar kestaun prioridade nasionál ida.

### **6.12. Dezenvolvimentu Institusionál ba Polítika Esterna**

Ho objetivu atu implementa polítika esterna Nasaun-nian, iha ámbitu relasaun internasionál, Governu sei kontinua hametin instituisoens ne'ebé responsáveis ba aplikasaun ninia polítika esterna no atu promove kooperasaun bilaterál no multilaterál, ne'ebé orienta ba dezenvolvimentu Nasaun.

Nune'e, Governu sei:

- Kontinua dezenvolve kuadru legál, ne'ebé lori ba fortalesimentu setór ida ne'e, inklui mós estrukturasan no hasa'e estatutu ba karreiras diplomátikas, nune'e mós atu regula direitus no deveres funsionárius nian, iha servisus diplomátikus;
- Aprova no implementa lejizlasaun kona-ba Protokolu Estadu, ne'ebé institusionaliza prosedimentus lubun ida no regras internas, iha relasionamentu entre Timor-Leste ho Estados seluk, hodi nune'e dignifika Nasaun no Nasaun-nia representantes;
- Kontinua halo elaborasaun, produsaun no aprovasaun ba Dokumento Mutin (Livro Branco de Polítika Externa);
- Armoniza kompromisus internasionais, ne'ebé vinkula Estadu Timor-Leste no halo nia divulgasaun intersetoriál, hodi hadi'a profesionalismu no hadi'a asaun husi Estadu, nune'e mós atu kumpre obrigasoens ne'ebé Estadu assume tiha ona;
- Sistematiza prosedimentus no regulamentasaun kona-ba Tratadus Internasionais no garante prezervasaun no divulgasaun dokumentus ne'ebé relasiona ho assinatura Tratadu Internasionais, Akordus, Memorandus de Entendimentu no Protokolus, hodi identifika no promove entidade depositária ba dokumentus ne'e;





- Aprova rejime tranzitóriu foun ba funsionáriu permanente Ministériu Negósius Estranjeirus nian ba kuadru pesoál Karreira Diplomátika nian, no hametin liu tan Sentru Estudus Diplomátikus, nu'udar servisu sentrá MNEK nian hodi promove kapasitasaun ba kuadru pesoál karreira diplomátika nian;
- Dezenvolve planu formasaun kontínua ba rekursus umanus iha Ministériu dos Negósius Estranjeirus no Kooperasaun, inklui mós reforsu iha kompeténsia iha línguas nasionais no estranjeiras;
- Kontinua prosesu rasionalizasaun (katak hamenus) no redimensionamentu (katak bele hakbit) ba misoens diplomátikas no konsulares iha estranjeiru;
- Hadia no atualiza portál Ministério Negósius Estranjeirus no Kooperasaun, inklui mós hato'o ba públiku informasaun ne'ebé promove país no fasilita koñesimentu no asesu ba áreas interese nasional nian;
- Produz no fahe ba representasoens diplomátikas tomak, materiais promocionais (atu promove) kona-ba ita-nia País, hodi atrai investimentu, komérsiu no turizmu mai Timor Leste;
- Halo estudo ne'ebé kle'an kona-ba rekursus umanus Timor-Leste nian atu parsisipa plenamente no hasai proveito husi futura adezaun ba ASEAN, hodi inklui rekomendasoens atu kapasita pessoál tékniku iha kada setór hodi bele representa Timor-Leste fó forma ne'ebé efikás;
- Analiza, ho objetivu atu implementa duni, Tratadus no Konvensoens Internasionais hotu-hotu ne'ebé ratifika tiha ona ka atu ratifika no kompromissu hotu-hotu ne'ebé assume tiha ona ka atu assume iha futuru, iha ámbito Organizaun Nasoens Unidas no organizaun internasionál sira seluk. Ne'e inklui mós kompromissus voluntários ne'ebé assume tiha ona ba implementasaun Objetivus de Dezenvolvimentu Sustentável, nune'e mós iha áreas seluk ne'ebé konsideradas prioritárias ba País. Armonizasaun iha kompromissus internasionais ne'ebé vincula Estadu no ninia divulgasaun intersetoriál, maka sei kontribui atu hadi'a professionalismo no asaun Estadu nian, nune'e mós atu kumpre obrigasoens ne'ebé Estadu assume.





### 6.13. Komunitade Timoroan iha Estranjeiru

Governu empenadu atu hametin lasus ne'ebé bele hako'ak di'ak liu ita-nia kompatriotas iha estranjeiru. Ita entende katak, apezarde sirkunstánsias ne'ebé la hanesan, hodi lori timoroan barak husik hela ita-nia rai, hodi ba buka seguransa no kondisaun vida ne'ebé di'ak iha rai seluk, tan ne'e, fundamentál tebes atu ita mantein nafatin, no se bele karik hametin liu tan, lasus ne'ebé liga timoroan tomak iha estranjeiru ho Repúblika Demokrátika Timor-Leste. Ita-nia kompatriotas iha estranjeiru sai meius di'ak ida hodi halo promosaun kona-ba ita-nia País iha estranjeiru.

Partisipasaun polítika, aleinde sai nu'udar direitu fundamentál ne'ebé rekoñesidu ba sidadaun timoroan tomak, hanesan mós instrumentu importante ida hodi hametin ligasaun ita-nia sidadauns ba ho ita-nia Komunitade Nasionál.

Governu determinadu tebes atu kontinua promove adosaun ba medidas ne'ebé bele apoia ita-nia kompatriotas, ne'ebé hela iha estranjeiru, no hametin liu tan nia ligasaun ho Timor-Leste, nune'e, propoin atu hala'o tarefas hirak tuir mai:

- Aprova lejislasaun ne'ebé permite atu asegura prestasaun servisu públikus ba sidadauns timoroan iha estranjeiru, liu hosi Embaixadas no Konsuladus da Repúblika Demokrátika Timor-Leste iha estranjeiru;
- Hametin meius hirak ne'ebé iha Embaixadas no Konsuladus RDTL nian iha estranjeiru, hodi fó prestasaun de servisu kona-ba rejistus no notariadu no emisaun pasaporte ba sidadauns ne'ebé hela iha rai-li'ur;
- Hatama mekanizmu hodi fó apoio no protesauun Konsulár ba sidadauns timoroan ne'ebé hela iha estranjeiru;
- Hadi'a mekanizmu hodi fahe informasaun ba comunidade timoroan iha estranjeiru, ne'ebé relaciona ho vida no ho interese ita-nia Nasaun.







# IX GOVERNUN KONSTITUSIONAL

JULLU 2023